

Holy Bible

Aionian Edition®

भगवान ना खरला बोल

Palya Bareli Bible

AionianBible.org

The world's first Holy Bible untranslation

100% free to copy and print

also known as “ The Purple Bible ”

Holy Bible Aionian Edition ®

भगवान ना खरला बोल
Palya Bareli Bible

CC Attribution NoDerivatives 4.0, 2018-2024

Source text: eBible.org

Source version: 7/13/2024

Source copyright: CC Attribution 4.0

The Word for the World International, 2020

Formatted by Speedata Publisher 4.19.18 (Pro) on 7/19/2024

100% Free to Copy and Print

TOR Anonymously

<https://AionianBible.org>

Published by Nainoia Inc

<https://Nainoia-Inc.signedon.net>

We pray for a modern public domain translation in every language

Report content and format concerns to Nainoia Inc

Volunteer help is welcome and appreciated!

Celebrate Jesus Christ's victory of grace!

Preface

Bareli, Palya at AionianBible.org/Preface

The *Holy Bible Aionian Edition* ® is the world's first Bible *un-translation*! What is an *un-translation*? Bibles are translated into each of our languages from the original Hebrew, Aramaic, and Koine Greek. Occasionally, the best word translation cannot be found and these words are transliterated letter by letter. Four well known transliterations are *Christ*, *baptism*, *angel*, and *apostle*. The meaning is then preserved more accurately through context and a dictionary. The Aionian Bible un-translates and instead transliterates eleven additional Aionian Glossary words to help us better understand God's love for individuals and all mankind, and the nature of afterlife destinies.

The first three words are *aiōn*, *aiōnios*, and *aiōdios*, typically translated as *eternal* and also *world* or *eon*. The Aionian Bible is named after an alternative spelling of *aiōnios*. Consider that researchers question if *aiōn* and *aiōnios* actually mean *eternal*. Translating *aiōn* as *eternal* in Matthew 28:20 makes no sense, as all agree. The Greek word for *eternal* is *aiōdios*, used in Romans 1:20 about God and in Jude 6 about demon imprisonment. Yet what about *aiōnios* in John 3:16? Certainly we do not question whether salvation is eternal! However, *aiōnios* means something much more wonderful than infinite time! Ancient Greeks used *aiōn* to mean *eon* or *age*. They also used the adjective *aiōnios* to mean *entirety*, such as *complete* or even *consummate*, but never infinite time. Read Dr. Heleen Keizer and Ramelli and Konstan for proofs. So *aiōnios* is the perfect description of God's Word which has *everything* we need for life and godliness! And the *aiōnios* life promised in John 3:16 is not simply a ticket to eternal life in the future, but the invitation through faith to the *consummate* life beginning now!

The next seven words are *Sheol*, *Hadēs*, *Geenna*, *Tartaroō*, *Abyssos*, and *Limnē Pyr*. These words are often translated as *Hell*, the place of eternal punishment. However, *Hell* is ill-defined when compared with the Hebrew and Greek. For example, *Sheol* is the abode of deceased believers and unbelievers and should never be translated as *Hell*. *Hadēs* is a temporary place of punishment, Revelation 20:13-14. *Geenna* is the Valley of Hinnom, Jerusalem's refuse dump, a temporal judgment for sin. *Tartaroō* is a prison for demons, mentioned once in 2 Peter 2:4. *Abyssos* is a temporary prison for the Beast and Satan. Translators are also inconsistent because *Hell* is used by the King James Version 54 times, the New International Version 14 times, and the World English Bible zero times. Finally, *Limnē Pyr* is the Lake of Fire, yet Matthew 25:41 explains that these fires are prepared for the Devil and his angels. So there is reason to review our conclusions about the destinies of redeemed mankind and fallen angels.

The eleventh word, *eleēsē*, reveals the grand conclusion of grace in Romans 11:32. Take the time to understand these eleven words. The original translation is unaltered and a note is added to 64 Old Testament and 200 New Testament verses. To help parallel study and Strong's Concordance use, apocryphal text is removed and most variant verse numbering is mapped to the English standard. We thank our sources at eBible.org, Crosswire.org, unbound.Biola.edu, Bible4u.net, and NHEB.net. The Aionian Bible is copyrighted with creativecommons.org/licenses/by-nd/4.0, allowing 100% freedom to copy and print, if respecting source copyrights. Check the Reader's Guide and read online at AionianBible.org, with Android, and TOR network. Why purple? King Jesus' Word is royal... and purple is the color of royalty!

History

Bareli, Palya at AionianBible.org/History

- 04/15/85 - Aionian Bible conceived as B. and J. pray.
- 12/18/13 - Aionian Bible announced as J. and J. pray.
- 06/21/15 - Aionian Bible birthed as G. and J. pray.
- 01/11/16 - AionianBible.org domain registered.
- 06/21/16 - 30 translations available in 12 languages.
- 12/07/16 - Nainoia Inc established as non-profit corporation.
- 01/01/17 - Creative Commons Attribution No Derivatives 4.0 license added.
- 01/16/17 - Aionian Bible Google Play Store App published.
- 07/01/17 - 'The Purple Bible' nickname begins.
- 07/30/17 - 42 translations now available in 22 languages.
- 02/01/18 - Holy Bible Aionian Edition® trademark registered.
- 03/06/18 - Aionian Bibles available in print at Amazon.com.
- 10/20/18 - 70 translations now available in 33 languages.
- 11/17/18 - 104 translations now available in 57 languages.
- 03/24/19 - 135 translations now available in 67 languages.
- 10/28/19 - Aionian Bible nursed as J. and J. pray.
- 10/31/19 - 174 translations now available in 74 languages.
- 02/22/20 - Aionian Bibles available in print at Lulu.com.
- 05/25/20 - Illustrations by Gustave Doré, La Grande Bible de Tours, Felix Just.
- 08/29/20 - Aionian Bibles now available in ePub format.
- 12/01/20 - Right to left and Hindic languages now available in PDF format.
- 03/31/21 - 214 translations now available in 99 languages.
- 11/17/21 - Aionian Bible Branded Leather Bible Covers now available.
- 12/20/21 - Social media presence on Facebook, Twitter, LinkedIn, YouTube, etc.
- 01/01/22 - 216 translations now available in 99 languages.
- 01/09/22 - StudyPack resources for Bible translation study.
- 02/14/22 - Strong's Concordance from Open Scriptures and STEP Bible.
- 02/14/23 - Aionian Bible published on the TOR Network.
- 12/04/23 - Eleēsē added to the Aionian Glossary.
- 02/04/24 - 352 translations now available in 135 languages.
- 05/01/24 - 371 translations now available in 151 languages.

Table of Contents

NEW TESTAMENT

मत्ती	11
-------------	----

APPENDIX

Reader's Guide

Glossary

Maps

Destiny

Illustrations, Doré

NEW TESTAMENT



The Crucifixion

*"Jesus said, 'Father, forgive them, for they don't know what they are doing.'
Dividing his garments among them, they cast lots."*

Luke 23:34

मत्ती

1 ईसू मसी ना आडा-बुडा नी नाम नी लीखली सुची नी कीताप, जे अब्राहम नी अवलयात, अने दावूद नी अवलयात हता। 2 अब्राहम ईसाक नो सोरो हतो, अने ईसाक याकुब नो बाह हतो, अने याकुब यहूदा नो बाह हतो अने तीना भाय। 3 अने यहूदा फीरीस अने जोरह नो बाह हतो, तीमनी आयह तामार हती, फीरीस हीसरोन नो बाह हतो, अने हीसरोन एराम नो बाह हतो। 4 एराम अम्मीनादाब नो बाह हतो, अने अम्मीनादाब नहसोन नो बाह हतो, नहसोन सलमोन नो बाह हतो। 5 अने सलमोन बोवाज नो बाह हतो, अने बोवज नी आयह राहब हती, बोवाज ओबेद नो बाह हतो, अने ओबेद नी आयह स्त हती, अने ओबेद यीसे नो बाह हतो। 6 यीसे राजा दावूद नो बाह हतो। अने राजा दावूद सुलेमान नो बाह हतो, सुलेमान नी आयह उरीयाह नी लाडी हती। 7 अने सुलेमान रहबाम नो बाह हतो। अने रहबाम अबीयाह नो बाह हतो, अने अबीयाह, आसा नो बाह हतो। 8 आसा यहोसाफात नो बाह हतो, यहोसाफात योराम नो बाह हतो, अने योराम उज्जीयाह नो बाह हतो, 9 उज्जीयाह योताम नो बाह हतो, योताम आहज नो बाह हतो, अने आहज हीजकीयाह नो बाह हतो, 10 हीजकीयाह मनसीह नो बाह हतो, मनसीह आमोन नो बाह हतो, अने आमोन योसीयाह नो बाह हतो; 11 अने ईसरायल ना माणहू ने धरिन बेबीलोन मे लीजवा नी टेमे, योसीयाह यकूनयाह अने तीना भायु नो बाह हतो। 12 अने ईसरायल ना माणहू ने धरिन बेबीलोन मे लीजवान बाद, यकूनयाह सलतीयेल नो बाह हतो, अने सलतीयेल जम्बाबील नो बाह हतो, 13 जम्बाबील अबीहूद नो बाह हतो, अबीहूद ईलयाकीम नो बाह हतो, अने ईलयाकीम अजोर नो बाह हतो, 14 अजोर सदोक नो बाह हतो, सदोक अखीम नो बाह हतो, अने अखीम ईलीहूद नो बाह हतो, 15 ईलीहूद एलीयाजार नो बाह हतो, एलीयाजार मततान नो बाह हतो, अने मततान याकुब नो बाह हतो। 16 याकुब युसुफ नो बाह हतो, जे मरीयम नो घोरवाळो हतो, अने आहयी मरीयम सी ईसू पयदा हयो, जे मसी केवाये। 17 आनी रीते आखी मेळीन अब्राहम गेथी दावूद लग चोवदे पीडी हयी, दावूद गेथी बेबीलोन मे धराय जवा नी टेमे लग चोवदे पीडी हयी, अने बेबीलोन मे धरिन लीजवा नी अळतेण लग गेथी ईसू मसी लग चोवदे पीडी हयी। 18 ईसू मसी नी पयदावारी आसम हयी; जतयार तीनी आयह मरीयम नी जोडावणी युसुफ हाते हय जेली हती, अने अळतेण तीमना वेवा हयन भेळा हयवा नी पेलेत मरीयम चोखली आत्मा नी लारे भारेपोगे हय जी। 19 मरीयम नो घोरवाळो युसुफ धरमी माणेह हतो अने माणहू अगळ मरीयम नु नामबददी नी करवा हीडतो हतो, एतरे होगोत तीने सोड देवा नो वीच्यार करवा बाज रेलो। 20 युसुफ आसम वीच्यार करीन हुय ज्यो, तत्यास्त तीने हपना मे भगवान नो हरगदुत देखाव पडीन केदो, “ए युसुफ दावूद नी अवलयात, मरीयम ने तारी लाडी बणावीन लाववा सी ना बीहे। काहाके तीहयी चोखली आत्मा नी लारे भारेपोगे हयली से। 21 अने तीहयी सोरू ने पयदा करहे अने तु तीनु नाम ईसू राखजे, काहाके तीहयो आपणा माणहू ने तीमना पापु सी सोडावहे।” 22 आहयु आखु आनीन करते हयु के जे बोल मालीक, भगवान वगे गेथी वात

केणया नी लारे केदलो, पुरो हये: 23 “हमळो एक कुवारी भारेपोगे हयहे अने तीहयी एक सोरू पयदा करहे, अने तीनु नाम ईम्मानुएल पाडहे तीहयु नाम नु मतलब से; भगवान आपणी हाते से।” 24 जतयार युसुफ हुवीन उठयो, ततयार हपना मे भगवान नो हरगदुत केदो तेमेत कर्यो अने मरीयम हाते वेवा करीन आहफा ना घोर ली आयो; 25 बाखीन युसुफ ततयार लग मरीयम नी हाते नी ज्यो, जतयार लग तीनु सोरू पयदा नी हयु। युसुफ सोरू नु नाम ईसू पड्यो।

2 ईसू यहूदा देस ना बेतलहम गाम मे पयदा हयो। ततयार हेरोद राजा राज करवा बाज र्यो हतो। ततयार उगवणा गेथा तारा ने जाणवा वाळा जानकार यस्सलेम हेर मे आया। 2 अने माणहू ने पुसवा बाज ज्या, “युहदी माणहू नो राजा जे पयदा हयलो से तीहयो कां से? काहाके उगवणो गेथो तीनी सेलाणी नो तारो उगतलो देखला से। अने आमू तीने वांदवा आवला से।” 3 आहयी वात हमळीन हेरोद राजा अने यस्सलेम हेर मे रेणया आखा माणहू घबराय ज्या। 4 एतरे हेरोद राजा युहदी ना डायला पुंजारा अने चोखली सास्तर हीकाडन्या ने अने आखा ने भेळा करीन आहयु पुछ्यो, मसी कां पयदा हयवा जेवे? 5 तीहया केदा, “यहूदा परदेस ना बेतलहम गाम मे; काहाके भगवान भणी गेथो केवा वाळो आना बारा मे केदलो से।” 6 “ए बेतलहम, तु यहूदा देस मे वाळा, काना बी मोट्ला हेर मे गेथु नानु नी हय; काहाके तारी मे एवो राज करनयो अदीकार्यो पयदा हयन उजनतो हयहे। जे मारा ईसरायल ना माणहू नी देख-भाळ करहे।” 7 अळतेण तारा ने जाणवा वाळा जानकार ने हेरोद राजा होगोत बोलायो अने तीमने पुसीन मालम कर लेदो के तारो कानी टेमे देखावा पडलो। 8 अळतेण हेरोद राजा तीमने बेतलहम मोकल्यो अने हुकम आप्यो, “जावो, अने जायन सोरू ने होदो अने तीहयु सोरू जड जाय, ता मने खबर करजो, एतरे मे बी जायन तीना पोगे पडीन वांदही।” 9 तीहया राजा नी वात मानीन चाल पड्या। अने जे तारा ने तीहया देखला हता, तीहयो तारो बी तीमनी अगळ-अगळ चाल पड्यो, अने जां सोरू हतु तीहयात जागे जायन उबो री ज्यो। 10 तीहया तारा ने देख्या ता घण-जबर खुस हय ज्या। 11 घोर मे मोय ज्या अने तीहयु, सोरू ने तीनी आयह मरीयम हाते देख्या अने तीना पोगे पडीन वांद्या, अने तीहया आहफा-आहफा नी पेटारी मे गेथा नीकाळीन ईसू ने होनु, लोबान अने गंदायणयु इंततर भेट करया। 12 काहाके भगवान तीहया जानकार ने हपना मे चेताय देदलो के तमु हेरोद राजान तां नी जजो। एतरे तीहया बीजी वाट्ये पडीन आहफाम ना देस जत र्या। 13 तीहया जानकार ने जवादीन मालीक नो दुत युसुफ ने हपना मे देखाव पड्यो अने हुकम आपीन केदो, “उठ! सोरू अने तीनी आयह ने लीन मीसर देस नाह जा। जतयार लग मे पासो चाल नी केम ततयार लग तांत रेजे। काहाके हेरोद राजा मराय नाखवा करीन सोरू ने होदाडवा वाळो से।” 14 आहयु हमळीन तीहयीत राते उठीन सोरू अने तीनी आयह ने लीन मीसर देस भणी चाल पड्यो। 15 तीहयो हेरोद राजा ने मरते लगण युसुफ मरीयम अने सोरू हाते मीसर देस मेत र्यो, अळतेण मालीक भगवान वगे गेथी वात केणया माणहू नी लारे केदली वात पुरी हये, “मे मारा सोरा ने मीसर देस मे गेथो बोलायो।” 16 अळतेण तारा ने जाणवा वाळा जानकार मने धोको दीन जत र्या करीन हेरोद राजा ने घण-जबर रीह लागी। अने तीहयो सीपायडा ने आहयु कीन मोकल्यो के तारा

ने जाणवा वाळा जानकारा नी केदली टेम पोर बेतलहम अने आडे-धेडे वाळा आखा सोरा ने मार नाखो, जे बे साल ना अने बे साल गेथा नाना से। 17 अने ततयार भगवान वगे गेथा केणया माणेह यरिमया नी केदली वात पुरी हय जी, 18 “रामा हेर मे गीण आवे एवी अवाज हमळाय पडी, रडवा अने नेहरा दीन रडवू हमळाय पड्यु। राहेल आहफा सोरा नी करते रडवा बाज री हती। काहाके तीहया हाव नी रया।” 19 हेरोद ने मरवान बाद, मीसर देस मे यसुफ ने हपना मे मालीक नो दुत देखाव पडीन केदो, 20 “उठ, सोरा ने अने तीनी आहय ने लीन ईसरायल ना देस मे जत रे, काहाके जे तारा सोरा ने मारवा हीडता हता, तीहया मर जेला से।” 21 ततयार यसुफ नीदर मे गेथो जाग उठ्यो, अने सोरा ने अने तीनी आहय ने हाते लीन ईसरायल ना देस मे पासो आयो। 22 ततयार अरखीलाउस आहफा ना बाह हेरोद ना जागे यहूदया पोर राज करवा बाज र्यो, ईसम हमळीन तां जवा सी वीहते हतो। अळतेण हपना मे भगवान सी खबर जडी अने गलील देस मे जत र्यो, 23 अने नासरत नाम ना गाम मे जायन रेवा बाज ज्यो, काहाके तीहयो बोल पुरो हये, जे भगवान वगे गेथी वात केणया माणहु नी लारे केदलो हतो: “तीहयो नासरी केवायहे।”

3 तीहया दाडा मे बपतीसमा आपणयो युहन्नो, युहदी जीला ना बडा मे आवीन, आडीन आहयु परच्यार करवा बाज ज्यो, 2 “पापु ने सोडीन आहफाम ना मन ने भगवान वगा वाळो, काहाके हरग नु राज हातेत आय जेलु से।” 3 आहयो युहन्नो तीहयोत हतो, जीना बारा मे भगवान वगे गेथो वात केवा वाळो यसायो केदलो हतो: “उजाडी बडा मे आडवा वाळा नी अवाज से: मालीक जुगु रोहो तीयार करो अने तीनी जुगु वाट हूदी करो।” 4 आहयो युहन्नो ते उटडा ना नीमवाळा ना लुगडा पेरतलो अने केड्या मे चामडा नो पट्टो बांदतलो। तीनु खाणु टीड्या अने बडा मे नु मोद हतु। 5 यस्सलेम हेर वाळा, आखा यहूदया वाळा, अने यरदन नंदी ना आडे-धेडे ना गाम वाळा आखा माणहु युहन्नान तां आवता हता। 6 अने आपणा पापु ने मानीन यरदन नंदी मे तीना हाते आया अने तीहयो बपतीसमा आप्यो। 7 युहन्ना ढेरत फरीसी माणहु ने अने सदुकी माणहु ने बपतीसमा लेवा करीन आवतला देख्यो अने तीहयो तीमने केदो, “ए गडहा ना बच्चा! तमु बपतीसमा लेहु ता आववा वाळी गरा तमारी पोर गेथी टळ जहे ईसम तमने कोय की देदु?” 8 आमू पाप भणी गेथा मन फरवीन भगवान वगा वळ जेला से, ईसम जीवाय जीवीन आहफा ने उजन्ता करो। 9 अने ‘आमू ते अब्राहम बाह नी अवल्यात से’ ईसम वीच्यारीन बेफीकरया नी रेजो। मे तमने आहयु केम, भगवान दगडा मे गेथो बी अब्राहम वाटु सोरो उबजाड सके। 10 हाव झाड ना मुळ्या पोर कुराडी मेकाय जेली से। एतरे जे झाड वारु नी फाले, तीहयु झाड ने वाड देहे अने तीने आकूठा मे धपाडवा करीन नाख देहे। 11 मे ते तमने पाप भणी गेथु मन फरवीन भगवान वगा वळवा करीन पाणी सी बपतीसमा आपु; बाखीन जे मारी अळतेण आववा वाळो से, तीहयो मारी गेथो घणो सकृती वाळो से। मे तीना खाहडा उचलवा नी लायक बी नी हया। तीहयो तमने चोखली आत्मा अने आकूठु सी बपतीसमा आपहे। 12 तीहयो आहफा नु हपडु तीना हात मे ली लेदलो से, अने तीहयो आहफा ना खळा मे गम नीकाळीन चोखाळहे अने गम ने मोहटी मे भरहे, पण गम ना चारा ने आकूठी ने नाख देहे जे कदी नी

मत्ती

ओलाये।” 13 तीहयी टेमे, ईसु युहन्ना पांह बपतीसमा लेवा करीन गलील जीला गेथो यरदन नंदी धेडे ज्यो। 14 युहन्नो आहयु केतो जायन ईसु ने रोकवा बाज ज्यो, मने तारा हात सी बपतीसमा लेवा नी जरवत से, अने तु मारीन्तां काहा आय र्यो? 15 ईसु तीने जपाप आप्यो, “हमणे आहयु ईसमेत हयवा दे, आपणु ने, भगवान ने जे गमे तीने पुरु करवा करीन आहयुत करवा वारु से।” ता युहन्नो तेमेत हयवा देदो। 16 ईसु तत्यास्त बपतीसमा लीन पाणी मे गेथो उपर नीकळ्यो। ता तेतरी घडी हरग उगडी ज्यु, अने ईसु, भगवान नी आत्मा ने पारवान वेह मे आहफा पोर उतरतली अने थांगतली देख्यो। 17 अने तीना बारा मे हरग गेथो आहयो बोल हमळायो, आहयो मारो मोंगाळ्ळो सोरो से। जीनी सी घणो खुस से।

4 ते वखत भुतडा सी ईसु नी पारख कराववा करीन आत्मा ईसु ने उजाडी बडा मे ली जी। 2 ईसु चाळीह दाडा अने चाळीह रात उपाह करवा नी अळतेण तीने भुक वेला पाडवा लागी। 3 अने पारखवा वाळो भुतडो आवीन ईसु ने केदो, कदीम तु भगवान नो सोरो हय, ता आहया दगडा ने हुकम आपीन कीदे, के तमु रोट्ला बण जावो। 4 पण ईसु भुतडा ने केदो, “सास्तर मे लीखलु से, ‘माणेह रोट्ला खायन नी जिवे पण तीहया भगवान ना मोडा मे गेथा नीकळवा वाळा एक-एक बोल सी जीवतलो रेया।’” 5 भुतडो ईसु ने यस्सलेम मे ली ज्यो, जे चोखलु हेर केवाये, अने मंदीर नी चोटली पोर उबो कर देदो। 6 अने भुतडो ईसु ने केदो, “कदीम तु भगवान नो सोरो हय, ता मंदीर नी चोटली पोर गेथो आहफोत हेदो कुद पड, काहाके चोखली सास्तर मे लीखलु से; भगवान तारी रखावळी करवा करीन हरगदुत ने हुकम आपहे; तीहया तने उपरेत झेल लेहे, अने तारा पोगु मे दगडा नी ठेह नी लागवा देया।” 7 ईसु, तीहया भुतडा ने अळी केदो, नेम सास्तर मे आहयु बी लीखलु से, तु आहफा ना मालीक भगवान ने ना पारखे। 8 अळतेण भुतडो ईसु ने एक घणा उचा बडा पोर ली ज्यो अने तीने कळी ना आखा राज अने तीनु राज-पाट देखाड्यो। 9 अने ईसु ने केदो, कदीम तु मने पोगे पडीन वांदे, अने मारी पुजा करे, ता मे तने आहयु आखु आप देही! 10 ततयार ईसु भुतडा ने केदो, “ए भुतडा, सेदो हय जा! काहाके चोखली सास्तर मे लीखलु से, तमु आहफा ना मालीक भगवान ने वांदया करो, अने नीसृती तीनीत सेवा करो।” 11 अळतेण भुतडो, ईसु ने सोडीन जत र्यो, अने देखो हरगदुत आवीन तीनी चाकरी करवा बाज ज्यो। 12 जतयार ईसु आहयु हमळ्यो के बपतीसमा आपण्यो युहन्ना धरया ज्यो, ता तीहयो गलील जीला मे जत र्यो। 13 तीहयो नासरत हेर ने सोडीन, कफरनहुम हेर मे जे दर्या धेडे जबुलुन अने नपताली ना देस मे जीन रेवा बाज ज्यो। 14 काहाके भगवान वगे गेथा केणया यसाया नी लारे केदलु हतु तीहयु पुरु हये: 15 “जबुलुन अने नपताली परगणा मे दरया नी वाट्ये, यरदन नंदी नी बुडणला ईलाका वाळा, आडजातया ना देस गलील मे। 16 जे माणहु अंदारला मे जीववा बाज रया हता। तीहया एक घणु मोटु वीजाळु देख्या, अने तीहया देस मे माणहु मोत ना साहळा मे जीवता हता, तीमनी पोर घणु मोटु वीजाळु हयु।” 17 तीहयी टेमे गेथो ईसु आहयु परच्यार करवा बाज ज्यो, पाप भणी गेथु मन फरवीन भगवान वगा वळो। हरग नु राज हाते आय लागलु से। 18 जतयार ईसु गलील दर्या धेडे मायन

जवा बाज र्यो हतो, ता बे भाय ने देख्यो, सीमोन ने, जे पतरस बी केवाये, अने तीना भाय अंदरयास ने। तीहया दर्या मे जाळ नाख्वा बाज र्या हता काहाके तीहया काहरया हता। 19 ईसु तीमने केदो, “मारी हाते चालो, मे तमने माणहु ने भगवान भणी कीकम लाव्वा हीकाडही।” 20 अने तीहया ततयास्त जाळ तांत रेवा दीन ईसु हाते चाल पड्या। 21 अने ईसु तां गेथो अगो ज्यो ता तां अळी बीजा बे भाय ने देख्यो, जब्दी ना सोरो याकुब ने अने तीना भाय युहन्ना ने तीहया आहफाम ना बाह जब्दी हाते दुंड्या मे आहफाम नी जाळ हदारता हता। ईसु तीमने बोलायो। 22 अने तीहया ततयास्त दुंड्या ने अने आहफाम ना बाह ने सोडीन ईसु हाते चाल पड्या। 23 ईसु गलील जीला मे फीरतो जायन भगवान ना भक्ती ना घोरु मे हीकापण आप्तो र्यो, अने भगवान ना राज नी खुस-खबर परच्यार करतो र्यो। अने माणहु नी आखी भाती नी मंदवाड अने लुलखाय सेटी करीन आरगो कर्यो। 24 अने आखा सीरीया देस मे ईसु नी खबर फेल जी। माणहु फेपराळा माणहु ने, लखवा हयला माणहु ने अने एवा कंय भाती ना मंदवाड वाळा ने दुख मे पडला माणहु ने अने भुत लागला माणहु ने ईसुनां लावता हता अने तीहया आखा ने आरगा करतो हतो। 25 अने गलील जीला मे गेथा, दीकापुलीस मे गेथा, यस्सलेम गेथा, युहद्या मे गेथा, अने यरदन नंदी नी हेली धेडे गेथा, माणहु ना मोटा-मोटा टोळो ईसु पसळ आवता हता।

5 ईसु माणहु ना मेळा ने देखीन बडा पोर चड ज्यो, अने तां बह ज्यो। ता तीना चेला तीनीनां आया। 2 अने तीहयो तीमने आहयु केतो जायन हीकापण आपवा बाज ज्यो; 3 “जुगाळा से तीहया जे मन ना गरीब से! काहाके हरग नु राज तीमनुत से।” 4 “जुगाळा से तीहया, जे दुखी हयन रडे काहाके तीमने सांती जडहे।” 5 “जुगाळा से तीहया जे नीचळा से! काहाके आहयी धरती ना हकदारया से।” 6 “जुगाळा से तीहया, जे धरमीपणा ना भुकला अने तरहेला से! काहाके भगवान तीमने नीरहा कर देहे।” 7 “जुगाळा से तीहया, जे गीणाळ्ळा से! काहाके भगवान तीमनी पोर गीण करहे।” 8 “जुगाळा से तीहया, जीमना मन चोखला से! काहाके तीहया भगवान ने देखहे।” 9 “जुगाळा से तीहया, जे मेळ कराव्वा वाळा से! काहाके तीहया भगवान ना सोरा केवायहे।” 10 “जुगाळा से तीहया, जे धरमीपणा ना कारण दुख झेले, काहाके हरग नु राज तीमनुत से।” 11 “जुगाळा से तमु, जतयार माणहु मारीन करते तमारी नामबद्दी करे अने वेला पाडे, अने तमारी पोर आखी भातीन कुहराय करीन झुटो गुनो लगाडे। 12 तमु खुस रेजो अने खुसी मनावजो काहाके तमारी वाटु हरग मे घणु मोटु ईलाम से। काहाके आहयीत रीते भगवान वगे गेथा केण्या माणहु ने वेला पाडता हता।” 13 तमु धरती नु खारलु मीठु से। कदीम खारलु मीठु नु खारापण जत रेय, ता तीने कानी बी चीज वेर खासु नी कर सके, अने तीहयु कंय काम नु नी रेया। अने तीहयु बारथु नाख्वा अने माणहु ना पोग तळे कचरायवा वाटु से। 14 तमु कळी नु वीजाळु से। जे हेर बडा पोर वहलु से तीहयु हताये नी। 15 माणहु दीवो धपाडीन कांगणी तळे नी मेले, बाखीन दीवलाय पोर मेले, ता तीहयो दीवो आखा घोरल्या ने वीजाळु आपे। 16 दीवा नु वीजाळु नी तेम भवलीन तमार

भला काम बी माणहु अगळ उजन्ता हयवा देवो। तीनी सी तीहया तमारा भला काम ने देखीन हरगे वाळा तमारा भगवान बाह नी बडाय करे। 17 तमु ईसम ना हमजो के मुसान लीखली सास्तर ने अने भगवान वगे गेथा केण्या माणहुन सास्तर ने खततम करवा आवलो। मे तीमने खततम नी, बाखीन पुरी करवा आवलो से। 18 मे तमने हाचलीन केम, के जतयार लग हरग अने धरती खततम नी हय जाय, मुसा नी लीखली सास्तर ना बोल नी एकीक वात अने एकीक अकसर पुरो हया वगर नी टळे। 19 एतरे जे कोय आहया हुकम मे गेथा काना बी नान्ला हुकम ने पाळ्वा सोड देय, तीहयो हरग राज मे नानो केवायहे। पण जे कोय तीहया हुकम ने पाळ्वा करहे अने तीमने हीकाडहे, तीहयो हरग ना राज मे मोटो केवायहे। 20 मे तमने केम, कदीम तमु चोखली सास्तर हीकाडन्या गेथा अने फरीसी माणहु गेथा वदीन धरमपणा मे नी चालो ता तमु हरग राज मे नी भराय सके। 21 तमु हमळी लेदला से, तमारा आडा-बुडा ने आहयु केदलु हतु के मारजो नी, जे कोय मारहे ता कोरट-कचवरी मे नीयाव ना दाडे डंड नी लायक ठेरेहे। 22 पण मे तमने केम जे कोय आहफा ना भाय पोर रीह करहे तीने कोरट-कचवरी मे नीयाव ना दाडे डंड नी लायक ठेरेहे। अने कदीम कोय आहफा ना भाय ने रीकामा, केहे तीहयो मोटली पंचु मे डंड नी लायक ठेरेहे; अने जे कोय आहफा ना भाय ने ए गांडा, केहे तीहयो नरक नी आकठी नो डंड नी लायक ठेरेहे। (Geenna g1067) 23 कदीम तमु वेदी पोर आहफा नी भेट चडाववा लाय रया हय, अने तां हारीक तमने आहयु फोम आवे के मारा भाय ना मन मे मारी भणी गेथु कंय वीरोद से। 24 ता तु आहफा नी भेट तांत वेदी अगळ रेवा दीन पेले आहफा भाय हाते मेळ कर ले अने अब्तेण आवीन भेट ने चडावो। 25 तारो वेरी तने थाणा मे लीन जवा वखत वाट्येत हय, ता तीने छोटोत आहफा नो दोस्ततीदार बणाय ले कंखर तीहयो तने नीयाव करन्या ना हात मे कर देय, अने नीयाव करन्यो तने सीपायडा ना हात मे कर देय, अने सीपायडा तने जेल मे कुंड देय। 26 मे तने हाचलीन केम, तु जेल सी तां लग नी छुट सकतो जांह तक तु पाय-पाय नी आप देय। 27 तमु जाणो के आहयु केदलु से, छीनाळु नी करजो, 28 पण मे तमने केम, जे कोय कानी बयर भणी तीनी हाते छीनाळु करवा नो वीच्यार करीन देखे, ता तीहयो आहफा ना मन मे तीनी हाते छीनाळु कर लेदलो से। 29 कदीम तमारो जमण्यो डोळो तमने पाप करावे, ता तीने काडीन नाख देवो। काहाके वारु ते आहयुत से के तमारा डील मे ना एक अंग खट जाय, पण तमारु आखु डील नरक मे नी आकठी मे नी नखाये। (Geenna g1067) 30 अने कदीम तमारो जमण्यो हात पाप करे, ता तीने वाडीन नाख देवो; वारु आहयुत से के तमारा डील मे नु भले एक अंग खट जाय, पण तमारु आखु डील नरक मे नी नखाये। (Geenna g1067) 31 आहयु बी केदलु हतु के, जे कोय आहफा नी लाडी ने सोडे तीहयो तीने सोडवा नी चीट्टी लीखीन पुरावा भेळ आप देवा जोवे। 32 बाखीन मे तमने केम, छीनाळा नी वात ने सोडीन काना बी बीजा कारण सी, जे आहफा नी लाडी ने सोडे; ता तीहयो तीने छीनाळु करावे, अने जे कोय तीहयी छुटली बयर सी वेवा करे, तीहयो बी छीनाळु करे। 33 तमु आहयु बी हमळी रया के आडा-बुडा सी केदलु हतु के झुटी हाम नी खाजो, पण मालीक सी करली हाम ने पुरी करजो। 34 पण मे तमने केम हाम

नी खाजो। हरग नी हाम बी नी खाजो, काहाके हरग भगवान नी राजगदी से; 35 धरती नी हाम नी खाजो, काहाके तीहयी तीनो पोग मेलवानो नो पाटलो से। यस्सलेम नी हाम नी खाजो, काहाके यस्सलेम मोट्ला राजा नु हेर से। 36 अने आहफा ना मुंडा नी बी हाम नी खाजो, काहाके तमने मुंडा नो एक बी नीम्बाळा धोळा नीता काळा नी कराये। 37 कदीम तमारी वात “होव हय” ता “होव केजो” अने “नी” हय ता “नी” केजो। काहाके आनी गेथु वदु केय तीहयु बुराय मे गेथु से। 38 “तमु आहयु बी हमळी र्या के केदलु हतु के ‘एक डोळा बदले, एक डोळो, अने एक दात बदले, एक दात।’” 39 पण मे तमने केम, काना बी कुहरया माणेह नो वीरोद ना करो; पण कदीम कोय तमारा जमणा गाल्या पोर थापड देय, ता तीनी भणी बीजु गाल्यु बी फीरवी देवो। 40 कदीम कोय तारी पोर जोर करीन तमारु डगलु मांगे ता तीने आहफा नो कोट बी आप देवो। 41 अने कदीम कोय तमने जोर करीन एक कीलोमीटर ली जाय ता तीनी हाते बे कीलोमीटर चालीन जावो। 42 जे कोय तमारी पांह मांगे, ता तीने आप देवो, अने कोय तमारी पांह उदार मांगे, तीने नी ना केवो। 43 तमु हमळी र्या: केदलु हतु के आहफा ना हाते वाळा ने मोंग करो अने आहफा ना वेरी सी रीह राखो। 44 पण मे तमने केम, आहफा ना वेरी ने मोंग करो। अने जे कोय तमने वेला पाडे, तीमनी वाटु वीनती करो। 45 ईसम करीन तमु आहफा ना हरग वाळा भगवान बाह नी अवलयात बण जहु; काहाके तीहयो भोळा अने कुहरया बेम माणहु पोर आहफा नु दाडो उगाडे अने धरमी अने वण-धरमी बेम माणहु पोर पाणी पाडे। 46 कदीम तमु तीमनेत मोंग करो, जे तमने मोंग करे, ता तमने हु फोळ जडहे? एवो मोंग ते फाळो लेवा वाळा बी नी करे। 47 अने कदीम तमु आहफा ना भाय ने एतरोत वारु से, के करीन पुछो, ता तमु कानु मोटु काम कर रया? आडजातया माणहु ईसम नी करे हु? 48 एतरे तमु पुरा पाका बणो, जीसम तमारो हरग वाळो बाह पुरो पक्को से।

6 चेतीन रेवो! भगवान ने गमे तीहया धरम ना कामु ने माणहु अगळ देखाडवा करीन ना करो, ईसम करहु ता तमने हरग वाळा बाह भणी गेथो फोळ कदी नी जडे। 2 एतरे जतयार तमु काना गरीब दुखी ने दान आपो, ता तीहयी वात ने आखा अगळ ना केवो, जीसम के भक्ती ना घोरु अने गळी मे ढोंगडा करन्या माणहु बीजा पांह बडाय हात करवा करीन करे। मे तमने हाचलीन केम, तीमने तीमनी बडाय नी लारे पलेत फोळ जड जेलु से। 3 एतरे जतयार तमु दान आपो, ता तमारो डाखरयो हात आहयु नी जाणवा जोवे के तमारो जमणो हात हु करवा बाज रयो। 4 के तमारु दान हतायलु रहे। ता तमारो भगवान बाह जे तु हाताडीन करे तीने बी देखे, तीहयो तने तीनु ईलाम आपहे। 5 अने जतयार बी तमु वीनती करो, ता ढोंगडा करन्यान तेम ना करो। काहाके माणहु ने देखाडवा नी लेदे भक्ती ना घोर-घोर अने वाट ना मेळ्या पोर उबारिनी वीनती करवा तीमने वारु लागे। मे तमने हाचलीन केम, हीमनी बडाय नी लारे पलेत हीमने फोळ जड जेलु से। 6 पण जतयार तु वीनती करे, ता आहफा ना घोर मे जा अने झापलु दीन हतायत आपणा भगवान बाह सी वीनती कर। ततयार तारो बाह जे हतायत देखे, तने फोळ आपहे। 7 वीनती करती वखत आडजातयान तेम जादा बोलु नी केजो। काहाके तीहया आहयु सोचे के नाम्बी

वीनती करवा सी अमारी वीनती हमळहे। 8 एतरे तमु तीमनीन तेम ना बणो, काहाके तमारो बाह तमारी मांगवा सी पलेत जाणे के तमने हु-हु जरवत से। 9 एतरे ईसम वीनती करो, “ए अमारा बाह, तु जे हरग मे से तारु नाम चोखलु मनाये। 10 तारु राज आवे। तारी मरजी जीसम हरग मे पुरी हये, तेमेत आहयी धरती पोर बी पुरी हये। 11 दाडीन, आमने जोवे तेतरु खाणु आप्या कर। 12 अने जीसम आमु अमारा गुनेगार ने तीमना पाप ना लेदे माफी आपला से, तेमेत तु अमारा पाप ना लेदे आमने माफी आप; 13 अने जतयार पाप कराववा नी पारख आवे ता आमने पाप मे नी पडवा देजे, पण बुराय सी बचाड।” 14 कदीम तमु माणहु ने तीमना पाप नी लेदे तीमने माफी आपो, ता तमारो हरग वाळो बाह बी तमारा पाप नी लेदे तमने माफी आपहे 15 पण कदीम तमु माणहु ने तीमना पाप नी लेदे माफी नी आपो, ता तमारो हरग वाळो बाह बी तमारा पाप नी लेदे तमने माफी नी आपे। 16 जतयार तमु उपाह करो, ता ढोंगडा करन्यान तेम तमारा मोडा पोर नुरपाणी नी रय, काहाके तीहया आपणु मोडु बी नी धोवे, काहाके माणहु तीमने उपाह वाळो जाणे। मे तमने हाचलीन केम, के तीमने आपणु ईलाम जड जेलु से। 17 पण जतयार तु उपाह करे ता आहफा ना मुडे तेल लगाड अने मोडु धोव, 18 काहाके माणहु नी पण तारो बाह जे हरग मे से, तने उपाह वाळो जाणे। ईसम रेवा मे जे तारो बाह हतायत देखे, तने तीनो फोळ आपहे। 19 “आपणी जुगु धरती पोर धन एकठु ना करो, आजे ते कीडो अने वेदाय बगाडतला से, अने आजे चोटटा डाको डाले अने चोरी कर लेय। 20 पण आपणी जुगु हरग मे धन एकठु करो तां नी ते कीडो अने नी वेदाय बगाडे, अने तां चोटटा नी डाको डाले अने नी चोरी करे। 21 काहाके जां तमारु धन से तां तमारु मन बी लागलु रहे।” 22 “डील नो दीवो डोळा से: एतरे कदी तारा डोळा चोखा हय, ता तारु आखु डील बी वीजाळा मे रेहे। 23 पण कदी तारा डोळा चोखा नी हय, ता तारु आखु डील बी चोखलु नी रेहे; आनीन करते तीहयु वीजाळु जे तारी मे से कदी अंदारलु हय ता तीहयु अंदारलु कीसम मोटु हहे।” 24 काना बी माणेह ने बे मालीक नी चाकरी नी कराये; काहाके तीहयो एक मालीक सी हीगी करहे अने बीजा मालीक ने मोंग करहे; नीता एक मालीक हाते मेळीन रहे अने बीजा मालीक नो वाक काडहे। तमने भगवान नी अने धन-दवलत नी बेम नी सेवा नी कराये। 25 एतरे मे तमने केम के आहफाम ना जीव ना लेदे आहयी फीकर नी करजो के आमु हु खाहु अने हु पीहु; अने नीता आहफाम ना डील जुगु हु पेरहु। हु जीव खाणा सी, अने डील लुगडा सी मोटु नी हय हु? 26 वादळा मेना चडा ने देखो! तीहया नी वेरे, नी वाडे, अने नी मोहटी मे भेळु करे, ते बी तमारो हरग वाळो बाह तीमने खवाडे। हु तमु तीमनी सी जादा कीमत नी राखो? 27 तमारी मे गेथु आसम कोय से, जे फीकर करीन आहफा नी जीवाय नी अमाळ बी उमर बडाय सके? 28 “अने लुगडा जुगु हुका फीकर करो? जंगल मे ना फुलु पोर ध्यान करो, के तीहया कीसम वदे, तीहया नी ते मेहनत करे, नी ते लुगडा बणावे। 29 ते बी मे तमने हाचलीन केम के सुलेमान आहफा नी बडाय मे तीमनी मायन कोयने तेम लुगडा पेरलो नी हतो। 30 एतरे जतयार भगवान चोवगान ना चारा ने, जे आज से, अने काले आकठा मे नाख देहु, एवा लुगडा पेरवे, ता ए वण-भरहा वाळा, तमने तीहयो काहा नी पेरवे? 31 एतरे तमु

फीकर करीन आहयु नी केजो, के आम् हु खाहु, अने हु पीहु अने हु पेरहु। 32 काहाके आडजात्या आहयी आखी चीज नी होद मे रेय, अने तमारा हरग वाळो बाह जाणे, के तने आहयी आखी चीज जोवे। 33 एतरे पेले तमु भगवान ना राज नी अने धरमीपणा नी होद करो ता आहयी आखी चीज तमने जड जहे। 34 एतरे काले नी फीकर ना करो, काहाके काले नो दाडो आहफा नी फीकर आहफो कर लेहे; आज नी लेदे आज नोत दुख ढेरत से।

7 “गुनो ना लगाडो, ता गुनो तमारी पोर बी नी लगाडे। 2 काहाके जे रीते तमु गुनो लगाडो, तीहयी रीते तमारी पोर बी गुनो लगाडहे; अने जे माप सी तमु मापहु, ते माप सी तमारी वाटु बी मपायहे।” 3 “तु हुका तारा भाय ना डोळा मे वाळु कचरु देखे, अने तारा डोळा मे वाळु खटकु तने नी देखातु। 4 तु तारा भाय ने कीकम की सकतलो, ‘लाव’ मे तारा डोळा मे गेथु कचरु नीकाळ देम, पण देख, खटकु ते तारा डोळा मे से?” 5 ए ढोंगडा करन्या, पेले आहफा ना डोळा मे वाळु खटकु नीकाळ ले, ता तारा भाय ना डोळा मे वाळु कचरु नीकाळवा करीन वारु देख सकही। 6 “चोखली चीज कुतरा ने ना आपो, अने आहफाम ना मोती हुवरया ना अगळ ना नाखो, कंखर ईसम नी हय जाय के तीहया तीने तीमना पोगु तळे डाबहे अने पासा फीरीन तमने फाड देहे।” 7 मांगहु ता तमने आपहे, होदहु ता जडहे; झापलु ठोकहु, ता तमारी वाटु उगाडहे। 8 काहाके जे कोय मांगे, तीने आपे; अने जे होदे, तीने जडे; अने जे झापलु ठोके, तीनी जुगु झापलु उगाडहे। 9 तमारी मायन एवो कानो माणेह से, कदीम तीनो सोरो तीनी पांह रोट्लो मांगे, ता तीने दगडो आपे? 10 अने माछला मांगे, ता तीने गडहो आपे? 11 कदीम तमु गांडा हयन, बी तमारा सोरा ने वारली चीज आपवा जाणे, ता तमारा हरग वाळो बाह बी मांगवा वाळा ने वारली चीज काहा नी आपहे? 12 अने जे वेहवार नी हेर तमु बीजा सी कर रया; तीहयो वेहवार तमु बीजा हाते बी करया करो; काहाके मुसा नो नेम अने भगवान वगे गेथा केणया नी हीकापण आहयी से? 13 हाकडला झापले मायन चालो, काहाके चवडलो रोहो से तीहयो रोहो अळी वारु से तीहयो रोहो नास भणी लीजतलो से; अने ढेरत से जे तीनी सी चालतला से। 14 काहाके हाकडु से तीहयु झापलु अने काठो से तीहयो रोहो जे जीव ने तां ली जाय; अने थोडाक से जे तीने हात करे। 15 “झुटा भगवान वगे गेथी वात केणया माणहु सी चेतनी रेवो, अने जे गाडरान तेम तमारी हाते आवे, पण अळतेण फाडवा वाळा लेंड्या से। 16 तीना फोळ सी तमु तीने ओळखी लेहु। माणहु कटाळस्या झाटवा सी अंगुर, नीता गोखरा काटान वेले गेथा गुलर तोडे हु। 17 एमेत कानु बी वारलु झाड वारलु फोळ लावे अने रीकामा झाड खोडलो फोळ लावे। 18 वारलु झाड खोडलु फोळ कदी नी लावे, अने नी खोडलु झाड वारलु फोळ लावे। 19 जे-जे झाड वारलु फोळ नी लावे तीहया झाड ने वाडीन आकठु मे नाखे। 20 ता तीमना फोळ सी तमु तीमने ओळखी लेहु।” 21 जे मने “ए मालीक! ए मालीक! केय, तीमनी मायन कोय बी हरग राज मे भराय नी सके, पण तीहया एतरा जे मारा हरग वाळा बाह नी मरजी पोर चाले।” 22 तीहया नीयाव ना दाडे घणा ढेरका माणहु मने केहे, मालीक! आम् तारु नाम लीन भगवान वगे गेथी वात नी केदा हु? तारु नाम लीन भुते ने नी नीकाळ्या हु? अने तारु नाम लीन सकती ना काम नी करया हु? 23

ततयार मे तीमने चोखुझण की देही, “मे तमने नी ओळखु। ए पाप करन्या! मारीनतां गेथा सेटा हय जावो।” 24 जे मारी आहयी वात ने हमळीन तीनीन तेम जीवे, तीहयो तीना हमजदार माणेह ने तेम से, जे आहफा नु घोर चाफरया पोर वारु पायो खोदीन बणायो। 25 पाणी पड्यो, अने नंदी आवी, अने आंजी बी आवी अने तीना घोर ने अफठायी। ते बी तीहयो घोर नी ओदरयु; काहाके तीनो नीव चाफरया मे खोदीन बणावलु हुतु। 26 जे मारी आहयी वात हमळीन तीनीन तेम नी जीवे, तीहयो तीहया वण-अकल्या माणेह हरको से, जे रेत पोर पायो खोदीन आहफा नु घोर बणायो। 27 पाणी पड्यो, नंदी आवी, अने आंजी बी आवी अने तीना घोर ने अफठायी। तीहयु घोर ओदरी ज्यु अने खततम हय ज्यु। 28 जतयार ईसु आहयी वात की देदो, ता माणहु तीनी हीकापण हमळीन वहराय जया। 29 काहाके तीहयो चोखली सास्तर हीकाडनयान तेम नी, पण एक अदीकारनी तेम हीकापण आप्तो हतो।

8 जतयार ईसु तीहया बडा पोर गेथो हेटो उतरयो। ता एक घणो मोटो माणहु नो मेळो तीनी पसळ चाल पड्यो। 2 अने एक कुडावो माणेह ईसुनतां आयो अने तीहयो तीना पोगे पडीन वांदयो अने वीनती करयो, “ए मालीक। कदीम तारी मरजी हय ता मने चोखो कर दे।” 3 ईसु हात अगो करीन ईसम केतो जीन तीने छीमयो, मारी मरजी बी आहयी से के तु वारु हयन चोखो हय जा। अने ततयास्त तीहयो वारु हयन चोखो हय ज्यो। 4 अने ईसु तीने केदो, हमळ आत्रे जे हयु तीहयु कोयने नी केजे। पण पुंजारानतां जा, अने आहफा नु डील ने देखाडजे। अने मुसा ना कायदान लारे तीने भेट चडावजे; ता आखा माणहु जाणीन गवा बण जहे। 5 जतयार ईसु कफरनहुम हेर मे आयो, ता तीनीनतां एक रोमी राज नो सुबेदार आयो अने तीनी सी वीनती करयो, 6 “ए मालीक मारा पावोर ने लखवा नी बीमारी हय री, अने तीने वेला हय री तीहयो घोर मे दुखी हयन पड र्यो।” 7 ईसु तीने केदो, “मे आवीन तीने आरगो कर देही।” 8 सुबेदार केदो, “ए मालीक मे एतरो वारु नी हय के तु मारा घोर आवे। पण तु एकीत बोल कीदे ता मारो पावोर आरगो हय जहे।” 9 मे आहयी वात जाणु काहाके मे बी एक अदीकार्यो से, अने मारा हात मे सीपायडा रय। जतयार मे एक ने केम “जा” ता तीहयो जाय अने बीजा ने, आव, केय, ता तीहयो आवे अने मारा पावरया ने, आहयु कर, केम ता, तीहयो तीहयुत करे। 10 ईसु आहयु हमळीन वहराय ज्यो अने तीहयो आहफा नी पसळ आवणया ने केदो, मे तमने हाचलीन केम, मे ईसरायली माणहु मे बी कोयने एतरो मोटो भरहो करतलो नी देख्यो। 11 मे तमने केम, ढेरत आडजात्या माणहु उगवणा अने बुडवणा गेथा आवीन अब्राहम, ईसाक अने याकुब भेळता हरग राज मे बठहे। 12 पण राज्य नी अवलयात ने बारथा अंदारला मे नाख देहे: तां रडहे अने दातु ककडावता रहे। 13 अने सुबेदार ने ईसु केदो, जा जीसम तु भरहो करलो से, तेमेत तारी जुगु हय जाय। अने तेतरी घडी तीनो पावोर आरगो हय ज्यो। 14 पतरस ना घोर ईसु पुग्यो, ता तां पतरस नी हाहु ने ताव चड रेलो देख्यो। 15 ईसु तीनो हात छीमयो, अने तीनो ताव उतर ज्यो, अने तीहयी उठीन तीमनी चाकरी करवा बाज ज्यी। 16 हान्ती टेमे माणहु, भुत लागला ढेरत माणहु ने ईसुनतां लाया। ईसु एकीत बोल

कीन भुत ने माणहु मे गेथा नीकाळ्यो अने आखा मांदला ने वारु करयो। 17 भगवान बगे गेथी बात केणया यसाया नी बात पुरी करवा करीन आहयु आखु हयु, तीहयो आखु लीखलो हतो: तीहयो अमारी आखी लुलखाय ने झेल लेदो, अने अमारी मंदवाड ने सेटी कर देदो। 18 ईसु आहफान नी च्यारो-मेर एक मोटलो मेळो देखीन चेला ने दर्या नी हेली धेडे जवा नो हुकम आप्यो। 19 तेतरी घडी एक चोखलु सासतर हीकाडन्यो आवीन ईसु ने केदो, मासतर! तु जां बी जही, तां-तां मे तारी पसळ आवही। 20 ईसु तीने केदो, लेंड्या जुगु रेवा करीन तीमना दोर से अने हरग ना चडा जुगु तीमना पोतरा से, पण मनख्या ना सोरा जुगु मुंडु मेलवा लग जागो नी हय। 21 चेला मे गेथो एक चेलो केदो, “ए मालीक मे तारी पसळ आवही, पण मने पेले मारा बाह ने गाडवा करीन जवा दे।” 22 पण ईसु तीहया चेला ने केदो, मरला ने मरला माणहु गाडहे पण तु मार हाते चाल। 23 जतयार ईसु दुंड्या मे बह ज्यो ता तीना चेला बी हाते बह जया। 24 अने तीहयी वखत दर्या मे उचकाहलुत घण-जबर आंजी आयी, अने दर्या नी झलक दुंड्ये अफठायन दुंड्या ने घेरवी री हती। पण ईसु हुक्वा बाज र्यो हतो। 25 चेला हाते आवीन ईसु ने जगाड्या अने केदा, मालीक आमने बचाड! आमु मरवा बाज रया। 26 ईसु तीमने केदो, ए, वण-भरह्या! तमु एतरी जबर हुका बीही रया? अळतेण तीहयो आंजी अने पाणी ने वड्यो अने आखु धीरु पड ज्यु। 27 आहयु देखीन तीहया वहराय जया, अने केदा, आहयो केवो माणेह से के आंजी अने दर्या लग हुकम माने। 28 जतयार ईसु दर्या नी हेली धेडे गदरेनीया देस मे पुग्यो, ता भुत चोटला बे अदमी मडाट्या मे गेथा नीकाळीन ईसुनां आया। तीहया एतरा आकरा हता के तीहयी वाट्ये कोयने बी नी अवायतु-जवायतु हतु। 29 तीहया आडीन केदा, “ए भगवान ना सोरा! अमारी हाते तारु हु काम से? टेम नी आयी अने पेले गेथोत आमने वेला पाडवा आय रयो हु?” 30 तां गेथो थोडोके सेटो हुवर्या नो एक टोळो चरवा बाज रयो हतो। 31 भुत आहयु केता जायन वीनती करया, कदीम तु आमने नीकाळवा बाज रयो, ता आमने हुवरया ना हेला टोळा मे मोकली दे। 32 ईसु तीमने हुकम आपीन केदो, जावो ता भुत तीहया माणहु मे गेथा नीकाळीन हुवरया मे भराय जया अने तीहया आडखे गेथा दर्या मे कुद पड्या अने पाणी मे डुबीन मर जया। 33 अने हुवरया ने चारन्या नाही पड्या, अने तीहया जे हयु तीहयु आखु हेर मे जायन की देदा। अने भुत चोटला माणहु नु हु हयु तीहयु बी की देदा। 34 अने हेर ना आखा माणहु ईसु ने भेटवा आया, अने जतयार तीहया ईसु ने देखया ता तीनी सी वीनती करया, तु अमारा देस मे गेथो जत रे।

9 अळतेण ईसु दुंड्या मे बह ज्यो अने दर्या नी हेली धेडे तीना हेर मे आयो। 2 तीहयी वखत थोडाक माणहु, लखवा मे पडला एक माणेह ने खाटला मे हुवाडीन ईसुनां लाया। तीमनो भरहो देखीन ईसु तीहया लखवा मे पडला ने हुकम आपीन केदो, सोरा, हीममत राख! तारा पाप नी लेदे तने माफी जड जी। 3 थोडाक युहदी-धरम हीकाडन्या मन मे वीच्यारया, हीययो ते भगवान नो वाक काडे। 4 तीमना मन ना वीच्यार जाणीन ईसु तीमने केदो, तमु तमारा मन मे एवा बुरा वीच्यार काहा कर रया? 5 जादा वारु हु से? “तारा पाप नी लेदे तने माफी जड जी केवा वारु से के, ‘उठीन तारु खाटलु उचलीन

चाल केवा वारु से?’” 6 पण मे आहयु आसम करीन की रयो के तमु आहयु जाण लेवो के मनख्या ना सोरा ने धरती पोर पाप नी लेदे माणहु ने माफी आपवा नो बी हक से। अळतेण ईसु लखवा मे पडला माणेह ने केदो, “उठ अने तारु खाटलु उचलीन तारा घोर जत रे।” 7 अने तीहयो उठीन तीना घोर जत रयो। 8 आहयु देखीन माणहु बीह जया, अने तीहया भगवान ना गुण गावीन बडाय करवा बाज जया, जे माणेह ने ईसम हक आपयो। 9 ईसु तां गेथो अगो ज्यो, अने तीहयो मत्ती नाम ना एक माणेह ने फाळो लेवा ना नाका पोर बह रेलो देखयो, अने तीने केदो, मारी हाते चाल। अने तीहयो उठीन तीनी हाते चाल पड्यो। 10 एक दाडो ईसु आहफा ना चेला हाते मत्ती ना घोर मे खाणु, खावा बहयो अने घणा ढेरका फाळो लेणया अने बीजा पापी आवीन तीनी हाते खाणु खावा बाज रया हता। 11 अने आहयु देखीन फरीसी पंथवाळा ईसु ना चेला ने केदा, तमारो मासतर फाळो लेणया अने बीजा पापी भेळतो खाणु काहा खाय? 12 ईसु आहयु हमळीन तीमने केदो, “आरगला ने दाक्टर नी जोवे, पण मांदला ने दाक्टर जोवे।” 13 एतरे जायन चोखली सासतर मे लीखली आहयी वात ने हीक लेवो के मने बादा नी जोवती, पण गीण जोय री ईसु मतलब हु से, काहाके मे धरमी माणहु ने नी, पण पापी माणहु ने बोलाववा आवलो से। 14 अळतेण बपतीसमा आपणया युहनता ना चेला ईसुनां आया, अने आहयु केदा, आमु अने फरीसी पंथवाळा उपाह करया। पण तारा चेला उपाह काहा नी करता? 15 ईसु तीमने केदो, जतयार तक लाडो हाते से, ततयार तक वरातया दुखी हयहे हु? बाखीन तीहया दाडा बी आवहे जतयार लाडो तीमनीनां गेथो सेटो हय जाय, ता तीहया उपाह करहे। 16 नवलु थिंगळ जुनला लुगडा पोर कोय नी लगाडे; काहाके लुगडु धोवहे, ता तीहयो नवलु थिंगळ उहटी जहे, अने जुनला लुगडा ने हापकीन जादा फाड देहे। 17 अने नवला अंगुर नो रोह, जुनला चामडा ना कवड्या मे कोय नी भरे, नीता अंगुर नो रोह चामडा ना कवड्या ने फाड देहे। अने आसम करीन अंगुर नो रोह वय जहे अने चामडा नो कवड्यो बी बगडी जहे। करीन नवला अंगुर नो रोह नवला चामडा ना कवड्या मे भरे। अने तीहया बेम बचला रेहे। 18 ईसु तीमने आहयी वात केवात बाज रेलो हतो, के मुखयो माणेह आयो अने तीहयो हुंगो वळीन ईसु सी वीनती कर्यो, मारी सोरी हमणे मर जेली से। पण आवीन तीनी पोर हात मेक, अने तीहयी जीवती हय जहे। 19 ईसु उठीन आहफा ना चेला भेळतो तीनी पसळ चाल पड्यो। 20 अने देखो, एक बयर ने बारे साल नो पोगराळो दुख हतो, अने तीहयी पसळ गेथी आवीन ईसु ना लुगडा ना छेडा ने सीम लेदी। 21 काहाके तीहयी आहफी ना मन मे केती हती, “कदीम मे ईसु ना लुगडा ने बी सीम लेही ता मे आरगी हय जही।” 22 ईसु पासो फीरीन तीने देखयो अने केदो, “बेटी हीममत राख; तारो भरहो तने वारु करलो से।” अळतेण तीहयी बयर तत्यास्त वारु हय जी। 23 जतयार ईसु तीहया मुख्या ना घोर मे पुग्यो अने फेपारया वगाडवा वाळा अने रडवा बाज रेला देखयो ता केदो। 24 ईसु तीमने केदो, “सेटा हय जावो, सोरी मरी नी, पण हुक्वा बाज री।” आसम केदो एतरोत अने तीहया ईसु नी हाही उडाडवा बाज जया। 25 पण जतयार माणहु नी गडदी ने बारी नीकाळ देदा। ता ईसु घोर मे जायन सोरी नो हात धर्यो, अने तीहयी उठीन बह जी। 26 अने

आहयी वात नी खबर तीहया आखा देस मे फेल जी। 27 जतयार ईसु तां गेथो अगो ज्यो, ता बे आंदळा ईसु पसळ आसम आडता जायन चाल पड्या, “ए दावुद नी अवलयात, अमारी पोर दया कर।” 28 जतयार तीहयो घोर मे पुग्यो, ता तीहया आंदळा ईसु हाते आया, अने ईसु तीमने केदो, “के तमारो भरहो से के मे तमने वारु कर सकतलो से?” तीहयो ईसु ने केदो, “होव, मालीक!” 29 ततयार ईसु तीमना डोळा सीमीन केदो, “तमारा भरहा नी लारे तमारी वाटु हय जाया।” 30 अने तीमना डोळा उगडी ज्या अने ईसु तीमने चेतावीन केदो, “चेतीन रेवो। कोय आहयी वात ने नी जाणे।” 31 पण तीहयो नीकळीन आखा देस मे तीहयी वात फेलाड देदो। 32 जतयार तीहयो बारो जवा बाज रयो हतो, ता देखो, माणहु एक गुंगा ने भुत लागलो हतो, ईसुनां लाया; 33 अने जतयार भुत ने नीकाळ देदलो, ता गुंगो बोलवा बाज ज्यो। अने माणहु नी गडदी वहरायन केवा बाज जी, “ईसुरायल देस मे एवु कदी नी देख्या।” 34 पण फरीसी पंथवाळा केदा, “आहयो ते भुत ना डायला नी लारे भुत ने नीकाळतलो से।” 35 ईसु आखा हेर मे अने गाम मे फिरतो र्यो अने युहदया ना भक्ती ना घोरे मे माणहु ने हीकाडतो र्यो, अने भगवान ना राज नी खुस-खबर नो परच्यार करतो र्यो, अने आखी भातीन मंदवाड ने अने लुलखाय ने सेटी करतो र्यो। 36 जतयार ईसु गडदी ने देख्यो ता ईसु तीमनी पोर दया कर्यो, काहाके तीहया तीना गाडरान तेवा हता, तीमनो कोय गुवाळ्यो नी हतो, घबरायला हता अने भटकी जेला हता। 37 ततयार ईसु आहफा चेला ने केदो, “मेर ते घणी से, पण मेर वाडवा वाळा दाडक्या थोडाक से। 38 एतरे मेर ना मालीक सी वीनती करो के तीहयो आहफा नी मेर वाडवा करीन दाडक्या मोकल देय।”

10 ईसु आहफा ना बारे चेला ने बोलायो अने वीटळळा आतमाम ने काडवा नो हक आप्यो, अने आखा भातीन मांदला ने आरगा करवा अने आखी लुलखाय सेटी करवा नो हक आप्यो। 2 बारे नेवताळा ना नाम आहया से: पेलो सीमोन, जे पतरस केवाये, अने पतरस नो भाय अंदरयास; अने जबदी नो सोरो याकुब अने याकुब नो भाय युहननो; 3 अने फीलीपुस, अने बरतुलमे, अने थोमस, अने फाळो लेण्यो मत्ती; अने हलफाय नो सोरो याकुब, अने तददे; 4 सीमोन कनानी, अने यहदा ईसकरीयोती, जे ईसु ने धरायो। 5 ईसु बारे जणा ने आहयो हुकम आपीन मोकलयो, “आडजात्या माणहु भणी नी जजो, अने सामरी माणहु ना हेर मे नी जजो। 6 पण ईसुरायली जाती ना तीहया माणहु मे जावो, जे खोवायला गाडरान तेम हय जेला से। 7 अने वाट्ये चालता जायन ज्योरे आडीन ईसम परच्यार करो के हरग राज हाते आय जेलु से। 8 मांदला ने आरगा करो, मरला ने जीवाडो, कुडावा ने आरगा करीन चोखा करो, भुत ने नीकाळो। तमने फोकट मे संयबरकत जडली से, एतरे आप देवो। 9 तमारी कोथळी मे होना ना, चांदी ना अने ताम्बा ना, पयहा लग नी लीज्जो। 10 परच्यार करवा जाय ता, तमारी वाटु झोलो, बे डगला, खाहडा, अने डीगा नी लीज्जो; काहाके दाडक्या ने खावा नु हक से।” 11 तमु काना बी हेर नीता गाम मे जावो, ता तां पुगीन एक मदत करवा लायक माणेह नो पतो लगाडो, अने तां गेथा जता लग तीनीनतां रेवो। 12 जीना बी घोर मे तमु जावो ता केजो, “आहया घोर ना माणहु ने सांती अने संयबरकत

जडे।” 13 कदीम तीना घोर ना माणहु सांती नी संयबरकत हात करे एवा हय ता सांती नी संयबरकत तीमनी पांह रेहे, पण तीमने सांती नी संयबरकत नी जोवती हय, ता सांती नी संयबरकत पासी आवती रेहे। 14 कदीम कोय तमारो आव-भाव नी करे, अने तमारी वात नी हमळे, ता तीना घोर मे गेथा, नीता तीना हेर मे गेथा नीकळे ता तमारा पोग नो कादो झटकी देजो। 15 मे तमने हाचलीन केम, “नीयाव ना दाडे सदोम अने अमोरा देस ना माणहु गेथी बी तीहया देस ना माणहु ने जादा डंड जडहे।” 16 देखो, मे तमने लेंड्या हरको माणहुन वच मे गाडरान तेम मोकलु। एतरे गडहा ने तेम कदरया अने पारवान तेम खरला बणो। 17 “माणहु सी चेतीन रेवो। तीहया तमने हडका देवा करीन भगवान ना भक्ती ना घोर मे लीजहे, अने पंचु अगळ ली जायन हडका देहे। 18 तमु मने मान रया करीन तमने राज करन्या, अने राजा अगळ लीजहे, अने ईसम करीन तमु आडजात्या अगळ मारा गवा बणहु। 19 जतयार तीहया तमने सीपायडा ना हात मे होप देय, ता फीकर नी करजो के आम हु केहु। काहाके तमने हु केवा जोवे तीहयो भगवान तीहयी टेमे की देहे। 20 काहाके बोलवा वाळा तमु नी हय, पण भगवान बाह नी आत्मा से, जे तमारा मन मे गेथी बोलहे।” 21 तीहया दाडा मे भाय आहफा ना भाय ने मराय नाखे अने बाह आहफा ना सोरा-सोरी ने धराय देहे अने सोरा-सोरी आय्ह-बाहा ना वीरोद मे हय जहे अने तीमने मराय नाखे। 22 मारा नाम ना कारण आखा माणहु तमारी सी हीगी करहे, पण जे मरते लग गम खाहे, तीमने छुटकारो जडहे। 23 कदीम तीहया तमने एक हेर मे वेला पाडे ता बीजा हेर मे नाह जजो। काहाके मे तमने हाचलीन केम, तमने ईसुरायली देस ना आखा हेर मे फिरते-फिरते मनखया नो सोरो आय लागहे। 24 “चेलो, मास्तर गेथो मोटो नी हय अने चाकर्यो मालीक गेथो मोटो नी हय। 25 चेला ने मास्तर बराबर अने पावरया ने मालीक बराबर हयवान घणु से; जतयार तीहयो घोर ना मालीक ने बालजबुल केदो ता तीहया घोर वाळा ने काहा नी केय?” 26 एतरे माणहु सी ना बीहो। ईसम कंय बी ढकायलु नी हय, जे वीजाळा मे नी लवाये, अने ईसम कंय बी हतायलु नी हय, जे उजनतु नी हय। 27 मे तमने जे कंय अंदारला मे केम, तीने तमु वीजाळा मे हमळावो। अने जे कंय तमने होगोत केदलो से तीहयु तमु घोर ना पडाळ पोर चडीन ज्योरेत परच्यार करो। 28 तीमनी सी ना बीहो जे डील ने मार नाखे पण जीव ने नी मार सके; बाखीन तीनी सी बीहो, जे डील अने जीव बेम ने नरक मे कर सके। (Geenna 9:1067) 29 एक पयहा मे बे घंचडी वेचाय, ते बी तमारा बाह नी मरजी वगर तीमनी मायन एक बी धरती पोर पडीन नी मरे। 30 तमारा मुंडा ना एक-एक नीम्बाळा गणायला से। 31 एतरे ना बीहो। तमु ढेरत घंचडा गेथा मोगा से। 32 “जे मने माणहु अगळ मान लेहे। तीने मे बी मारा हरग वाळा बाह अगळ मान लेही। 33 अने जे मने माणहु अगळ नीकारो करहे, तीने मे बी मारा हरग वाळा बाह अगळ नीकारो करही।” 34 “आहयु ना हमजो के मे धरती पोर सांती लीन आवलो से। मे सांती लीन नी आयो बाखीन तलवार लीन आवलो से।” 35 मे आनीन करीन आवलो से के बेटा ने बाह ना वीरोद मे करवा, अने ववेह ने हाहु ना वीरोद मे करवा करीन आवलो से। 36 माणेह ना वेरी तीना घोर वाळा बण जहे। 37 “जे बेटो आहफा ना बाह ने नीता आहफा नी आय्ह ने मार गेथो जादा मोग

करे, तीहयो मारी लायक नी हय। अने जे बी बाह बेटा ने नीता बेटी ने मारी गेथो जादा मोग करे तीहयो मार लायक नी हय। 38 जे कोय आहफा ना दुख नु कुस्स उचलीन मार पसळ नी चाले, तीहयो मार लायक नी हय। 39 जे आहफा नो जीव बचाडवा हीडे, तीहयो आहफा ना जीव ने खोय देय; अने जे मारीन करते आहफा नो जीव खोय नाखहे, तीहयो आहफा ना जीव ने बचाड लेहे। 40 जे तमार आव-भाव करे, तीहयो मारो आव-भाव करे, अने जे मारो आव-भाव करे, तीहयो तने मोकलन्या नो आव-भाव करे। 41 जे भगवान वगे गेथी वात केणया माणह नो आनीन करते आव-भाव करे के तीहयो भगवान वगे गेथी वात केणयो माणेह से, ता तीने भगवान वगे गेथी वात केणया ना ईलाम ने तेवुत ईलाम जडे। अने जे धरमी नो आनी करते आव-भाव करे के तीहयो धरमी से, ता तीने भगवान वगे गेथी वात केणया माणह ना ईलाम ने तेवुत ईलाम जडहे। 42 अने जे कोय आहया नान्ला हदला चेला मायन काना एक ने पीवा करीन टाडलु पाणी आसम करीन आपहे के तीहयो मारो चेलो से, ता मे तमने हाचलीन केम के तीहयो आहफा नु ईलाम हात करहेन करहे।

11 जतयार ईसू आहफा ना बारे चेला ने आहथी हीकापण आप चुक्यो अने गलील जीला ना हेर-हेर मे हीकापण आपतो, अने परचयार करते जायन तां गेथो जत रयो। 2 जतयार युहन्नो जेल मे रीन ईसू मसीन काम ना बारा मे खबर हमळीन अने आहफा ना चेला ने तीने आहयु पुरवा मोकल्यो, 3 “हु आव्वा वाळो तुत से नीता आमु बीजा नी वाट जोवया?” 4 ईसू तीने जपाप आप्यो, “जे कंय तमु हमळो अने देखो तीहयु आखु जायन युहन्ना ने की देजो, 5 के आंदळा देखे, अने लंगडा चाले, कुडावा आरगा हये, बेरा हमळे मरला जीवता हये, गरीब ने खुस-खबर हमळायो। 6 अने जुगाळो से तीहयो, जे मारी कारण सी ठोकर नी खाय?” 7 जतयार तीहया तां गेथा चाल पड्या, ता ईसू युहन्ना ना बारा मे माणह ने केवा बाज ज्यो, “तमु बडा मे हु देखवा जेला हता? के वाहळु मे हीलतला वाहणया ने? 8 अळी तमु हु देखवा जेला हता? के नरम लुगडा पेरला माणेह ने? देखो, जे नरम लुगडा पेर, तीहया राजा नी हवेली मे रेया। 9 ता अळी काहा जेला हता? भगवान वगे गेथा केणया माणेह ने देखवा करीन जेला हु? होव, मे तमने केम के भगवान वगे गेथा केणया गेथा बी मोट्ला माणेह ने देखवा जेला। 10 आहयो तीहयत से, जीना बारा मे लीखलु से; के देख; मे मारा हरगदुत ने तार गेथो अगळ मोकलही। तीहयो तार अगळ तार जुग रोहो तीयार करहे। 11 मे तमने हाचलीन केम के, जे आहय सी पयदा हयलो से, तीमनी मे गेथो युहन्ना बपतीसमा आपवा वाळा सी कोय मोटो नी हय, पण जे हरग राज मे नाना सी नानो से तीहयो बपतीसमा आपणया युहन्ना गेथो मोटो से। 12 युहन्ना बपतीसमा आपण्यो आयो तां गेथात आज तक माणह हरग राज मे ताखत भेळ भरायता रेता हता, अने ताखत वाळा तीने हापकी लेता हता। 13 भगवान वगे गेथी वात केणयो माणेह अने मुसा नी लारे लीखली सास्तर, बपतीसमा आपणया युहन्ना ने आव्वा नी पेलेत भगवान वगे गेथी वात केता हता। 14 कदीम तमने जोवे ता मानो के एलीया जे आव्वा वाळो हतो तीहयो आहयो युहन्नो से। 15 जीना कानटा हय, तीहयो हमळी लेय। 16 मे आहथी पीडी ना माणह नी बराबरी मे कोय सी करू? तीहया हाट मे बहला तीहया सोराम नी

तेवा से, जे एक-बीजा सी आडीन केता हता, 17 के आमु ते तमारी वाटु पीहो वगाड्या, अने तमु नी नाच्या; आमु ते दुखी हया, अने तमु छाती नी पीट्या। 18 काहाके बपतीसमा आपण्यो युहन्नो नी ते रोट्ला खातो हतो अने नी पीतो हतो, अने तीहया केता हता के तीनी मे भुत से। 19 माणह नु सोरो खातो-पीतो आयो, अने तीहयो केतो हतो के देखो, “खादइयो अने दारकुटो माणेह, फाळो लेणया अने पापी नो दोसतीदार से। पण जे माणह ने भगवान नी अक्कल हीकाडे तीहया खरला से।” 20 ता ईसू तीहया हेर ना माणह ने खीजवायन वडवा बाज ज्यो, तां हारीक ईसू डेरत जुदा-काम करयो पण तीहया आहया काम देखीन बी पाप भणी गेथा मन फीरवीन भगवान वगा नी वळ्या। 21 ए खराजीन हेर! ए बेतसेदा! तमारी वाटु दुख नी वात से; देख, जे सकृती ना काम तमारी मे करयो, तीहया सर अने सेदा मे करतो, ता तीहया ठेला ओडीन अने रोखडा मे बहीन पापु भणी गेथा मन फीरवीन भगवान वगा वळ जता। 22 एतरे मे तमने केम नीयाव ना दाडे तमारी हालत सर हेर अने सेदा हेर नी हालत सी बी जादा वेठवा जुगु हयहे। 23 “अने ए कफरनहम! हु तु हरगे लग उचु हयही? नी! तु ते पताळ मे लग हेटो जही; जे सकृती ना काम तारी मे करला से, कदीम तीहया सदोम मे करतो, ता तीहया आज लग बणीन रेता। (Hadēs g86) 24 एतरे मे तमने केम, नीयाव ना दाडे तमने सदोम गेथो जादा डंड जडहे।” 25 तीहथी टेमे ईसू केदो, “बाह! हरग अने धरती ना मालीक! मे तारा गुण गावु; काहाके तु आहथी आखी वात ने अक्कल वाळा अने भणला माणह गेथी हताडीन भोळा सोरा हरका माणह अगळ उजन्ती करयो। 26 होव बाह! तु आनी करते आसम करयो काहाके तने आहयुत वारु लाग्यु।” 27 “मारो बाह, मने आखु कंय आप देदलो से। बाह ने सोडीन कोय बी बेटा ने नी जाणतु। आहथीत रीते बेटा ने सोडीन बाह ने कोय नी जाणतु। अने तीहयो एतरोत बाह ने जाणे, जीमनी पोर बेटो बाह ने उजन्तो करे।” 28 “ए आखा काम करीन थाकला अने भार मे डबायला माणह मारीन्तां आवो, मे तमने अराम आपही। 29 मारो वळो आहफा पोर मेक लेवो अने मार सी हीको, काहाके मे नीचळो अने मन मे गरीब से। अने तमु तमारा मन मे अराम हात करहु, 30 काहाके मारो वळो वारु से, अने मारो भार फवरलो से।”

12 ईसू काना अराम ना दाडे गम ना खेतर मायन जवा बाज रेलो। ता तीमना चेलाम ने भुक लागी, अने तीहया उंबया तोडी-तोडीन खावा बाज ज्या। 2 आहयु देखीन फरीसी पंथवाळा ईसू ने केदा, “देख, जे काम अराम ना दाडे करवा वारु नी हय, तीहयुत काम तारा चेला कर रया।” 3 ईसू तीहया फरीसी माणह ने केदो, “खरला सास्तर मे तमु नी भणया हु? के जतयार दावुद राजा अने तीना हाती ने भुक लागी ता तीहया हु करया? 4 तीहया भगवान ना तमळु मे जायन भेट चडावला रोट्ला खादा, अने नीस्ता भगवान ना पुंजारा ने सोडीन तीने अने तीना हाती ने रोट्ला खावा ताले नी हतु।” 5 नीता, मुसा नी लारे लीखली सास्तर मे तमु नी भणया हु? के भगवान ना मंदीर ना पुंजारा अराम ना दाडा नो नेम तोडीन बी तीहया वण-गुनाळ्ळा ठेरया। 6 “मे तमने केम, जे आज्ञे हारीक से तीहयो मंदीर गेथो बी मोटो से।

7 कदीम तमु सास्तर मे लीखली आहयी वात हमजी जता के 'मे माणहु मे गीण देखवा हींडु, जानवरु ने मारीन बादा नी जेवती' ता वण-गुनाळ्ळा ने गुनाळ्ळा नी ठेरावता। 8 काहाके मनख्या नो सोरो अराम ना दाडा नो मालीक से।" 9 अने अळतेण ईसु तां गेथो अगो ज्यो, अने भगवान ना भक्ती ना घोर मे ज्यो। 10 तां एक माणेह हतो, तीनु हात हुक जेलो हतो। ईसु पोर गुनो लगाडवा करीन फरीसी माणहु तीने पुख्या, "अराम ना दाडे कोयने वाक करवा तालेत से हु?" 11 ईसु तीमने केदो, "कदीम तमारु एकीत गाडरु हय, अने तीहयु खाडा मे पड जाय, ता तमारी मायन एवु कोय से, जे अराम ना दाडे तीने धरीन नी नीकाळे? 12 माणेह ते गाडरा गेथो घणो मोगो से। एतरे अराम ना दाडे भलाय करवा तालेत से।" 13 ता तीहयो ते माणेह ने केदो, "तारो हात नामबो कर।" अने तीहयो आहफा नो हात नामबो करयो, अने तीहयो हात वासु हय ज्यो। अने बीजा वारला हात ने तेवो हय ज्यो। 14 एतरे फरीसी पंथवाळा बारथा नीकळीन ईसु ना वीरोद मे आहयो वीच्यार करया आमु अने कीसम करीन मारया? 15 ईसु आहयु जाण ज्यो अने तां गेथो चाल पड्यो। अने घण ढेरका माणहु ईसु पसळ चाल पड्या। तीहयो आखा ने आरगो करतो हतो। 16 बाखीन तीहयो तीमने आहयु कीन चेतावतो हतो के "तमु मारु नाम लीन बीजा माणहु अगळ उजन्तो नी करजो।" 17 आहयु एतरे हयु के भगवान वगो गेथी वात केण्या माणहु यसाया नी लारे जे मालीक केदलो हतो, तीहयु पुरु हये: 18 आहयो मारो चाकरयो से, आने मे टाळलो से; आहयो मारो घणो मोंगाळ्ळो से, मे आनी पोर घणो खुस से। मे आनी मे मारी आत्मा भर देही। अने आहयो आखा देस ना माणहु ने हाचलीन नीयाव नी खुस-खबर करहे। 19 तीहयो नी झगडो करे, अने नी धुम मचाडहे; अने नी हाट मे कोय बी आनो बोल नी हमळे। 20 आहयो कचरायली वाहण ने नी तोडे। अने ओलायतला दीवा ना बामळा ने अगोत नी ओलवे। जतयार लग आहयो हाचलीन नीयाव करीन जीक नी अपाडे, तां लग पासो नी सोडे। 21 ततयार आखा देस ना माणहु आना नाम नी आह करहे। 22 अळतेण माणहु एक आंदळा माणेह ने ईसुनां लाया, तीहयु गुंगु बी हतु। अने भुत लागलु हतु। ईसु तीने आरगो करयो। अने तीहयो बोलवा अने देखवा बाज ज्यो। 23 आखा माणहु वहरायन ईसु ना बारा मे केवा बाज जया, "आहयो दावुद नी अवल्यात हयवा जेवो हु?" 24 पण आहयी वात हमळीन फरीसी पंथवाळा केदा, "आहयो ते भुत ना मुखी बालजबुल नी मदत सी भुत ने नीकाळे।" 25 ईसु तीमना वीच्यार जाणीन तीमने केदो, "जे राज मे बेरजाव पड जाय तीहयु कदी नी टेके। एमेत तीहयु घोर नीता हेर बी नी टेके, जीनी मे बेरजाव पड जाय। 26 कदीम भुतडोत आहफा ना वीरोद मे हय जाय ता तीनु राज कीकम टेकलु रेहे? 27 अने कदीम मे भुतडा नी मदत सी भुत ने काडु ता तमारा सोरा कोयनी मदत सी भुत काडे? एतरे तीहया तमारो नीयाव करहे। 28 पण कदीम मे भगवान नी जीव आत्मा नी ज्योरे भुतडा ना जोमु ने काडु, ता जाण लेवो के भगवान नु राज तमारी वच मे आय जेलु से।" 29 कोय बी माणेह काना बी जोर वाळा माणेह ना घोर मे भरायन हमान नी लुट सके जतयार तक तीहया ते जोर वाळा माणेह ने बांद नी लेय। अने जतयार तीहयो ते जोर वाळा ने बांद लेय, ततयार तीहयो तीना घोर मे भरायन हमान लुट सके। 30 "जे मारी हाते

नी हय, तीहयो मारा वीरोद मे से, अने जे मारी हाते भगवान गेथा सेटा हयला माणहु ने भेळा नी करे, तीहयो तीमने रीवणया-तीवणया कर रयो।" 31 एतरे मे तमने केम, माणहु ने आखी भाती ना पाप नी लेदे माफी जड जहे; आंया लग के भगवान नो जबराण वाक काडे तीने बी माफी जड जहे, पण भगवान नी चोखली आत्मा नो वाक काडे ता तीने माफी नी जडे। 32 जे कोय मनख्या ना सोरा ना वीरोद मे कंय केहे, तीने माफी जड जहे। पण चोखली आत्मा ना वीरोद मे कंय केहे, तीने माफी नी जडे। आहयी कळी मे बी माफी नी जडे, अने आव्वा वाळी कळी मे बी माफी नी जडे। (aiōn g165) 33 कदीम एक झाड वासु हय, ता तीना फोळ बी वासु रेहे, अने कदीम एक झाड खोडलु रेय, ता तीनु फोळ बी खोडलुत रेहे, काहाके एक झाड नी ओळखाण तीना फोळ सी हये। 34 ए गडहा ना सोरा! तमु बुरा हयन बी वारली वात कीसम की सके? जे तमारा मन मे भरलु से, तीहयुत तमारा मोडा मे गेथु आवे। 35 वारलु माणेह आहफा ना वारला मन ना खजाना मे गेथी वारली वात नीकाळे; अने खोडलो माणेह आहफा ना खोडला मन ना खजाना मे गेथी खोडली वात नीकाळे। 36 एतरे मे तमने केम, "नीयाव ना दाडे माणहु ने आहफाम नी एक-एक रीकामी वात नो लेखो आपु पडहे। 37 काहाके तमु आहफाम नी वात नी लारेत वण-गुनाळ्ळा अने गुनाळ्ळा ठेरहु।" 38 तीहयी टेमे थोडाक चोखली सास्तर हीकाडन्या, अने फरीसी पंथवाळा ईसु ने केदा, "मास्तर! आमु तारी लारे एक उजन्ती सेलाणी देखवा हय रया।" 39 पण ईसु तीमने केदो, "आहयी पीडी ना कुहरया अने छीनाळ्या माणहुत एक सेलाणी देखवा हीडे, पण भगवान वगो गेथी वात केण्या माणेह योना नी सेलाणी ने सोडीन कानी बी सेलाणी आमने नी देखाव पडे।" 40 जीसम योना तीन दाडा मे अने तीन रात मे राकस माळला ना पेट मे रेलो, तेमेत मनख्या नो सोरो धरती मे रेहे। 41 नीयाव ना दाडे नीनवे हेर ना माणहु आहयी पीडी ना माणहु हाते जीवता हयहे, अने आमने गुनाळ्ळा ठेरावहे। काहाके तीहया योना नी लारे भगवान नी केदली वात हमळीन, पापु भणी गेथु मन फीरवीन भगवान गवा वळला हता, अने देखो, आजे ते योना गेथो बी घणो मोटो से। 42 नीयाव ना दाडे दखणाव देस नी राणी आहयी पीडी ना माणहु हाते जीवती हय जहे, अने आहयी पडी ना माणहु ने गुनाळ्ळा ठेरावहे; काहाके तीहयी सुलेमान राजा नी अक्कल वाळी वात हमळवा करीन धरती नी काकड गेथी आवली, अने देखो, आजे ते सुलेमान राजा गेथो बी मोटो से! 43 "जतयार वीटळ्ळी आत्मा माणेह मे गेथी नीकळी जाय, ता तीहयी अराम करवा करीन, हुकला जागा मे, जागो होदती रेय; पण तीने अराम नी जडे। 44 ता तीहयो केय 'जा गेथो नीकळ्ळो से, तांत मारा तीहया घोर मे पासो जही।' अने भुतडा नो वीटळ्ळो जोम पासो आवे, ता तीने तीहयु घोर हुनलु, झाटकीन बारलु अने चापडु करीन घटाळु करलु देखवा पडे। 45 ता तीहयी वीटळ्ळी आत्मा पासी जत रेय अने जायत तीनी हाते बीजी हात कुहरयाण वीटळ्ळी आत्मा ने बी ली आवे। अने तीहया माणेह मे भरायन तांत रेवा बाज जाय। अने तीहया माणेह नी पेले गेथी बी जादा वेला हय जाय। आवीत वेला आहया पीडी ना माणहु नी बी हयहे, जे कुहरया से।" 46 ईसु घोर मे माणहु ने हीकाडवा बाज रयो हतो, तीहयीत टेमे तीनी आयहू अने भाय आया। तीहया बारा उवा हय रेला, अने ईसु ने भेटवा हीडता

हता। 47 कानो आवीन ईसु ने केदो, “देख! तारी आयहू अने भाय बारथा उबा हय रया, तीहया तारी हाते वात करवा हीडे।” 48 ईसु तीमने केदो, “कोय से मारी आयहू? अने कोय से मारो भाय?” 49 अने आहफा ना चेला भणी हात नो अनसारो करीन तीहयो केदो, “देखो! आहया से मारा भाय अने मारी आयहू! 50 काहाके जे कोय मारा हरग वाळा बाह नी मरजीन अनसारे जीवे, तीहयोन-तीहयो मारो भाय, अने मारी बेनेह, अने मारी आयहू से।”

13 तीहयात दाडे ईसु घोर मे गेथो नीकळीन दरया धेडे जीन बह ज्यो।

2 अने दरया धेडे ईसुनतां घणा ढेरका माणहू आय लाग्या अने तीहयो हुंड्या पोर चडीन बह ज्यो, अने आखा माणहू दरया धेडे उबा हय जया। 3 तीहयो दाखला ना लारे तीमने वात हीकाड्यो। अने तीहयो एक दाखलो केदो, “हमळो! कानो कीरसाण बीज वाववा ज्यो। 4 वाव्ता-वाव्ता मे थोडाक बीज वाट धेडे पड्या, अने चडा आवीन तीने खाय जया। 5 थोडाक बीजडा चाफर्या वाळा जागा मे पड्या तां उतळो कादो हतो; एतरे तीहया छोटा उगी आया; अने मुळ्या उनडे नी जया। 6 एतरे दाहडु उगीन तोप लागयो ता तीहयु धान चीमायन हुक जसु। 7 थोडाक बीज काटा वाळा झाटवा मे पड्या, अने उग्या पण कटाळ्ळा झाटवा तीहया रोपा ने डाब देदा। 8 थोडाक बीजडा वारली जागा मे पड्या अने उगीन मोटा हयन काना होव गुणा, अने काना साट गुणा, अने काना तीस गुणा फोळ लाया।” 9 जीनी पांह हमळवा ना कानटा हय तीहयो हमळ लेय। 10 ईसुन ना चेला हाते आवीन तीने केदा, “तु काहा माणहू ने दाखला मे हीकापण आपे?” 11 ईसु तीमने जपाप आप्यो, “मे आनीन करीन दाखला मे देखाडु काहाके हरग राज ना बारा मे जाणवा नी हमज तमने भगवान आपलो से, पण हीयया माणहू ने नी आप्यो। 12 काहाके जीनी पांह थोडीक आप्ली अक्कल से, तीनेत अळी आपहे अने तीना पांह ढेरत अक्कल हय जहे। पण जीनी पांह कंय बी नी हय, तीनी पांह गेथी तीहयी अक्कल बी मांग लेहे।” 13 मे तीमने दाखला मे हीकाडु काहाके हीयया देखता जीन बी नी देखे, अने हमळता जीन बी नी हमळे अने नी हमजे। 14 यसायो आहयी बी वात भगवान वो गेथी केदलो हतो, तीहयी वात तीहया माणहू मे तेम ने तेम पुरी हय री: तमु हमळहू, अने हमळ्यात करहू, पण तमने थोडीक बी नी हमजाये; अने तमु देखहू, पण तमने पल्ले नी पडे। 15 काहाके आहया आहफाम नु मन काठु कर लेदला से। आहया मन बेरा हय जेला से। अने आहया आहफाम ना डोळा मीच लेदला से। आहया ईनीन करते आसम करया काहाके ईमने कंय बी नी देखायवा जोवे, अने ईमने कंय बी नी हमळाववा जोवे, अने ईमना मन ने कंय बी पल्ले नी पडवा जोवे, अने कदी मारी भणी नी वळवा जोवे, काहाके मे ईमनो छुटकारो कर देही। 16 पण जुगाळा से तमारा डोळा, काहाके हीयया देखे, अने जुगाळा से तमारा कानटा, काहाके हीयया हमळे! 17 मे तमने हाचलीन केम, के ढेरत भगवान वो गेथी वात केणया माणहू अने नीयाव करनया हेर करया के, जे वात तमु देखो, देखया पण नी देखाय; अने जे वात तमु हमळो, हमळ्या, पण नी हमळ्या। 18 हाव तमु कीरसाण ना दाखला नो मतलब हमजो: 19 बीज वाववा नी टेमे जे बीज वाट धेडे पड्या, तीहया आहयी सेलाणी देखाडे के कदीम कोय भगवान ना राज ना बोल हमळे, बाखीन हमजे नी, ता तीना मन मे जे वेरायलु

से, तीने कुहरयो भुतडो आवीन लीतती रेय। 20 चाफरया वाळी जागा मे वाळा बीज तीहया माणेह नी सेलाणी से: तीहयो भगवान नो बोल हमळतेत खुस हयन मानीन आवरे; 21 पण तीनी मे मुळ्या उंडा नी हयवा सी तीहयो थोडाक दाडा लग भरहो करे, पण भगवान ना बोल नी लेदे तीनी पोर दुख अने वेला आय पडे, ता तीहयो ततयास्त भरहो सोड देय। 22 जे बीज झाटवा वाळी जागा मे पड्यु तीहयु ते माणेह नी सेलाणी से, जे भगवान ना बोल हमळे ते खरो, पण तीने कळी मे वाळी जीवायन नी फीकर अने धन नी लालच भगवान ना बोलु ने पाळीन चालवा नी देय, अने तीहयो जीवायन फोळ नी लावे। (aiōn g165) 23 वारली जागा मे पडलु बीज तीहया माणेह नी सेलाणी से: जे भगवान ना बोलु हमळे, अने हमजे, अने फोळ लावे। कानो होव गुणा फोळ लावे, कानो साट गुणा फोळ लावे, अने कानो तीस गुणा फोळ लावे। 24 ईसु तीमनी अगळ एक अळी दाखलो केदो, “हरग नु राज तीहया माणेह नु हरकु से, जे आहफा ना खेतर मे वारलु बीज वेरयो। 25 पण जतयार माणहू हुववा बाज रेला, ता तीनो वेरी आयो, अने गम मे जंगली बीज ने वेरीन जत र्यो। 26 जतयार हुका फुट्या अने उंब्या नीकळ्या ता जंगली बीज देखाव पड्या।” 27 एतरे पावरया मालीक ना घोर आवीन मालीक ने केदा, “मालीक तु तारा खेतर मे वारलु बीज नी वेरयो हु? ता तीनी मे जंगली बीज कीकम उग आया?” 28 मालीक तीमने केदो, “आहयु काना वेरी नु काम से।” ता पावरया तीने पुळ्या, “तारी मरजी हय ता आमु जायन जंगली बीज ने उखड दीया?” 29 मालीक केदो, “नी ईसम ना करो नीता कंय मायन जंगली बीज ना झाटवा हाते, गम बी नी उखडी जाय। 30 वाडणी आवते लग भेळात वदवा देवो। वाडवा नी टेम पोर वाडवा वाळा ने केही, ‘पेले जंगली बीज ना झाटवा भेळा करो अने धपाडवा करीन हीमना पुळा बांदो। अने अळतेण गम ना दाणा ने मारी मोहटी मे भेळा करो।” 31 ईसु तीमने एक अळी दाखलो हमळायो, “हरग नु राज राय ना दाणान तेवु से, जीने लीन कानो माणेह आहफा ना खेतर मे वेर देदो। 32 तीहयु ते बीजा आखा बीज मे गेथु नानु रेय, पण उगीन वदीन वाडी ना भाजी-पाला ना झाटवा गेथु मोटु हय जाय, अने एवु झाटवु बण जाय के हरग ना चडा आवीन तीना डाळ्या पोर पोतरा बांदीन रेवा बाज जाय।” 33 ईसु तीमने अळी एक दाखलो हमळायो, “हरग नु राज तीहया खमीर हरकु से, जीने लीन कानी बयर तीन कांगणी लोट मे भेसकी अने आखो लोट खमीर वाळो हय ज्यो।” 34 ईसु आखी वात दाखला नी लारेत माणहू ने हमजाडतो हतो। अने दाखला वगर कंय बी नी केतलो। 35 भगवान वो गेथी वात केणया माणहू नी लारे जे केदलु तीहयु पुर करवा नी करतेत ईसु दाखला नी लारे वात करते हतो: जेम भगवान केदलो, मे दाखलो केवा करीन मारु मोडु उगाडही; अने कळ घडायली तां गेथा पेलना वारा नी हतायली वात उजन्ती करही। 36 ईसु माणहू ने वळाय दीन पासो घोर आयो। तीना चेला तीनीनतां आवीन केदा, “खेतर मे वाळा जंगली बीज ना दाखला नु मतलब हु हये तीहयु आमने हमजाड दे।” 37 ईसु तीमने केदो, “वारलु बीज वेरनयो कीरसाण, मनख्या नो सोरो से; 38 अने खेतर आहयी कळी से: वारलु बीज भगवान ना राज ना माणहू से; अने जंगली बीज कुहरया भुतडा ना माणहू से; 39 अने वेरवा वाळो वेरी भुतडो से; वाडणी कळजुग नु

खततम हयणु से; वाडणया हरगदुत से। (aiōn g165) 40 जीसम माणहु जंगली बीज ना झाटवा ने भेळा करीन आकठु मे धपाड देय, तेमेत आहयी कळजुग खततम हयहे। (aiōn g165) 41 मनखया नो सोरो हरगदुत ने मोकलहे अने तीहया तीना राज मे गेथा आखा पाप करनया ने अने गलत काम करनया माणहु ने भेळा करहे, 42 अने तीमने आकठु नी दरया मे धकली देहे; अने तीहया माणहु तीहयी आकठु नी भाटी मे ढोळो-ढोळो अने फुकु-फुकु रडहे 43 तीना वारा मे धरमी माणहु आहफा ना बाह ना राज मे दाडान तेम बभळहे। जीना कानटा हय तीहयो ह्मळी लेय।” 44 “हरग नु राज खेतर मे खोवायला धन ने तेवु से, जे काना माणेह ने जड्यु अने तीहयु माणेह हताड देदु अने तीहयु खूस हय जाय अने आखु कंय वेचीन तीहया खेतर ने वेचातु लेदो।” 45 “अळी हरग नु राज एक वेपारीन तेवु से जे वारला मोती नो होदवाळया हतो। 46 जतयार तीने एक मोगलो मोती जड्यो ता तीहयो जायन आहफा नु आखु कंय वेच देदो अने तीने वेचातु ली लेदो।” 47 “अळी हरग नु राज तीहयी मोटली जाळ ने तेवु से तीहया दरया मे नाख देदा, अने आखी भाती ना माछला हापकी लायो। 48 अने जतयार जाळ भराय जी, ता काहरया तीनी जाळ ने धेडे हापकी लाया, अने बहीन वारु-वारु तां ठाहरा मे भेळा करया अने बगडला-बगडला माछला ने नाख देय। 49 कळ खततम हयवान टेमे बी एमेत हयहे। हरगदुत आवीन पापी माणहु ने धरमी माणहु मे गेथा सेटा करहे, (aiōn g165) 50 अने तीमने आकठा ना खाडा मे नाखे। ता तीहया माणहु रडहे अने दातु ककडावता रेहे।” 51 हु तमु आहयी आखी वात ने हमज्या? 52 ईसु तीमने केदो, “एतरे जे बी चोखली सास्तर नो कायदो हीकाडन्यो हरग राज नो चेलो बण्लो से, तीहयो तीहया घोर मालीक हरको से, जे आहफा ना घोर ना खजाना मे गेथो नवला अने जुन्ला चीज नीकाळे।” 53 जतयार ईसु आहया आखा दाखला की देदो, ता तां गेथो जत रयो। 54 अने ईसु आहफा ना हेर मे आवीन तीहया भगवान ना भक्ती ना घोर मे जायन माणहु ने हीकाडवा बाज जयो। के तीहया घबरायन केवा बाज ज्या, “अने आहयी अककल अने घणा जुदा-काम कां गेथा जड्या? 55 आहयो हुतार नो सोरो नी हय हु? अने हु आनी आयह नु नाम मरीयम अने तीना भाय नु नाम याकुब, अने युसुफ अने सीमोन अने यहूदा आना भाय नी हय? 56 अने हु आखा बेनेह आपणी वच मे नी रय? अळी आने आहयी आखी अककल अने जोर कां गेथो जड्यो?” 57 आनीन करता तीहयो ठोकर खादो, पण ईसु तीने केदो, “भगवान वगे गेथी वात करनयो माणेह नी ईजजत तीना गाम ने अने घोरनया ने सोडीन आखी जागे हये।” 58 अने ईसु तां भरहो नी करया करीन जादा काम नी करयो।

14 तीहयी टेमे चोवथा देस नो राजा हेरोद ईसु ना बारा मे हमळयो। 2 अने आहफा ना पावरया ने केदो, आहयो ते बपतीसमा आपणयो युहनना से। हीय्यो मरला मे गेथो जीवतो हय जेलो से, एतरे तीनी सी सक्ती ना काम तीनी लारे हयतला से। 3 हेरोद राजा आहफा नो भाय फीलीपसु नी लाडी हेरोदीयास ना कारण, बपतीसमा आपणया युहनना ने धरीन बांद्यो, अने जेल मे बंद कर देदलो हतो; 4 काहाके बपतीसमा आपणयो युहनना तीने केदलो हतो, के हीने राखवा तारी जुगु ताले नी हय। 5 हेरोद राजा बपतीसमा

आपणया युहनना ने मार नाखवा हीडतो हतो; ते बी माणहु ने देखीन बीहतो हतो, काहाके तीहया तीने भगवान वगे गेथो केवा वाळो माणेह मानता हता। 6 पण जतयार हेरोद नो पयदावारीन दाडो आयो, ता हेरोदीयास नी बेटी पोरणा अगळ नाचणु देखाडीन हेरोद ने खूस करी। 7 एतरे तीहयो हाम खायन वायदो करयो, जे कंय तु मांगहे, मे तने तीहयु आप देही। 8 तीनी आयह तीने पेले गेथी केदली हती। एतरे तीहयी केदी, मने हमणे थाळी मे बपतीसमा आपणया युहनना नु मुंडु मंगाड दे। 9 हेरोद राजा ने दुख लाग्यो, पण आहफा नी हाम अने हाते बहला माणहु ना कारण सी, हुकम आपीन केदो, हीने बपतीसमा आपणया युहनना नु मुंडु आप देवो। 10 अने सीपायडा ने मोकलीन तीहया जेल मे गेथु बपतीसमा आपणया युहनना नु मुंडु तोडाय देदो। 11 अने तीहया तीनु मुंडु थाळी मे ली आया, अने सोरी ने आप देदा, अने तीहयी ते मुंडु ने आहफी नी आयह ने आप देदी। 12 अने युहनना ना चेला आवीन तीनु धोड ने ली जायन तीने गाड देदा, अने जायन ईसु ने खबर करया। 13 ईसु युहनना नी मोत नी खबर हमळीन हुंड्या मे बहीन तां गेथो एक हुनहान जागा भणी जत रयो। अने माणहु आहयु हमळीन हेर-हेर गेथा चालीन तीनी पसळ हय ज्या। 14 अने ईसु हुंड्या मे गेथो उतरयो, ता एक घणो मोटो माणहु नो मेळो देख्यो; अने तीने तीहया माणहु पोर दया आय जी, अने तीहयो जे मांदला हता तीमने आरगा करयो। 15 जतयार हांती टेमे ईसु ना चेला तीनीनतां आवीन केदा, आहयो जागो हुनकार से, अने दाहडु ढळ जेलु से। माणहु ने वळाय दे, अने आहया गाम मे जायन आहफा वाटु खाणु वेचातु ली लेय। 16 ईसु चेला ने केदो, हीमने जवा जरूडी नी हय, तमु हीमने खावा नु आपो। 17 पण चेला केदा, अमारी पांढ पांच रोट्ला अने बे माछला सोडीन बीजु कंय बी नी हय। 18 ईसु केदो, हीयया रोट्ला अने माछला मारीनतां लावो। 19 ईसु माणहु ने चारा पोर बहवा करीन केदो, तीहया पांच रोट्ला अने बे माछला हात मे धरीन हरग भणी भाळीन तु घणो वारु से केदो। अने रोट्ला भांगीन चेला ने आप्यो, अने चेला माणहु ने आप्या। 20 आखा माणहु खायन आफरी ज्या, अने बचला रोट्ला ना टुकडा सी बारे चारली भराय ज्या। 21 अने खाणु खावा वाळा मे, बयरा अने सोरा ने सोडीन पांच हजार अदमडा हता। 22 अने ईसु ततयास्त आहफा ना चेला ने केदो, के तमु हुंड्या मे बहीन दरया नी हेली धेडे जत रेवो; तांह तक मे माणहु ने वळाय देम। 23 ईसु माणहु ने वळाय दीन एखलो बहीन वीनती करवा करीन बडा पोर जत रयो। अने हांतो, तां तीहयो एखलो हतो। 24 तीहयी टेमे लग हुंड्यु ढेरे नाम्बे जत रेलु हतु अने दरया नी वच मे झलक सी डुलकी रयु हतु, काहाके वाहळु अगळ नु हतु। 25 राते तीन बजे गेथो छोव बजे ईसु दरया ना पाणी पोर चालतो जायन चेला भणी आयो। 26 जतयार चेला ईसु ने दरया पोर चालतलो देखया, ता, तीहया घबराय ज्या, अने केदा, आहयो ते कानो भुत से, अने तीहया बीहीन आड पड्या। 27 ईसु ततयास्त तीमने केदो, हीममत राखो! मेत से, बीहो ना। 28 पतरस केदो, “ए मालीक! कदीम तुत से, ता मने पाणी पोर चालीन तारीनतां आववा नो हुकम आप।” 29 ईसु केदो, आव। अने पतरस हुंड्या मे गेथो उतरीन पाणी पोर चालतो जायन ईसु भणी जवा बाज जयो; 30 पण तीहयो ज्यारे आवतलु वाहळु देखीन बीह ज्यो, अने ततयास्त पाणी मे

डुबवा बाज ज्यो, अने आडवा बाज ज्यो, “ए मालीक! मने बचाड।” 31 ईसु ततयास्त तीने हात अगो करीन धर लेदो, अने केदो, ए कम भरहया! तु सणका काहा करयो? 32 जतयार तीहया दुंड्या मे चड जया ता वाहळ थांग ज्यु। 33 आहयु देखीन दुंड्या मे वाळा माणहु ईसु नी भक्ती करीन केदा, तु हाचलीन भगवान नो बेटो से। 34 अळतेण तीहया दर्या पार हेली धेडे गननेसरत हेर मे पुग्या। 35 तां वाळा माणहु ईसु ने ओळखी लेदा, अने आडे-धेडे ना आखा गाम मे आनी खबर फेलाय देदा। तीहया आखा मांदला ने ईसुनतां ली आया। 36 अने तीनी पांह वीनती करया के तु आमने तारा लुगडा नो सेडो एतरोत छीमवा दे। अने जेतरा तीने छीम्या, तीहया आखान-आखा आरगा हय ज्या।

15 यस्सलेम ना थोडाक फरीसी पंथवाळा अने कायदा हीकाडन्या ईसुनतां आवीन केदा, 2 तारा चेला डायला पुडार्या नी रीती-भाती काहा नी पाळता? हीयया हाथ धोया वगर रोट्ला काहा खाय? 3 ईसु तीमने केदो, तमु आहफाम नीत रीती-भाती पाळवा करीन भगवान नो हुकम काहा तोडो? 4 भगवान केदलो हतो, “तमु आहफा ना आयह-बाहा नी ईज्जत करजो अने जे कोय आहफा ना बाह ने नीता आयह ने गलत बोल केय, ता तीने मार नाखो।” 5 पण तमु केय, कदीम कोय आहफा ना आयह-बाहा ने केय जेतरो बी तारो फायदो मारी सी हयतो हतो, तीहया आखु भगवान ने भेट अपाय जेलु से। 6 ईसु मतलब आहयु नी हय, के आयह-बाहा नी ईज्जत नी करवा जोवे। एमेत तमु तमारा डाह-डाहा नी रीती-भाती नी करते, जे तमु बणावला से; भगवान ना बोलु ने टाळ देवो। 7 ए ढोंगडा करन्या! यसायो तमारा बारा मे भगवान वगे गेथी आहयी वात वारलोट केदलो से, 8 आहया माणहु मोडे-मोडे मारी ईज्जत करे, पण आमनु मन मारी गेथु घणु सेटु से। 9 आहया अमथात मारी भक्ती करे; काहाके तीमनी हीकापण नीसती माणहु ना हीकाडला नेम से। 10 अने अळतेण ईसु माणहु ने आहफान तां बोलावीन केदो, हमळो अने हमजो। 11 जे मोडा मे जाय, तीहयु माणहु ने नी वीटाळे, पण जे गलत बोलु माणहु मे गेथा नीकळे, तीहयात बोलु तीमने वीटाळ देय। 12 अळतेण चेला आवीन ईसु ने केदा, तारी आहयी वात हमळीन फरीसी माणहु ने वारु नी लाग्यु, आहयी वात तने मालम से ह? 13 ईसु चेला ने केदो, जे रोपो मारो हरग वाळो बाह नी चोपयो, तीने उखडीन नाख देहे। 14 हीमने रेवा देवो; हीय्या आंदळानेत वाट देखाडे। कदीम एक आंदळो, बीजा आंदळा ने वाट देखाडे ता बेम जणा खाडा मे पड जहे। 15 आहयी वात हमळीन पतरस केदो, आमने दाखला ने हमजाड दे। 16 ईसु केदो, तमने हसु बी नी हमजायतु ह? 17 तमने आहयु नी मालम हय ह? के, जे खाणु मोडा मे हयन भराय, तीहयु पेट मे जत रेय, अने डील मे गेथु बारथु नीकळी जाय? 18 पण जे मोडा मे गेथु नीकळे, तीहयु मन मे गेथु नीकळे, अने आहयुत माणहु ने वीटाळ देय। 19 काहाके गलत वीच्यार, हत्या, बीजी बयर ने राखवा, छीनाळ, चोरी, झुटी गवाय देवा, वाक काडवा ना आहया आखा वीच्यार माणहु ना मन मे गेथात नीकळे। 20 आहयात माणहु ने वीटाळ देय। पण हाथ धोया वगर खाणु खावा सी माणेह नी वीटळे। 21 ईसु तां गेथो नीकळीन सर अने सेदा परगणा भणी चाल पड्यो। 22 तीहया परगणा नी कनानी जाती नी एक बयर आयी

मत्ती

अने आडी-आडीन केवा बाज जी, “ए मालीक! दावुद नी अवल्यात! मारी पोर गीण कर। मारी सोरी ने भुत घण-जबर वेला पाड र्यो।” 23 पण ईसु तीने कंय नी केदो। अने ईसु ना चेला ईसुनतां आवीन वीनती करया, हीनी वात मानीन हीने वळाय दे, काहाके हीयसी आडती-आडती अमारी पसळ आय री। 24 पण ईसु केदो, भगवान मने ईसरायली जाती ना माणहन तां एतरोत मोकलो से, जे खोवायला गाडारन तेम से, अने भगवान गेथा सेटा हय जेला से। 25 पण तीहयी बयर आवीन ईसु ना पोगे पडीन तीने केदी, “ए मालीक! मारी मदत कर।” 26 पण ईसु दाखलो कीन तीने जपाप आपयो, सोरा पांह गेथो रोट्लो हापकीन कुतरा अगळ नाखवा वारु नी हय। 27 तीहयी केदी, होव, मालीक! पण ते बी मालीक नी थाळी मे गेथु टेबल पोर गेथु हेटु पडलु खाणु ते कुतरा खाय लेय। 28 तीनी वात हमळीन ईसु केदो, “ओ बयर! तारो भरहो घणो मोटो से, तारी मरजी पुरी हये।” अने तेतरी घडी तीनी बेटी वारु हय जी। 29 ईसु तां गेथो जत र्यो, अने गलील जीला नी दर्या धेडे पुगीन एक बडा पोर चडीन बह ज्यो। 30 अने मेळान-मेळा माणहु तीनीनतां आववा बाज जया। तीहया लंगडा, लुल्ला, आंदळा, गुंगा, अने ढैरत बीजी मंदवाड मे पडला माणहु ने ईसु ना पोगु अगळ हाते लावीन मेक देदा, अने ईसु तीमने आरगा करतो र्यो। 31 अने जतयार माणहु देख्या, गुंगा बोले, पांगळा वारु हये, लंगडा चाले, अने आंदळा देखे, आहयु आखु देखीन माणहु चकराय जया, अने तीहया ईसरायली जाती ना भगवान ना गुण गाववा बाज जया। 32 ततयार ईसु आहफा ना चेला ने हाते बोलावीन केदो, मने आहया माणहु पोर गीण आवे। आहया तीन दाडा ना मारी भेळता री र्या, अने ईमनी पांह खावा जुगु कंय बी नी हय। मे ईमने भुकला नी वळाव्वा हीडतो। कदी आहया थाक जहे अने वाट्येत थाकीन पड जहे। 33 चेला तीने केदा, आहयी उजाडी जागा मे आहया माणहु ने खवाडवा करीन एतरा ढेरका रोट्ला कां गेथा लावया? 34 ईसु तीमने पुड्यो, “तमारी पांह केतरा रोट्ला से?” तीहया केदा, “हात रोट्ला अने थोडाक झीनला माछला।” 35 अने माणहु ने भोयमे बहाड देवो, करीन ईसु चेला ने हुकम आपयो। 36 अने तीहयो हात रोट्ला, अने माछला हात मे लीन रोट्ला अने माछला जुगु भगवान ने तु घणो वारु से केदो, अने तीहयो माछला अने रोट्ला भांगी-भांगीन चेला ने आपतो ज्यो, अने चेला माणहु ने आपता जया। 37 आखा खायलीन आफरी जया अने चेला बचला टुकडा सी हात चारया भरीन चुट्या। 38 खाणु खावा वाळा मे बयरा-सोरा ने सोडीन च्यार हजार अदमडा होता। 39 ईसु माणहु ने वळाय देदो, अने तीहयो दुंड्या मे बहीन मगदन परगणा मे पुग्यो।

16 फरीसी पंथवाळा अने सदुकी पंथवाळा ईसुनतां आया, अने तीने पारखवा करीन तीहया हरग मे गेथी कानी सेलाणी देखाड। 2 पण ईसु केदो, “हांती टेमे तमु केवो, सीजन वारु रेहे, काहाके हरग रातु से। 3 अने हवारे तमु केवो, ‘आज आंजी आवहे काहाके हरग मे रातलु वादळ सवायलु से, कदीम तमु हरग नी सेलाणी देखीन आहयु जाण लेवो के ह हयवा वाळु से, ता तमु आहया दाडा मे हय रेली सेलाणी काहा नी ओळखो? 4 आहयी पीडी ना कुहर्या अने छीनाळ्या माणहु एक सेलाणी मांग र्या, पण आमने धरमी योना नी सेलाणी वगर कानी बी सेलाणी नी जडे। आहयी वात कीदीन ईसु

तीमने सोडीन जत र्यो।” 5 दरया नी हेली धेडे जवा नी टेमे चेला रोट्लो लेवा भुल जेला हता। 6 पण ईसु तीमने हुकम आपीन केदो, चेतीन रेवो! अने फरीसी माणहू अने सदुकी माणहू ना खमीर सी बचीन रेवो। 7 ता तीहया-तीहयात केवा बाज जया, आपणु रोट्ला नी लाया, एतरे आहयो ईसम केया। 8 ईसु तीमना वीच्यार जाणीन तीमने केदो, “ए कम भरहया! तमु आहयु काहा वीच्यार कर रया, के ‘आपणु रोट्ला नी लाया, एतरे आहयो आसम केय?’” 9 तमु हजु लग नी हमजया हू? मे तीहया पांच हजार माणहू ने पांच रोट्ला हेरका करीन आफरीन खवाड्यो तीहयु तमने मालम नी हय हू? अने तीहयी टेमे तमु केतरा चारया टुकडा चूटीन भरला? 10 मे तीहया च्यार हजार माणहू ने हात रोट्ला वदाईन, आफरीन खवाड्यो, ता तमु तीहयी टेमे केतरा चारया टुकडा चूटीन भरला? 11 तमु काहा नी हमजता के मे तमने रोट्ला ना बारा मे आहयु नी केदो, पण मे ते फरीसी माणहू अने सदुकी माणहू ना खमीर गेथा चेतीन रेजो करीन केदलो? 12 ता चेला हमजी जया के ईसु रोट्ला ना खमीर गेथा नी, बाखीन फरीसी माणहू ना अने सदुकी नी हीकापण गेथा चेतीन रेवा करीन हुकम आपीन केदलो हतो। 13 ईसु केसरया फीलीपुस हेर मे आहफा ना चेला ने पुछ्यो, माणहू मनख्या ना सोरा ने हू केय? 14 तीहया केदा, “थोडाक माणहू केय, ‘बपतीसमा आपणयो युहन्तो से, थोडाक माणहू केय एलीया से, अने थोडाक माणहू केय, यीरमया से नीता ता भगवान वगे गेथो केवा वाळा काना माणहू मायन कानो एक से।” 15 आहयु हमळीन ईसु केदो, पण तमारा वीच्यार सी मे कोय से? केवो? 16 सीमोन पतरस केदो, तु मसी से, तु जीवतो रेणया भगवान नो सोरो से। 17 ता ईसु सीमोन ने केदो, ए सीमोन, योना ना सोरा! तु जुगाळो से, काहाके आहयी वात डील अने लोय मे रेण्यो कानो माणेह नी, बाखीन मारो हरग वाळो बाह तारी पोर उजन्ती करलो से। 18 एतरे मे बी तेने केम, “तु पतरस से, अने मे आहया दगाडा पोर मारी मंडळी बणावही अने पताळ नो झापला ने आनी अगळ टेकाये नी।” (Hadēs g86) 19 मे तने हरग राज ना कुच्या आपही। अने तु धरती पोर जे कंय बांदही, तीहयु हरग मे बी बंदाय जहे; अने जे कंय धरती पोर उगाडहे तीहयु हरग मे बी उगडी जहे। 20 ततयार ईसु आहफा ना चेला ने हुकम आप्यो के तमु कोयने बी नी केजो के हीययो मसी से। 21 तीहयी टेमे गेथो ईसु आहफा ना चेला ने आहयु हमजाडवा बाज ज्यो के मने यस्सलेम जवा नु से; तां डायला पुडारी, अने भगवान ना डायला पुंजारा, अने युहदी धरम हीकाडन्या मने वेला पाडहे अने मने मार नाखेहे। पण मे तीसरा दाडे पासो जीवतो हय जही। 22 पतरस ईसु ने आंग्ये ली ज्यो अने तीने आहयु कीन वड्यो, ए मालीक! तारी हाते भगवान आसम नी करे तारी पोर आसम कदी नी हये। 23 पण ईसु पासो वळीन पतरस ने केदो, ए भुतडा! मारीन्तां गेथो सेटो जत रे! तु मारी वाट्ये अडचन बण र्यो। काहाके तु भगवान नी वात पोर नी, पण माणहू नी वात पोर मन लगाडे, 24 अळतेण ईसु आहफा ना चेला ने केदो, जे कोय मारी पसळ आव्वा हीडे, तीहयो आहफा ने वीहरी जवा जोवे, अने आहफा नु कुस्स उचलीन मारी पसळ आवे। 25 काहाके जे आहफा ने बचाडहे तीहयो आहफा ने खोय देहे अने जे कोय मारी जुगु, आहफा नो जीव खोय देहे, तीहयो तीने बचाडहे। 26 कदीम माणेह आखी कळजुग ने हात कर लेय अने आहफा नो जीव खोय देय

तीहयु हू काम नु? तीहयो आहफा नो जीव बचाडवा करीन आहफा ना जीव नी अवजी पोर हू आपहे? 27 काहाके मनख्यान बेटो आहफा ना हरगदुत नी हाते आहफा ना बाह नी बडाय भेळ आवहे, अने तीहयो आखा माणहू ने तीमना काम ना अनसारे फोळ आपहे। 28 मे तने हाचलीन केम, आजे हारीक थोडाक आसवा माणहू बी हजुर से। जे ततयार लग नी मरे जतयार लग मनख्यान बेटा ने तीना राज मे आवतलो नी देख लेय।

17 छोव दाडा हय जया अने अळतेण ईसु, पतरस, याकुब अने तीना भाय युहन्ना ने तीनी हाते हुनकार जागा मे उचला बडा पोर ली ज्यो। 2 अने तां तीमनी अगळेत ईसु नो सीको बदली ज्यो। अने तीनु मोडु दाडुन तेम पपलवा बाज ज्यु, अने तीना लुगडा वीजाळान तेम उजळा हय जया। 3 तीहयीत टेमे ईसु ना चेला ने मुसो अने एलीया तीनी हाते वात करतला देखाव पड्या। 4 ता पतरस ईसु ने केदो, मालीक! आंया रेवा आपणी जुगु वारु से! तारी मरजी हय ता मे आजे तीन तमबु बणाय देम, एक तारी जुगु एक मुसा जुगु अने एक एलीया जुगु। 5 तीहयो केवात बाज र्यो हतो तीहयीत टेमे पपलतलु वादळ आवीन तीमने ढाक लेदु अने हरग मे गेथी आसम अवाज आवी, आहयोट मारो मोंगाळ्यो सोरो से। मे आनी पोर घणो खुस से, आनीत वात हमळो! 6 आहयी वात हमळीन चेला मोडा ना भरहे पड जया, अने जबर बीही जया। 7 ता ईसु तीमनी हाते आवीन तीमने छीमयो अने केदो, “उठो, बीहो ना।” 8 जतयार तीहया उचु भाळ्या, ता ईसु ने सोडीन तीमने कोय नी देखाव पड्यु। 9 अने जतयार ईसु बडे गेथो उतरवा बाज र्यो हतो, ता तीमने हुकम आपीन आहयु केदो, जतयार लग मनख्या नो सोरो मर्या-हरया मे गेथो जीवतो नी हये, ततयार लग जे कंय तमु आजे देखला से, तीहयु कोयने नी केजो। 10 एतरे तीना चेला ईसु ने पुछ्या, चोखली सासतर हीकाडन्या आहयु काहा केय के पेले एलीया नु आवणु टकायलु से? 11 ता ईसु केदो, एलीया हाचलीन आळु कंय हुदार करवा आवहे। 12 पण मे तमने की देम, के एलीया आय लागलो से। पण माणहू तीनी हाते जेम गम्यु तेवो वेहवार करया। तेमेत मनख्या नो सोरो बी तीमना हाते दुख झेलहे। 13 ता चेला आहयु हमजया के ईसु तीमने बपतीसमा आपणया युहन्ना ना बारा मे केदो। 14 अने जतयार ईसु माणहू ना मेळान तां पुरायो, ता एक माणेह ईसुन्तां आयो, अने ईसु अगळ मांडा टेकीन केदो, 15 “मालीक! मारा सोरा पोर गीण कर। हीने फेपर आया करे। हीययो घण-जबर वेला करया करे; अने वळ-वळीन आकठु मे अने पाणी मे पड जाय। 16 मे हीने तारा चेलान्तां लावलो, पण तीहया हीने आरगु नी कर सक्या।” 17 ईसु केदो, वण-भरहया अने टीनाळ्ळी पीडी ना माणहू! कारु लग तमारी हाते रेही अने मे तमने कां लग वेठतो रेम? हीयया सोरा ने मारीन्तां ली आवो। 18 ईसु ते भुत ने वड्यो, अने तीहयो भुत तीना सोरा मे गेथो नकळी ज्यो। अने तीहयु सोरु तेत्ती घडी आरगु हय ज्यु। 19 अळतेण चेला एखलात ईसुन्तां आवीन पुछ्या, अमारी सी भुत काहा नी नीकळ्यो? 20 ईसु तीमने केदो, तमारी पांभ भरहो कमतो से; एतरे तमारी सी भुत नी नीकळ्यो। मे तमने हाचलीन केम, कदी तमारा भरहो राय ना दाणा बराबर बी हतो, ता तमु आहया बडा ने बी केता के आजे गेथो हरकीन सेटो हय जा, ता आहयो बडो बी हरकीन सेटो हय जतो; अने तमारी

जुगु कंय बी नी हय सके ईसम नी रेतु 21 पण आवा भूत वीनूती अने उपाह करया वगर नी नीकळे। 22 जतयार तीहया भेळा हयन गलील जीला मे आया, ता ईसु आहफा ना चेला ने केदो, मनख्यान बेदो माणहु ना हात मे धोका सी धरायवा वाळो से। 23 तीहयो तिने मार नाखे, पण तीहयो तीसरा दाडे जीवतो हय जहे। आहयु हमळीन चेला घणा दुखी हय ज्या। 24 जतयार तीहया कफरनहम हेर मे आया, ता मंदीर नो फाळो लेवा वाळा पतरस ने तां आवीन पुछ्या, “हु तमरो मास्तर मंदीर नो फाळो नी आपे?” 25 पतरस केदो, “होव, आपतलो।” जतयार पतरस घोर आयो, ता ईसु तिने पुछते-पुछते पेलेत तिने केदो, “ए सीमोन! तु हु हमजे? आहयी कळी ना राजा कोय पांहा फाळो अने करजो लेय? आहफा ना सोरा पांहा के बीजा पांहा?” 26 पतरस केदो, पारका माणहु पांहा, ततयार ईसु तिने केदो, ता ते बेटा ने फाळो आपवा नी पडे। 27 पण ते बी आपणु हीयया माणहु ने ठोकर नी खवाड्या, एतरे तु दरया धेडे जायन गळी नाख, अने जे माछली गळी ना काटा मे पेले वळगहे तिने धर लेजे, अने तीनु मोडु उगाडजे, ता तीनी मे तने एक सीकको जडहे। अने तीहया सीकका ने लावीन मारी जुगु अने तमारी जुगु फाळो भर देजे।

18 तीहयी टेमे चेला ईसुनातां आवीन पुछ्या, हरग राज मे आखा सी मोटु कोय से? 2 ईसु एक नानलु सोरु ने बोलायो अने तिने तीमनी वच मे उबो करयो, 3 अने केदो, मे तमने हाचलीन केम, कदी तमु नी फीरो अने सोरान तेम नी बणो, तां तक हरग राज मे नी भराय सके। 4 एतरे जे कोय बी आहफा ने आहयु नानलु सोरु तेम नीचळो बणावहे, तीहयो हरग राज मे आखा करते मोटो रेहे। 5 अने जे कोय बी मारा नामे आवु नानलु सोरु नो आव-भाव करे तीहयो मारोत आव-भाव करे। 6 जे कोय मारी पोर भरहो करवा वाळा आहया नानला मेना एक जुगु बी पाप नो जपाप बणे, तीनी जुगु आहयुत वारु से के तीना गळा मे घट्टी नो मोटलो पोड बांदीन दरया मे नाख देवा जोवे। 7 आहयी कळी ना माणहु जुगु घणी दुख नी वात से, जे भगवान ना माणहु ने पाप मे पाडवा नो जपाप बणे। पाप मे पडवा नी पारख ते आया करहे, पण तीहया माणेह जुगु बी घणी दुख नी वात से, जे बीजा जुगु पाप नो जपाप बणे। 8 कदीम तमारो हात नीता तमारो पोग तमारी जुगु पाप नो जपाप बणे! ता तीने तोडीन नाख देवो। वारु आहयुत से के तमु लुल्ला नीता लंगडा हयन बी अमरकाय अने जलमकी जीवाय हात कर लेवो, नीता कंखर मायन आसम नी हय जाय के बेम हात अने बेम पोग रीन बी, तमु नी ओलायवा वाळी आकठी मे नखाय जावो। (aiōnios g166) 9 अने कदीम तमारो डोळो तमारी जुगु पाप नो ठोकर बणे, ता तीने काडीन नाख देवो। वारु ते आहयुत से के तमु काण्या हयन बी, अमरकाय जीवाय हात कर लेवो, नीता कंखर मायन आसम नी हय जाय के तमारो बेम डोळा हयन बी, तमु नरक-आकठी मे नखाय जावो। (Geenna g1067) 10 चेतनी रेवो! जे मारी पोर भरहो करे, तीमनी मे जे नान्ला से, तीमने बी तमु हेटा नी हमजजो। काहाके मे तमने देखाडु के हरग मे आमना हरगदुत आमनी जुगु मारा बाह नी अगळ वीनूती करवा नी लेदे हमेसा हजुर रेया। 11 मनखया नो सोरो खोवाय जेला से, तीमने होदवा करीन आवलो से। 12 तमारो हु वीच्यार से? मान लेवो कदीम कोयना एक होव गाडरा हय, अने तीमनी मेनु एक खोवाय जाय, ता तीहयो एक कम

होव गाडरा ने बडी पोर रेवा दीन, तीहयु खोवायलु गाडरु ने होदवा नी जाय हु? 13 अने कदीम तीहयु जड जाय ता मे हाचलीन केम, के तीहयो तीहया एक कम होव गाडरान करते एतरो खुस नी हये, जेतरो खुस आहया जडलु गाडरुन करता हयहे। 14 आसमेत तमारा हरग वाळा बाह नी आहयी मरजी से के तीनी पोर भरहो करे तीमनी नान्ला मे गेथो एक बी भगवान गेथो सेटो हयवा नी जोवे। 15 कदीम तारो भाय तारा वीरोद मे पाप करे, ता तीने एखलो ली जायन ईसम पाप नी करवा जोवे, करीन हमजाड देवो, अने कदीम तीहयो तमारी वात मानीन भगवान वगे वळ जाय, ता तमु तमारा भाय ने बचाड लेदा केवाये। 16 कदीम तीहयो तमारी वात नी माने, ता अळी एक नीता बे जणा ने हाते ली जावो, काहाके बे नीता तीन गवा नी लारे तीहयी आखी वात पुरी हय जाय। 17 कदीम तीहयो तीमनी बी नी हमळे, ता मंडळी ने की देवो, अने कदीम तीहयो मंडळी नी बी नी हमळे, ता तीने आडजात्या नी अने फाळो लेवा वाळान तेम हमजो। 18 मे तमने हाचलीन केम, तमु जे धरती पोर बांदहु तीहयी हरग मे बी बंदायहे, अने जे कंय धरती पोर छोडहु तीहयु हरग मे बी छुटहे। 19 अळी मे तमने हाचलीन केम, कदीम धरती पोर तमारी मे बे जणा एक-मन्या हयन कंय बी मांगहे, ता तीहयु तीमने मारा हरग वाळा बाह वगे गेथु जडहे; 20 काहाके जां बी बे जणा नीता तीन जणा मारा नाम सी भेळा हये, तां हारीक मे तीमनी वच मे हजुर रेया। 21 ता पतरस हाते आवीन ईसु ने केदो, मालीक! कदीम मारो भाय मारा वीरोद मे गुनो करतोत जाय, ता तीने मे केतरी कावा माफी आपु? हात कावा लग माफी आपु हु? 22 ईसु तिने केदो, “मे तने आहयु नी केतो, के हात काव पण हात कावा ना सत्तर गुणा तक।” 23 एतरे हरगे नु राज तीहया राजा हरकु से, जे आहफा ना पावरया नो लेखो लेवा हीड्यो। 24 जतयार तीहयो लेखो लेवा बाज ज्यो, ता एक जणा ने तीनी अगळ लायो जे करोडो स्प्या नो करजा वाळो हतो। 25 जतयार तीनी पांहा करजो छुटवा जुगु कंय नी हतु, ता तीनो मालीक केदो, “आने अने आनी लाडी अने सोरा ने अने जे कंय आनु से आखु वेच देवो, अने तीहयो करजो छुटे।” 26 आहयु देखीन तीहयो पावरयो पडीन तिने वांद्यो, अने केदो, “ए मालीक, दम धर, मे आखु कंय छुट देही। 27 ततयार तीहया पावरया नो मालीक तीनी पोर गीण करीन तिने सोड देदो, अने तीनो करजो माफ कर देदो।” 28 पण जतयार तीहयो पावर्यो बारो नीकळ्यो, ता तीना हाती पावरया मेनो एक तीने भेट्यो, जे तीनी पांहा होव दीनार करजो लेदलो हतो; तीहयो तीने धर लेदो अने गळु चमदीन केदो, “जे कंय तु मारी पांहा गेथो करजो लेदलो से तीहयो आप दे।” 29 ता तीहयो पावर्यो तीना हाती पावरया ना पोगु पडीन वीनूती करवा बाज ज्यो; दम धर मे आखु भर देही। 30 पण तीहयो पावरयो नी मान्यो, अने तीने ली जायन जेल मे कुंड देदो; के तीहयो जतयार तक करजो नी छुट जाय तांहा तक तीहयो तांत रेया। 31 तीना हाते वाळा बीजा पावरया आहयु देखीन घणा नराज हय ज्या अने जायन हु-हु हयु तीहयु आखु तीमना मालीक ने देखाड देदा। 32 ततयार तीनो मालीक तीने बोलावीन केदो, “ए वेरी चाकरया, तु जे मारी पांहा वीनूती कर्यो, ता मे ते तारो पुरो करजो माफ कर्यो।” 33 एतरे जेम मे तारी पोर दया कर्यो, तेमेत हु तने तारा हाते वाळा पावरया पोर दया नी करवा जोवे हु? 34 अने तीनो मालीक खीजवायन

तीने डंड आपवा वाळा ना हात मे होप देदो, के जतयार तक तीहयो आखो करजो छुटी नी जाय, तांह तक तीना हात मे रेय। 35 “आहयीत रीते कदीम तमारी मायन आखा आहफा ना भाय ने मन सी माफ नी करे, ता मारो बाह जे हरग मे से, तमारी हाते बी आसमेत करहे।”

19 आहयी वात कीदीन ईसु गलील जीला मे गेथो जत र्यो, अने यरदन नंदी ना हेली धेडे युहदया देस मे पुग्यो। 2 एक घणो मोटो माणहु नो मेळो ईसु पसळ चाल पड्यो, अने ईसु माणहु ने आरगा कर्यो। 3 फरीसी दलवाळा ईसुनतां आया, अने तीनी पारख करता जायन, आहयी वात पुख्या, “काना बी कारण सी आहफा नी लाडी ने सोडवा ताले से हु?” 4 ईसु केदो, “तमु चोखली सास्तर मे नी भणया हु, भगवान सुरु गेथोत तीमने एक बयर अने एक अदमी करीन बणायो। 5 अने भगवान केदलो, के आहया कारण सी, अदमी आहफा ना आयह-बाहा गेथो अलग हय जहे, अने तीनी लाडी हाते रेहे, अने तीहया बे एक डील हय जहे। 6 एतरे हमणे गेथा तीहया बे नी, पण एक डील से: एतरे जीमने भगवान जोडलो से, तीमने माणहु अलग नी करवा जोवे।” 7 तीहया ईसु ने पुख्या, “ता मुसो हुका सोडवा नी चीट्टी आपीन लाडी ने सोडवा नो नेम आपलो?” 8 ईसु तीमने केदो, “तमारा मन नी टटाय जाणीन मुसो तमारी जुगु लाडी सोडवा नो हुकम लीखीन आप्यो। पण सुरु गेथोत ईसम नेम नी हतो। 9 पण मे तमने केम, छीनाळु ने सोडीन काना बीजा बोना सी, जे आहफा नी लाडी ने सोडे, अने कानी बीजी बयर हाते वेवा करे, तीहयो बी छीनाळु करे।” 10 चेला ईसु ने केदा, “कदीम अदमी नो बयर नी हाते मेळ एमेत से, ता वेवा नी करवा वारु से।” 11 ईसु तीमने केदो, “आखा आहयु बोल आवरी नी सके। पण भगवान जीने दान आपलो से, तीहया एतरात वेवा कर्या वगर जीव्वा नी वात ने हमजी सके। 12 काहाके थोडाक माणहु ईसम से जे आयह नी कोख मे गेथात हीजडा जणायला से, अने थोडाक माणहु ईसम से, जीमने बीजा माणहु हीजडा बणाय देदला से। अने थोडाक माणहु ईसम से जे हरग ना राज नी करता वेवा करे वगर जीव्वा करीन वात ठाण लेदला से। ईमने वेवा करे वगर जीव्वा नी ताखत जडली से, तीमने सडलो रेवा जोवे।” 13 तीहयीं टेमे माणहु आहफा-आहफाम ना सोरा-सोरी ने ईसुनतां आनीन करते लाया के तीहयो तीमनी पोर हात मेलीन वीनती करे करीन, पण सोरा ने हु करवा लाय र्या करीन तीना चेला माणहु ने वड्या। 14 बाखीन ईसु केदो, “सोरा ने मारीनतां आववा देवो, अने हीमने ना रोको, काहाके हरग नु राज हीमनी हारका नु से।” 15 अने तीहयो सोरा पोर हात मेकीन तीमने संयबरकत आप्यो अने तां गेथो जत र्यो। 16 एक जणो ईसुनतां आवीन केदो, “ए मास्तर! अमरकाय जीवाय हात करवा करीन मे कानु भलु काम करु?” (aiōnios g166) 17 ईसु तीमने केदो, “तु मने भलाय ना बारा मे काहा पुछे? भलो ते एकीत से, जे भलाय करे। कदीम तु जीवाय हात करवा केय ता हुकम मान।” 18 तीहयो ईसु ने पुख्यो, “काना हुकम पाळु?” ईसु केदो, “हतया नी करजे; छीनाळु नी करजे, चोरी नी करजे, झुटी गवाय नी देजे। 19 ‘आहफा ना आयह-बाहा नी ईजजत करजे’ अने ‘जेम तु आहफा ने मोग करे तेमेत तारा हाते वाळा ने बी मोग करजे।” 20 तीहयो जुवान्यो ईसु ने केदो, “मे आहया आखा हुकम ने पाळलो से। मारी मे अळी कानी वात नी

कसर से?” 21 ईसु तीहया जुवान्या ने केदो, “कदीम तने पुरो पक्को बणवा हय ता, जा! तारु आखु धन वेचीन गरीब ने आप दे, अने हरग मे तने मेल्लु धन जडहे। अने अळतेण आवीन मारी पसळ चाल।” 22 आहयु हमळीन तीहयो जुवान्यो घणो होहवायन जत र्यो, काहाके तीहयो घणो मालदार हतो। 23 ता ईसु आहफा ना चेला ने केदो, “मे तमने हाचलीन केम, मालदार जुगु हरग राज मे भरायवा काठु से।” 24 मे अळी केम “के होय ना डुचा मे हयन उटडा ने सरकवा नु सरल से, बाखीन मालदार ने भगवान ना राज मे भरायवा घणु काठु से।” 25 आहयु हमळीन चेला घणा वहराय जया अने केदा, “ता कोयने छुटकारो जडहे?” 26 ईसु तीमनी भणी भाळीन केदो, “माणहु जुगु ते आहयु, नी बणे एवु से। पण भगवान जुगु आखु कंय बण जाया।” 27 ता पतरस ईसु ने केदो, “देख, आमू अमारु आखु कंय सोडीन तारा चेला बण जेला से। ता, आमने हु जडहे?” 28 ईसु आहफा ना चेला ने केदो, “मे तमने हाचलीन केम, के नवली कळी मे जतयार मनखया नो सोरो पासो आवीन आहफा नी बडाय सी भरायन राजगादी पोर बटहे, ता तमु बी बारे राजगादी पोर बहीन ईसुरायल ना बारे कुळी नो नीयाव करहु, काहाके तमु मारी वात मानीन, मारी पसळ चालवा बाज र्या।” 29 अने जे मारा नाम ना लेदे आहफा ना घोर ने नीता आहफा ना सगणा भाय ने अने बेनेह ने अने आयह-बाहा ने सोरा-सोरी ने, नीता खेतर वाडी मारा नाम नी करते सोड देदलो से, तीहयो होव गुणा हात करहे, अने तीहयो अमरकाय जीवाय नो हकदारयो हय जहे। (aiōnios g166) 30 पण घणु डेरका माणहु जे पेला से तीहया पाछला हय जहे, अने जे पाछला से तीहया पेल्ला हय जहे।

20 हरग नु राज तीहया घोर ना मालीक हरकु से, जे आहफा नी अंगुर नी वाडी मे दाडक्या लगाडवा करीन हवारे नीकळ्यो। 2 तीहयो दाडक्या हाते एक दाडा नी दाडकी एक चांदी नो सीक्को ठेरायो अने तीमने अंगुर नी वाडी मे मोकल्ल्यो। 3 दाडा नी नवेक बजे बारो नीकळ्यो, अने तीहयो हाट मे डेरत माणहु ने रीकामा उबा हय रेला देखीन, 4 तीमने केदो, “तमु बी मारी अंगुर नी वाडी मे जावो, मे तमने तालेत दाडकी आपही।” 5 अने तीहया बी वाडी मे काम करवा करीन जत र्या। अळी माथे दाडे अने मांजणीक दाडे बी तीहयो एमेत दाडक्या होदवा करीन जयो। 6 अने तीहयो दाहडु बुडवा सी एक घंटो पेले अळी तीहयो बारो नीकळीन ज्यो अने अळी तां बीजा ने उबा हय रेला देखीन तीमने केदो, “तमु आजे हारीक आखो दाडो रीकामा काहा उबा हय र्या?” 7 तीहया तीने केदा, “आमने कोय नी दाडक्या लगाड्या करीन आमू आजे हारीक उबा हय र्या।” तीहयो तीमने केदो, “तमु बी मारी अंगुर नी वाडी मे काम करवा जावो।” 8 हांती टेमे अंगुर नी वाडी नो मालीक आहफा ना मुनीम ने केदो, “दाडक्या ने बोलाव” अळतेण पसळ वाळा ने लीन, पेले आव्वा वाळा तक, आखा ने दाडकी आप दे। 9 जतयार तीहया दाडक्या आया, जे एक घंटो दाडु बुडवा मे री रेल्लु लगाडला, ता तीमने एक-एक दीनार आप्यो। 10 जतयार जे पेले दाडक्या आवला ता तीहया हमजी र्या हता, के आमने वदु जडहे; बाखीन तीमने बी एक-एक दीनार आप्यो। 11 जतयार तीहया ली लेदा, ता लीन तीहया आहयु केता जायन मालीक नी वीरोद करवा बाज ज्या। 12 तीहया केदा,

“आहया पाछला दाडक्या एक घंटो काम कर्या। ते बी तु अम्मारी बराबर दाडकी आप्यो, पण आमू आखो दाडो तोप मे काठी मेहनत कर्या।” 13 तीहयो तीमनी मेना एक ने आहयु केदो, “भाय! मे तमारी हाते गलत नीयाव नी करतो, तमु मारी हाते एक दाडो दीनार नी बोली नी कर्या हु? 14 तारी दाडकी ले अने जत रे, मे आहया पाछला दाडक्या ने बी तारीन तेतर आपवा हीडु। 15 हु आहयु वारु नी हय के मारा धन ने मारी मरजी सी वापर? तमु मारी भलाय ने देखीन मारी पोर काहा कुहराय र्या? 16 आहयीत रीते जे पसळ से, तीहया अगळ हय जहे, अने जे अगळ से, तीहया पसळ हय जहे।” 17 ईसु यस्सलेम नी वाट्ये अगो जवा बाज र्यो हतो। ता बारे चेला ने अगळ ली जायत तीहयो चालतो-चालतो तीमने केदो, 18 “देखो, आपणु यस्सलेम जवा बाज र्या। मनखया नो सोरो डायला पुंजारा ना अने चोखली सास्तर हीकाडन्या ना हात मे धराय देहे। तीहया तीने मारवा नी सजा हमळावहे, 19 अने आडजात्या माणहु ना हात मे होप देहे, जीनी सी तीहया माणहु तीनी हाही उडाडहे, अने तीने चापका देहे अने कुस्स पोर चडावहे; बाखीन तीसरा दाडे तीहयो जीवतो हय जहे।” 20 जतयार जब्दी ना सोराम नी आय्ह आहफा ना सोराम नी हाते ईसुनतां आवीन वांदी अने तीनी पांह कंय मांगवा बाज जी। 21 ईसु तीने हकम आपीन केदो, “हु जोवे?” तीहयी केदी, “आहया मारा बे सोरा से। तु कीदे, के तारा राज मे एक तारी जमणी धेडे अने एक तारी डखरी धेडे बहे।” 22 ईसु जपाप आप्यो, “तमु नी जाणता के तमु हु मांगवा बाज र्या। जे दुख नो पीयालो मे पीवा वाळा से, तीहयो दुख नो पीयालो तमु पी लेहु हु?” तीहया केदा, “होव मालीक।” 23 एतरा मे ईसु तीमने केदो, “हाचलीन तमु तीहयो दुख नो पीयालो ते पी लेहु, पण तमने मारी जमणी धेडे, नीता डखरी धेडे बहाडवा नो हक मारी पांह नी हय, मारी जमणी धेडे अने डखरी होड नो जागो, तीहया माणहु जुगु से, जीमनी वाटु मार बाह तीयार करलो से।” 24 जतयार दह चेला आहयी वात हमळ्या, ता तीहया बेम भाय पोर रीहवाय ज्या। 25 ईसु आहफा ना चेला ने हाते बोलावीन केदो, “तमु जाणो के आखा देस ना माणहु पोर राज करन्या मुख्या, आहफा ना असामी पोर राज करे, अने तीहया हक राखवा वाळा पोर अळी बीजा मोट्ला माणहु हक जमाडे। 26 पण तमारी मे आवा हक नो कायदो नी रेवा जोवे। जे तमारी मे मोटो बणवा हीडे तीहयो तमारो पावर्यो बणवा जोवे। 27 अने तमारी मे डायलो बणवा हीडे, तीहयो तमारो पावर्यो बणवा जोवे। 28 काहाके मनखया नो सोरो बी आहफा नी चाकरी कराववा करीन नी, बाखीन चाकरी करवा करीन अने ढेरत जणा ने सोडाववा करीन आहफा नो जीव आपवा आवलो से।” 29 जतयार तीहया यरीहो हेर गेथा जवा बाज र्या हता, ता एक मोट्लो माणहु नो मेळो ईसु पसळ-पसळ चाल पड्यो। 30 अने तां हारीक रोहा धेडे बे आंदळा बह र्या हता। जतयार तीहया आहयु हमळ्या के ईसु तीमनी अगळ मायत जवा बाज र्यो, ता तीहया आडी-आडीन केवा बाज ज्या, “ए मालीक! दावुद नी अवल्यात! अम्मारी पोर गीण कर।” 31 माणहु तीहया आंदळा ने होगा री जावो करीन वड्या, पण तीहया अळी बी ज्योरेत आडीन केदा, “मालीक! दावुद नी अवल्यात! अम्मारी पोर गीण कर।” 32 ईसु उबो रीन तीमने बोलायो अने केदो, “तमने हु जोवे? मे तमारी जुगु हु कर?” 33 तीहया

केदा, “ए मालीक! आहयु के आमू देखवा बाज जीया।” 34 ईसु गीण करीन तीमना डोळा छीम्यो, अने तेतरी घडी तीहया देखवा बाज ज्या, अने तीहया ईसु पसळ चाल पड्या।

21 जतयार ईसु अने तीना चेला यस्सलेम नी हाते पुग्या अने जेतुन बडा पोर वाळा बेतफनो गाम आय लागया, ता ईसु बे चेला ने आहयु कीन मोकल्ल्यो, 2 “तमु अगळ ना गाम मे जावो। तां पुगतेत तमने एक गदडी बांदली अने तीनी हाते पाठडु गदडु बी देखाव पडहे। तीने सोडीन मारीनतां ली आवो। 3 कदीम कोय तमने कंय केय, ता तीने तमु आहयु की देजो, ‘मालीक ने आहया जोय र्या।’ अने तीहयो आमने छोटोत पासो ली मोकल्लहे।” 4 आहयु आनीन करते ईसम हयु के भगवान भणी गेथो केण्या नु आहयु केवा नु पुरु हय जाय: 5 “सीयोन हेर मे रेवा वाळा माणहु ने केवो, देख, तारो राजा तारीनतां आव्वा बाज र्यो; तीहयो नीचळो से, तीहयो गदडु पोर बह र्यो; हाव, गदडु नु बचचु पोर बह र्यो।” 6 चेला जायत जेम ईसु तीमने केदो तेम ने तेम कर्या। 7 गदडु ने अने तीनु बचचु ने ली आया, अने तीहया तीहयु गदडु ने आहफा ना लुगडा ओडाड देदा, अने ईसु तीनी पोर बहीन ज्यो। 8 अने घणा ढेरका माणहु ईसु नो आव-भाव करवा करीन आहफा ना लुगडा वाट पोर आथरी देदा। अने थोडाक माणहु झाड ना डाळ्या वाडीन वाट पोर आथरी देदा। 9 ईसु नी अगळ-अगळ जता जीन अने पसळ-पसळ आवता जीन माणहु ईसम की र्या हता, “दावुद नी अवल्यात ने होसन्ना! बरकत वाळो से तीहयो, जे भगवान मालीक ना नाम सी आवे। आखा मे उचा हरग मे रेवा वाळा नी होसन्ना!” 10 जतयार ईसु यस्सलेम मे आयो, ता आखा हेर मे हुलड मच जी, अने माणहु केवा बाज ज्या, “आहयो कोय से?” 11 अने माणहु केता हता, “आहयो गलील जीला नो नासरत हेर वाळो भगवान वगे गेथी वात केणयो माणेह ईसु से।” 12 ईसु मंदीर मे मोय ज्यो अने तां गेथा आखा वेचवा वाळा अने लेवा वाळा ने बारथा काड देदो। तीहयो पय्हा ना अदला-बदली करन्या ना टेबल्याने अने पारवा वेचवा ना पाटला ने उथलाय देदो। 13 अने तीमने केदो, “खरली सास्तर मे लीखलु से, ‘मास घोर वीनती नु घोर केवायहे, पण तमु ईने चोट्टा नु घोर बणाय र्या।’” 14 मंदीर मे आंदळा अने लंगडा ईसुनतां आया, अने तीहयो तीमने आरगा कर्यो। 15 जतयार भगवान ना डायला पुंजारा अने चोखली सास्तर हीकाडन्या मास्तरया ईसु ना भारी जुदा-काम देख्या, अने सोरा ने मंदीर मे आहयु केतला हमळ्या, “दावुद नी अवल्यात ने होसन्ना!” ता तीहया रीहवाय ज्या। 16 अने तीहया ईसु ने केदा, “आहया हु केवा बाज र्या तीहयु तु हमळी र्यो हु?” ईसु तीमने केदो, “होव, हमळी र्यो, पण तमु आहयु कदी नी भणया हु ‘सोरा अने दुत पीता नान्ला सोरा ना मोडे तु आहफा नु गुण गवाडलो से?’” 17 एतरा कीदीन ईसु तीमने सोडीन हेर मे गेथु नीकळीन बेतन्या जत र्यो अने आखी रात तां र्यो। 18 बीजा दाडे हवारे वेगोत जतयार ईसु पासो हेर मे आव्वा बाज रेलो ता तीने भुक लागीं। 19 तीहयो वाट धेडे गुलर नु झाड देखीन तीनी हाते आयो, तीने तीनी मे पान्टा वगर कंय नी जड्यु, अने तीहयो तीहया गुलर ना झाड ने केदो, “तारी मे अळी कदी फोळ नी लागवा जोवे।” अने तेतरी घडी तीहयु गुलर नु झाड हुक जसु। (aiōn g165) 20 आहयु देखीन चेला वहराय

ज्या अने केदा, “आहयु गुलर नु झाड ततयास्त कीसम हुकाय ज्यु?” 21 ईसु तीमने केदो, “मे तमने हाचलीन केम, कदीम, तमारो भरहो हय अने तमु सणका नी करो, ता मे गुलर ना झाड ने जीसम केदो तेमेत हय ज्यु, तेमेत तमु केहु, ते बी तेमेत हय जहे। पण कदीम तमु आहया बडा ने केहु, आजे गेथो हरकीन दर्या मे पड जा, ता आहयो बडो तमारी वात मान लेहे, अने तेमेत हय जहे। 22 अने तमु जे कंय वीनती करीन भरहा सी मांगहु, तीहयु तमने आखु जड जहे।” 23 जतयार ईसु भगवान ना मंदीर मे जीन हीकापण आप्तो हतो, ता डायला पुंजार अने डायला पुडारया ईसुनतां आवीन केदा, “तु काना हक सी आहयु आखु करवा बाज र्यो? कोय तने हक आप्यो?” 24 ईसु तीमने केदो, “मे बी तमने एक सवाल पुछु, कदीम तमु मने तीनो जपाप आप देदा, ता मे बी तमने की देही के मे काना हक सी आहयु आखु करवा बाज र्यो। 25 बपतीसमा आपणया युहनता ने बपतीसमा आपवा नो हक कां गेथो जडलो, भगवान वगे गेथो जडलो के माणहु वगे गेथो जडलो?” आहयी वात हमळीन तीहया वीच्यार कर्या के कदीम आमु केहु के भगवान वगे गेथो हक जडलु से, ता हीय्यो केहे के तीनी पोर भरहो काहा नी कर्या? 26 पण कदीम आमु केहु, “माणहु वगे गेथो जडलो से, ता आहया माणहु नो धाक से; काहाके आहया आखा माणहु बपतीसमा आपणया युहनता ने भगवान वगे गेथी वात केण्यो माणेह माने।” 27 एतरे तीहया ईसु ने जपाप आप्या, “कय जाणु, आमु ने नी मालम हय?” एतरे ईसु तीमने केदो, “ता मे बी तमने नी केतो के मे काना हक सी आहयु आखु करु।” 28 तमारो हु वीच्यार से? काना अदमी ना बे सोरा हता। तीहयो पेल्लान तां जीन हुकम आपीन केदो, “सोरा जा, आज अंगुर नी वाडी मे काम कर।” 29 पण सोरो जपाप आप्यो, मे नी जाम, पण अळतेण तीना मन मे अंगुर नी वाडी मे जवा नो वीच्यार आय ज्यो अने तीहयो अंगुर नी वाडी मे जत र्यो। 30 अळतेण बाह बीजा सोरा नी तां जीन ईसमेत केदो, तीहयो केदो, “होव बाह, मे अंगुर नी वाडी मे जही। पण तीहयो अंगुर नी वाडी मे नी ज्यो। 31 हमणे तमु केवो, आहया बे जणा मायन कोय बाह नी मरजी पुरी करयो?” तीहया ईसु ने केदा, “पेल्लो सोरो बाह नी मरजी पुरी करयो।” एतरा मे ईसु तीमने केदो, मे हाचलीन केम, फाळो लेणया अने रंड्या तमारी गेथा पेले भगवान ना राज मे जहे। 32 बपतीसमा आपणयो युहनता तमने धरम नी वाट देखाडवा आयो, अने तमु तीनी पोर भरहो नी कर्या, बाखीन फाळो लेणया अने रंड्या तीनी पोर भरहो कर्या। आहयु देखीन अळतेण बी तमु पाप भणी गेथा वळीन भगवान वगा हयन तीनी वात पोर भरहो नी कर्या। 33 एक बीजो दाखलो हमळो: कानो कीरसाण अंगुर नी वाडी लगाड्यो, तीना च्यारो-मेर वाड बांद्यो, अने तीहयी वाडी मे अंगुर नो रोह काडवा करीन एक खाडो खोदीन हळावो बणायो, अने वाडी मे एक पक्को माळो बणायो। अळतेण तीहयो अंगुर नी वाडी ने बीजा कीरसाण ने साजा मे आपीन ढेरत नाम्बे बीजा देस मे जत र्यो। 34 अंगुर नी मेर भेळी करवा नी टेम आयी, ता तीहयो वाटो लेवा करीन कीरसाण ने तां आहफा ना पावर्या ने मोकल्यो। 35 बाखीन तीहया कीरसाणया तीहया पावर्या ने धरीन काना ने ठोक्या; अने काना ने दगडाट्या, अने काना ने मार नाख्या। 36 अळतेण एक कावा अळी तीहयो पेले गेथा ढेरका पावर्या ने मोकल्यो अने

तीहया कीरसाणया तीमनी हाते तेवोत वेहवार कर्या। 37 आखरी कावा तीहयो आहफा ना बेटा ने आहयु वीच्यारीन मोकल्यो के तीहया मारा बेटा नी ईजजत करहेन करहे। 38 पण तीहया कीरसाणया जतयार मालीक कीरसाण ना बेटा ने देख्या ता एक-बीजा ने केदा, “आहयो ते वारीसदार से। आवो, आपणु अने मार नाखता अने आनी जागा पोर कब्जो कर लेता।” 39 तीहया तीने धर लेदा अने अंगुर नी वाडी मे गेथा बारथा नीकाळीन मार नाख्या। 40 अळतेण ईसु तीमने पुछ्यो, “जतयार अंगुर नी वाडी नो मालीक पासो आवहे, ता तीहयो ते कीरसाणया नु हु करहे?” 41 तीहया ईसु ने केदा, “तीहयो ते कुहरया ने मारीन खततम कर नाखे, अने आहफा नी अंगुर नी वाडी बीजा कीरसाण ने साजा मे आप देहे, जे टेमे-टेमे अंगुर नी मेर नो वाटो आप्या करहे।” 42 ईसु तीमने केदो, “तमु खरला सास्तर मे आहयु कदी भणया नी हु: ‘जे दगडा ने राज-मीस्तरया रीकामो हमजीन बारथो नीकाळ देदा, तीहयो दगडोत घोर ना पाया ना, खुणे वाळो दगडो बण ज्यो? आहयु ते मालीक वगे गेथु हयु, आहयु ते अमारी नीगा मे सेल-भातयु से।’” 43 एतरे मे तमने केम, भगवान, हरग नु राज तमारा हात मे गेथु हापकी लेहे अने राज्य ना माणहु ने आप देहे जे भगवान ना राज ना कायदा पाळीन जीवहे। 44 “जे आहया दगडा पोर पड जहे, तीहयो टुकडा-टुकडा हय जहे, अने जीनी पोर आहयु दगडो पडहे, तीने दळ देहे।” 45 डायला पुंजार अने फरीसी पंथवाळा वाळा आहयो दाखलो हमळीन हमज ज्या के ईसु आहयु तीमनात बारा मे की र्यो। 46 करीन तीहया ईसु ने धरवा नी कोसीत ते कर्या बाखीन तीमने माणहु नी बीक हती, काहाके माणहु ईसु ने भगवान वगे गेथो केवा वाळो हमजता हता।

22 ईसु अळी तीमने दाखला हमळाववा बाज ज्यो। तीहयो केदो, 2 हरग नु राज तीहया राजा हरकु से, जे आहफा ना सोरा ना वेवा मे पंगात बहाड्यो। 3 राजो आहफा ना पावर्या ने नेवतु आपला माणहु ने बोलाववा करीन मोकल्यो, बाखीन तीहया आव्वा नी हीड्ता हता। 4 राजो नेवतु आपला माणहुन तां अळी बीजा पावर्या ने आहयु केतो जायन मोकल्यो, “नेवतु आपला तीहया माणहु ने की देवो, देखो! मे मारी पंगात नु खाणु तीयार कर देदलो से। मारा बोळदया अने पाळ्ळा जानवरु मराय नाखलो से। अने खाणु तीयार से; वेवा नी पंगात मे आवो।” 5 पण तीहया आहयी वात पोर धीयान नी देदा। कानो आहफा ना खेतर भणी जत र्यो, अने कानो आहफा नु वेपारु करवा जत र्यो। 6 अने काना माणहु तीहया राजा ना पावर्या हाते वारु वेहवार नी कर्या अने तीमने मार नाख्या। 7 आहयी वात हमळीन राजा ने घणी रीह लागी। अने तीहयो आहफा ना सीपायडा मोकलीन तीहया हतयारा ने मराय नाख्यो अने तीमना हेर ने धपाड नाख्यो। 8 अळतेण राजो आहफा ना पावर्या ने केदो, “वेवा नी पंगात नी तीयारी ते हय जेली से, पण जीमने नेवतु आपलु हतु, तीहया आना लायक नी बणया।” 9 एतरे वाट ना चोवराया पोर जावो, अने जेतारा बी माणहु जड जाय, तीहया आखाम ने वेवा नी पंगात मे बोलाय लावो। 10 अने पावर्या रोहा पोर ज्या, अने भला अने कुहरया आखा माणहु ने बोलावीन ली आया अने वेवा नो घोर तीहया माणहु सी भराय ज्यु। 11 राजो पोरणा ने देखवा करीन आयो, तां तीनी नीगा एक एसवा माणेह पोर पडी, जे वेवा ना लुगडा नी पेरलो हतो। 12 तीहयो तीने केदो, भाय वेवा

ना लुगडा पेरया वगर तु आजे केम आय लाग्यो? तीहयो माणेह होगो हय र्यो। 13 ततयार राजो आहफा ना पावरया ने हुकम आपीन केदो, आना हात अने पोगु बांदीन आने बारथो अंदारला मे नाख देवो। तां तीहया माणहु रडहे, अने दात ककडावहे। 14 काहाके बोलावला ते ढेरत से, पण टाळला थोडाक से। 15 तीहयी टेमे फरीसी पंथवाळा जायन भेळा हयन वीच्यार काड्या के कीसम ईसु ने हीनी वात मे फसाडया। 16 पण तीहयो आहफा ना चेलाम ने हेरोद नी हाते तीनीनतां आहयु केवा मोकल्यो, “ए मास्तर आमु जाणया के तु खरलो से, अने भगवान नी वाट सचचाय सी हीकाडे, अने कोय नी परवाय नी करतलो, काहाके तु माणहु नु मोडु देखीन वात नी करतलो। 17 एतरे आमने देखाड तु हू सोचे? केसर ने फाळो आपवा वार से के नी हय।” 18 ईसु तीमनी वात जाणीन केदो, “ए ढोंगडा करन्या, मने काहा पारखो? 19 फाळा नो सीक्को मने देखाडो।” ता तीहया तीनीनतां एक सीक्को लाया। 20 तीहयो तीने पुळ्यो, “आहयो छाप अने नाम कोय नु से?” 21 तीहया तीने केदा, “केसर नो।” ततयार तीहयो तीने केदो, “जे केसर नु से, तीहयो केसर ने आपो; अने जे भगवान नु से, तीहयु भगवान ने आपो।” 22 आहयु हमळीन तीहया घबराय जया, अने तीने रेवा दीन जत रया। 23 तीहया दाडे सदुकी पंथवाळा जे केता हता के मरला नु पासु जीवणु हयते नी, तीनी हाते आया अने तीने पुळ्या, 24 “ए मास्तर, मुसो केदलो हतो के कदी कोय माणेह वण-अवलयात मर जाय, ता तीनो भाय तीनी लाडी सी वेवा करीन आहफा ना भाय जुगु सोरा पयदा करे। 25 हाव अमारीनतां हात भाय हता; पेलो वेवा करीन मर ज्यो, अने सोरा नी हयवा ना कारण आहफा नी लाडी ने आहफा ना भाय नी करते सोड ज्यो। 26 आहयी रीते बीजो अने तीसरो बी कर्यो, अने हातोव भाय लग आसमेत हयु। 27 आखान बाद मे आखरी मे तीहयी बयर बी मर जी। 28 एतरे पासा जीवता हयवा पोर तीहयी तीहया हातोव भाय मे गेथी कोयनी लाडी हयहे? काहाके तीहयी आखा नी लाडी बणली हती।” 29 ईसु तीमने जपाप आप्यो, “तमु चोखली सास्तर अने भगवान नी सक्ती ने नी जाणता; आना कारण सी भूल मे पड रया। 30 काहाके जीवता हयवा पोर वेवा नी हये पण हरग मे आखा हरगदुत ने तेम रेहे। 31 पण मरला ने जीवता हयवा ना बारा मे हू तमु आहयो बोल नी भणया जे भगवान तमने केदो: 32 ‘मे अब्राहम नो भगवान, अने ईसाक नो भगवान, अने याकुब नो भगवान से?’ तीहयो मरला नो नी, पण जीवता नो भगवान से।” 33 आहयु हमळीन माणहु तीनी हीकापण सी घबराय जया। 34 जतयार फरीसी पंथवाळा आहयु हमळ्या के ईसु सदुकी ना मोडा बंद कर देदो, ता तीहया एखटा हया। 35 तीमनी मे गेथु एक कायदा पाळवा वाळो तीने पारखवा नी करते तीने पुळ्यो, 36 “ए मास्तर कायदा मे कानो हुकम आखा सी मोटो से?” 37 तीहयो तीने केदो, “तु तारा मालीक ने अने भगवान ने पुरा मन अने आहफा ना पुरा जीव अने आहफा नी आखी अक्कल नी भेळ मोंग कर। 38 आहयो आखा गेथो पेलो अने मोटलो हुकम से। 39 अने तीनीन तेम आहयो बीजो हुकम से के तु आपणा हाते वाळा सी आहफान तेम मोंग राख। 40 आखा कायदा अने भगवान वगे गेथा केणया माणहु ना कीतापया आहयात बे हुकम पोर टेकला से।” 41 जतयार फरीसी पंथवाळा एखटा हता, ता ईसु तीमने पुळ्यो,

42 “मसी ना बारा मे तमु हू सोचो? तीहयो कोयनो सोरो से?” तीहया तीने केदा, “दाबुद नो।” 43 तीहयो तीने पुळ्यो, “ता दाबुद आत्मा मे हयन हीने मालीक हुका केय? 44 ‘मालीक, मारा मालीक ने केदो, मारी जमणी होड बह, जतयार लग मे तारा वेरी ने तारा पोगु तळे नी कर देम।’ 45 भलु, जतयार दाबुद हीने मालीक केय, ता हीययो हीनो सोरो केम केवायो?” 46 आना जपाप मे कोय बी एक वात नी की सक्यो। तीहया दाडे गेथा कोयने अळतेण तीने कंय पुसवा नी हीममत नी हयी।

23 तीहयी टेमे ईसु माणहु ने अने आहफा ना चेला ने केदो, 2 चोखली सास्तर हीकाडन्या, अने फरीसी पंथवाळा मुसा नी गादी पोर हक लीन बह रया, 3 एतरे तीहया तमने जे कंय बी हुकम आपीन केय, तीहयु करता अने मानता रेवो; बाखीन तीमनीन तेम काम नी करजो। काहाके हीयया हुकम आपीन केय ते खरा, पण तेम करे नी। 4 तीहया एक भारी बोज ने जीने उचलवा काठु से, हीयया तीने बांदीन माणहु ना खांदा पोर मेल देय, बाखीन आहफा ते आंगळी बी नी टेकव्वा हीडे। 5 हीयया आखा कामु माणहु ने देखाडवा करीन करे। हीयया देखाडवा करीनत आहफाम ना सास्तर ना तावीज चवडा करीन बांदे अने आहफाम ना लुगडा ना घुमचा नामबा कर देय। 6 हीमने पंगात मे पेल्लो जागो अने भगवान ना भक्ती ना घोर नो पेल्लो जागो गमे। 7 हाट मे वार से के अने माणहु अगळ गुरु केवाडवा हीमने वारु गमे। 8 “तमु ‘गुरु’ केवायवा करीन ना हुकारो, काहाके तमारो एक्रीत गुरु से, अने तमु आखान-आखा भाय से।” 9 धरती पोर वाळा ने कोयने “बाह” नी केजो, काहाके तमारो एक्रीत बाह से जे हरग मे से। 10 तमु “मालीक” बी नी केवाडजो, काहाके तमारो एक्रीत मालीक से जे मसी से। 11 जे तमारी मे आखान मोटो से, तीहयो आखा नो पावरयो बणे। 12 जे आहफा ने मोटो मानहे, तीने भगवान नानो कर देहे, अने जे आहफा ने नानो मानहे तीने भगवान मोटो कर देहे। 13 ए ढोंगडा करन्या चोखली सास्तर हीकाडन्या अने फरीसी पंथवाळा! तमारी जुगु घणी दुख नी वात से! काहाके तमु ते माणहु ने हरग राज मे भरायवा सी रोक रया। तमु आहफा बी हरग राज मे नी भरायो, अने बीजा ने बी हरग राज मे नी भरायवा देवो। 14 ए ढोंगडा करन्या चोखली सास्तर हीकाडन्या अने फरीसी पंथवाळा! तमु रंडायला बयरा ना घोर मे भरायन तीमने धोको दीन ठग लेय, अने तीमना घोर ने उजाड देय, अने बीजा ने देखाडवा करीन नामबी-नामबी घणी वार लग वीनती करे। एतरे तमने नीयाव नो डंड भगवान वगे गेथो जादात जडहे। 15 ए ढोंगडा करन्या चोखली सास्तर हीकाडन्या अने फरीसी पंथवाळा! तमारी जुगु घणी दुख नी वात से! काहाके तमु एक जणा ने तमारा पंथ मे लाववा करीन दरया पार करीन धरती ना बीजा खुणे जावो। अने जतयार तमारा पंथ मे आवीन चेलो बण जाय, ता तीने आहफा गेथो बी बे गुणा जादा गुनाळ्ळो बणाय देय, के तीहयो नरक-आकठी मे जाय। (Geenna 1:1067) 16 ए आंदळा अगळवाणया! तमारी जुगु घणी दुख नी वात से! काहाके तमु केजो, “कदीम कोय भगवान ना मंदीर नी हाम खाय, ता तीनी कंय नी खरी हय, पण कदीम कोय मंदीर ना होना नी हाम खाय, ता तीनी वात खरली उतरी जाय।” 17 ए

वण-अकल्लया आंदळा! कोय मोटु से? होनु मोटु के तीहयो भगवान नो मंदीर मोटो से? जीनी सी होनु चोखलु हय जाय? 18 तमु आहयु बी केवो, “कदीम कोय वेदी नी हाम खाय, ता तीनी कंय नी खरी हय, पण कदीम तीहयो वेदी पोर मेल्लूनी भेट नी हाम खाय, ता तीनी खरी उतरी जाय।” 19 ए आंदळा! कोय मोटु से? भेट मोटी से के तीहयी वेदी मोटी से? जीनी सी भेट चोखी हय जाय? 20 एतरे खास वात आहयी से के, जे वेदी नी हाम खाय, तीहयो ते वेदी पोर मेकायलु चीज नी बी हाम खाय केवाये। 21 अने जे भगवान ना मंदीर नी हाम खाय, तीहयी ते भगवान नी बी हाम खाय केवाये, जे आहफा ना मंदीर मे रेय। 22 अने जे हरग नी हाम खाय, तीहयो भगवान नी राजगादी नी अने तीहयी राजगादी पोर बहणया नी बी हाम खाय केवाये। 23 ए ढोंगडा करनया चोखली सासतर हीकाडनया अने फरीसी पंथवाळा! तमारी जुगु घणी दुख नी वात से! काहाके तमु पुदीना नो, सोप नो अने जीरु नो दसवो वाटो ते भगवान ने आपो, बाखीन मुसा नी लारे लीखली सासतर नी खास वात ने सोड देदा; होव, नीयाव, दया, अने भरहा नी खास वात ने टाळ देदा। तमु दसवो वाटो ते आप्या करजो, पण नीयाव नी, गीण नी, अने भरहा नी खास वात ने बी पाळयात करवा जोवे। 24 ए आंदळा अगळवाणया! तमु मीचरया ने ते झारो, बाखीन उटडा ने ते गळ जावो। 25 ढोंगडा करनया चोखली सासतर हीकाडनया अने फरीसी पंथवाळा! तमारी जुगु घणी दुख नी वात से! काहाके तमु वाटका ने अने थाळया ने उपर-उपर ते वारु उजाळे, बाखीन मोय गेथा नी उजाळे, तेमेत तमारु मन हाय अने आहफात नु भलु करवा ना वीच्यार सी भरायलु से। 26 ए आंदळा फरीसी पंथवाळा! पेले वाटका ने मोय गेथा उजाळ लेवो, ता उपर बी उजळी जहे। 27 ढोंगडा करनया चोखली सासतर हीकाडनया अने फरीसी पंथवाळा! तमारी जुगु घणी दुख नी वात से! काहाके जेम तमु ते मडाटया हरका से जे उपर-उपर चुना वेर पोताय करलु रेय, अने घटाळु देखाये, पण मोय मरला माणहु ना हाटका अने हडलु माह भरायलु रेय। 28 ईसम तमु बी उपर गेथा माणहु ने धरमी देखाव पडो, बाखीन तमारा मन मे दगो अने कुहराय भरायली से। 29 ए ढोंगडा करनया चोखली सासतर हीकाडनया अने फरीसी पंथवाळा! तमारी जुगु घणी दुख नी वात से! काहाके तमु भगवान वगे गेथा केणया माणहु ना मडाटया हजाडे, अने धरमी माणहु ना गाता बणावे। 30 अने केवो, “कदीम आमु अमारा आडा-बुडा नी टेमे जीवतला हता, ता आमु भगवान वगे गेथा केणया माणहु नु खुन नी करवा करीन अमारा डाह-डाहा ने सात नी देता।” 31 ईसम कीन तमु आहफाम नीत वीरोद मे आहयी गवा दी र्या के “आमु तीहया माणहु नी अवलयात से, जे भगवान वगे गेथा केणया माणहु नु खुन करला हता।” 32 एतरे तमु तमारा आडा-बुडा ना पाप नी कसर पुरी कर लेवो। 33 ए गडहा अने जेहर वाळा गडहा ना बच्चा! तमु नरक कुंड ना डंड सी कीकम बचहु? (Geenna g1067) 34 देखो! मे तमारीनतां भगवान वगे गेथा केणया माणेह ने, अककल वाळा ने, अने मासतरयाम ने मोकलु। तमु तीमनी मे गेथा थोडाक ने मार नाखहु अने थोडाक ने कुस्स पोर चडावहु, अने थोडाक ने भगवान ना भक्ती ना घोर मे हडकाटहु अने तीमने एक हेर गेथा बीजा हेर वेला पाडता फीरहु। 35 करीन धरती पोर जेतारा बी धरमी माणहु नु खुन हयु, तीहयु खुन तमारा माथे

पडहे। धरमी हावील नु खुन गेथु लीन बीरीक्या ना बेटा जकरयाह ना खुन लग, जीने तमु भगवान ना मंदीर अने वेदी नी वच मे मार नाखला हता। 36 मे तमने हाचलीन केम, आहयु आखु आहयी पीडी ना माथे पडहे अने आमनेत डंड भुगतवा पडहे। 37 ए यस्सलेम! ए यस्सलेम! तु भगवान वगे गेथा केणया माणहु ने मार नाखे अने जे माणहु ने भगवान तारीनतां मोकले तीमने बी दगडाटीन मार नाखे। जेम कुकडी आहफी ना पीचया ने आहफी ना पाखडा तळे भेळा कर लेय, तेमेत मे ढेरेंत कावा तारी अवलयात ने मारा पाखडा तळे भेळा करवा हीडतो हतो, पण तमु मारो नकारो कर देदा। 38 देखो, भगवान तमारा यस्सलेम ना मंदीर ने सोड देहे, अने तीहयो ठारलो हय जहे। 39 मे तने केम, हमणे गेथा तमु मने जतयार लग नी देखो, जतयार लग तमु आहयु नी केय, “जुगाळो से तीहयो, जे मालीक भगवान ना नाम सी आवे।”

24 ईसु मंदीर सी नीकळीन जवा बाज रयो हतो ता तीना चेला मंदीर नी बणावट ने देखाडवा करीन तीनी हाते आया। 2 पण ईसु तीमने केदो, तमु आने ह्दा उबा हय रेला देख रया? पण मे तमने हाचलीन केम, आजे हारीक आहया मंदीर ना दगडा पोर दगडो बी नी रेय। आहयु आखु ओदार नाखहे। 3 जतयार ईसु जेतुन बडा पोर पुगीन बह जयो, ता चेला एक धेडे ईसु हाते आवीन केदा, आमने देखाड, आहयु आखु कतयार हयहे? अने तारी आव्वा नी अने कळजुग खततम हयवा नी सेलाणी हु रेहे? (aiōn g165) 4 ईसु तीमने जपाप आप्यो, चेतीन रेवो। कोय तमने धोको नी दी देय। 5 काहाके घणा माणहु मारु नाम लीन आवहे अने केहे, “मेत मसी से, अने तीहया घणा ढेरका माणहु ने भटकाड देहे।” 6 तमु लडाय अने झगडा नो हुकवाडो हमळहु। आहयी वात हमळीन तमु घबरायजो नी, काहाके ईसम ते हयहेन-हयहे। पण तीहयी टेमे खततम नी हयो 7 आखी जाती ना माणहु आंबा-सांबा झगडो करवा करीन हुहडीन जहे। एक राज्य ना माणहु बीजा राज्य ना माणहु भणी झुमायवा जहे। जां तां काळ पडहे। अने जां तां भुकमप हयहे। 8 आहयु आखु आव्वा वाळी गरा नी सुस्वात से। 9 मारा नाम नी करते आखी जाती ना माणहु तमारी सी हीगी करहे, अने तीहयी टेमे माणहु तमने वेला पडाववा करीन धरावहे अने तीहया तमने मार नाखहे। 10 तीहयी टेमे घणा ढेरका माणहु मार पोर गेथो भरहो सोड देहे। अने तीहया एक-बीजा ने धरावहे, अने एक-बीजा सी हीगी करहे। 11 अने ढेरेंत झुटा भगवान वगे गेथा केणया माणहु आय लागहे। अने घणा ढेरका माणहु ने भगवान ना भरहा गेथा सेटा कर देहे। 12 पाप करनया वदवा सी घणा ढेरका माणहु नो मोंग टाडो पड जहे। 13 बाखीन जे आखरी लग दम धरहे, तनिंत छुटकारो जडहे। 14 आहयी कळी ना आखी जाती ना माणहु ने खुस-खबर नी गवा राखवा करीन तीमनी मे भगवान ना राज नी आहयी खुस-खबर नु परच्यार हयहे, अने अळतेण कळजुग खततम हयवा नी टेम आय लागहे 15 एतरे जतयार तमु खततम करवा वाळी चीज ने मंदीर ना चोखला जागा मे उबी हय रेली देखो, जीना बारा मे भगवान वगे गेथो केणयो दानीयल केदलो हतो; भणवा वाळो हमजी लेवा जोवे के आनु मतलब हु से? 16 ता, तीहयी टेमे जे माणहु युहदया मे हय, तीहया बडा पोर नाह जवा जोवे; 17 अने जे घोर नी छत पोर हय, तीहयो आहफा ना घोर नु हमान लेवा हेटो नी उतरवा जोवे; 18 जे खेतर मे हय,

तीहयो आहफा ना लुगडा लेवा करीन पासो नी आव्वा जोवे। 19 तीहया दाडा मे जे बयर भारेपोगे हहे अने सोरु ने धाय धवाडती हहे, तीनी जुगु गरा ना दाडा केवायहे! 20 वीनती करया करो के हीयाळा ना दाडा मे, नीता अराम ना दाडे नाहवा नी पडे; 21 काहाके तीहयी टेमे घण-जबर गरा आवहे, भगवान कळ घड्यो ततयार गेथी हजु लग एतरी मोटी गरा नी आवी हय, एतरी मोटी गरा आवहे। अने अळी एवी गरा कदी नी आवे। 22 कदीम मालीक तीहया दाडा ने कम नी करतो, ता एक बी जीव नी बचता; बाखीन टाळला माणहु नी करते जीमने तीहयो टाळलो से, तीहया गरा ना दाडा ने तीहयो कम कर देदलो से। 23 तीहयी टेमे कदीम कोय तमने केय, “देखो! मसी आजे से ता तमु भरहो नी करजो।” 24 काहाके झटा मसी अने भगवान नु नाम लीन झट मेकण्या माणहु देखाव पडहे, अने एवी भारी सेलाणी अने सेल-भात्या कामु देखाडहे, हय सके ता तीहया टाळला माणहु ने बी भगवान ना भरहा गेथा सेटा करवा नी कोसीत करहे। 25 देखो, आहयी आखी वात मे तमने पेले गेथोत की र्यो। 26 कदीम तीहया तमने केय, देखो, हेलो उजाडी बडा मे से, ता तमु तां नी जजो; नीता, तीहया केय, “तीहयो आजे हारीक कोपरा मे से, ता भरहो नी करजो।” 27 काहाके जीसम वीजळी उगवणी गेथी नीकळीन बुडवणी लग वीजळे, तेमेत मनख्या नो सोरो बी उजन्तो आवहे! 28 जां बी धोड रहे, तांत घुवड्या बी भेळा हय जहे। 29 तीहया दाडा मे जतयार वेला पडहे अने अळतेण दाहडु काळ पड जहे, चांद वीजाळु नी आपे, हरगे गेथा तारा हेटा पड जहे, अने हरग नी ताखत हीलाय देहे। 30 तीहयी टेमे हरगे गेथा मनख्या ना सोरा नी आव्वा नी सेलाणी देखाव पडहे। धरती पोर रेण्या आखी जातीन माणहु फुकु-फुकु रडहे, अने मनख्या ना सोरा ने मोटी ताखत भेळ, अने बडाय भेळ हरग ना वादळा पोर आवतलो देखहे। 31 तीहयो फेपारया वाजा भेळे आहफा ना हरगदुत ने मोकलहे अने तीहया आखी धरती पोर गेथा तीना टाळला माणहु ने भेळा करहे। 32 गुलर ना झाड ना दाखला नी लारे कंय हीको। जतयार तीना डाळ्या मे कुमळ्या डीरा फुटवा बाज जाय अने नवला पान्टा नीकळवा बाज जाय, ता तमु जाण लेवो के उनाळो आव्वा बाज र्यो। 33 आहयीत रीते जतयार तमु मारी केदली आखी वात हयतली देखो, ता जाण लेवो के तीहयो हाते से, अने झापलात पोर से। 34 मे तमने हाचलीन केम के आहयी पीडी ना माणहु ने खततम हयवान पेलेत मारी केदली वात पुरी हयहे। 35 हरग अने धरती टळ जाय, पण मारी वात कदी नी टळे। 36 मनख्या ना सोरा नो आव्वा नो दाडो अने टेम ना बारा मे कोयने मालम नी हय, नीता हरगदुत ने अने नीता सोरा ने आहयो दाडो अने टेम नीसतो भगवान बाह एतरोत जाणे। 37 जीसम नुहा ना दाडा मे हयलु हतु, तेमेत मनख्या नो सोरो आवहे, तीहया दाडे बी हयहे। 38 जे दाडे तक नुहो मोट्ला दुंड्या मे नी भरयो, तांन तक माणहु खाता-पीता, अने वेवा करता हता। 39 अने उचकाहलोत पाणी आयो, अने तीहयो आखा ने डुबाडीन मार नाख्यो, तांन तक अणु कोयने कंय मालम नी पड्यु तेमेत मनख्यान सोरा नु आवणु बी रहे। 40 तीहयी टेमे बे अदमी खेतर मे हहे, ता एक ने चुट लेहे, अने बीजो री जहे। 41 बे बयरा घट्ये दळता हहे, एक जणी ने चुट लेहे, अने बीजी ने रेवा देहे। 42 एतरे जागीन चेतनी रेवो, काहाके तमने नी मालम के तमारो मालीक काना दाडे आवहे।

43 आहयु वारु रीते हमजी लेवो, कदीम घोर ना मालीक ने मालम रेय के चोट्टो राते कानी टेमे आवहे, ता तीहयो जागलो रेय अने आहफा ना घोर मे चोरी नी हयवा देय। 44 एतरे तमु बी तीयार रेवो, काहाके जे घडी ना बारा मे तमु सोचो बी नी, तीहयी घडी मनख्या नो सोरो आय लागहे। 45 “एवो कोय ईमानदार अने अक्कल वाळो, चाकरो से, जीने तीनो मालीक आहफा ना घोर ना पावरया नो मुखी बणावे। अने केय के तु मारा पावरया ने टेमे-टेमे खावा-पीवा नी चीज आप्या करजे? 46 जुगाळो से तीहयो पावरयो, जीनो मालीक आवे, ततयार तीहयो तीने होपलु काम करतलो देखे। 47 मे तमने हाचलीन केम, तीहयो मालीक तीने, आहफा ना आखा माल-धन पोर मुखी बणावीन ठेरावहे। 48 पण कदीम तीहयो बेमान पावरयो तीना मन मे आहयो वीचयार करे के मारा मालीक नी आव्वा मे वार से। 49 करीन तीहयो बीजा हाती पावरया ने टोकवा, अने बीजा हरांग्या हाते खाय-पीय। 50 ता तीहया पावरया नो मालीक एवा दाडे आवहे, जतयार तीहयो तीनी वाट नी जोय र्यो हय। अने एवी टेम मे आवहे, जे तीने मालम नी हय। 51 अने मालीक तीने घण भारी डंड आपहे, अने ढोंगडा करन्या हाते भेसकी देहे, अने तीहया तां हारीक फुकु-फुकु रडहे अने दातु ककडावता रहे।”

25 तीहयी टेमे हरग नु राज तीहयी दह कुवारी सोरीन तेवु रहे, जे आहफा ना दीवा लीन लाडा ने भेटवा करीन जी। 2 तीमनी मेनी पांच वण-अकल्याण हती अने पांच हमजदार हती। 3 तीहयी पांच वण-अकल्याण सोरी दीवा ते लेदी पण दीवा जुगु तेल नी लेदी। 4 पण बीजी पांच हमजदार सोरी दीवा हाते मग्या मे तेल बी ली लेदी। 5 लाडा ने आव्वा मे वार हय जी, ता आखी कुवारी सोरी उंगायवा बाज जी अने हय जी। 6 अने अळतेण आरदी राते कचाट हमळायी, “देखो लाडो आव्वा बाज र्यो। तीने भेटवा करीन चालो।” 7 ता तीहयी आखी कुवारी सोरी उठीन आहफी ना दीवा हच करवा बाज जी। 8 वण-अकल्याण, हमजदार कुवारी सोरी ने केदी, “तमारा तेल मे गेथु थोडुकु तेल आमने बी आप देवो, काहाके अमारा दीवा ओलायवा बाज र्या।” 9 पण हमजदार कुवारी सोरी केदी, “कदीम, अमारी अने तमारी जुगु आहयु तेल पुरी नी पडे। भलु आनीत मे से, के तमु वेचवा वाळानतां जायन तमारी जुगु तेल वेचातु ली लेवो।” 10 अने तीहया कुवारा सोर्या तेल लेवा जवात बाज र्या हता अने नवलो लाडो आय लागयो। तीहयीत टेमे जे तीयार हती, तीहयी तीनी हाते वेवा वाळा घोर मे जत री, अने झापला दी देदा। 11 आनी बाद तीहया बीजा कुवारा सोर्या बी आवीन केदा, “मालीक! ए मालीक! अमारी जुगु बी झापलु उगाड दे।” 12 ता नवलो लाडो जपाप आप्यो, “मे तमने हाचलीन केम, मे तमने नी जाणु।” 13 एतरे चेतनी रेवो, काहाके तमने मनख्या ना सोरा नी आव्वा नी टेम अने दाडो मालम नी हय। 14 हरग राज तीहया माणेह हरकु से, जे पारका देस मे जवा नी टेमे आहफा ना पावरया ने बोलायो अने तीमने आहफा नु धन होप देदो। 15 अने तीहयो एक पावरया ने पांच हजार होना ना सीक्का, बीजा ने बे हजार होना ना सीक्का अने तीसरा ने एक हजार होना ना सीक्का आप्यो। मतलब आखा ने तीमनी ताखत देखीन आप देदो, अळतेण तीहयो पारका देस मे जत र्यो। 16 जीने पांच हजार स्या आपला हता, तीहयो तत्यास्त जायन तीहया

पयहा नु लेणु-देणु कर्यो अने अळी पांच हजार स्प्या कमाय लेदो। 17 एमेत जीने बे हजार होना ना सीक्का आपला हता, तीहयो बी अळी बे हजार होना ना सीक्का कमाय लेदो। 18 पण जीने एक हजार होना ना सीक्का आपला हता, तीहयो ज्यो, अने कादु मे खाडो खोदीन आहफा ना मालीक ना होना ना सीक्का हताड देदो। 19 ढैरत दाडा वीत ज्या अने अळतेण तीहया पावरया नो मालीक पासो आवीन तीमनी पांह हीसाब लेवा बाज ज्यो। 20 जीने पांच हजार होना ना सीक्का आप्या हता, तीहयो अळी पांच हजार कमायन लावीन केदो, “मालीक! तु मने पांच हजार होना ना सीक्का आपलो। देख, मे अळी पांच हजार होना ना सीक्का कमाय लायो।” 21 तीनो मालीक तीने केदो, “घणु वारु, भला अने भरहा लायक पावरया! तु थोडुक मे भरहा लायक र्यो, मे तने ढेरकी चीज पोर हक आपही। तारा मालीक नी खुसी मे साजल्यो बण।” 22 अने जीने बे हजार होना ना सीक्का आपला हता। तीहयो केदो, “ए मालीक तु मने बे हजार होना ना सीक्का आपलो। देख, मे अळी बे हजार कमाय लायो।” 23 तीनो मालीक तीने केदो, “घणु वारु, भला अने भरहा लायक पावरया! तु थोडुक मे भरहा लायक रेलो से, मे तने ढेरकी चीज पोर हक आपही। तारा मालीक नी खुसी मे साजल्यो बण।” 24 ततयार तीहयो आयो, जीने एक हजार स्प्या आपला हता। तीहयो केदो, “मालीक! मने मालम से के तु घणो वातडो से। तु जां नी वेर्यो, तां वाडे, अने जां नी छाट्यो, तां तु हेमटे। 25 एतरे मे बीह ज्यो, अने जायन तारा स्प्या ने कादा मे डार्टीन हताड देदो, अने देख, आहया तारा होना ना सीक्का से, अने आहया पासो ली ले।” 26 तीनो मालीक तीने केदो, “ए वेरी अने ओगज्या पावरया! तने मालम हतु के ‘मे जां नी वेर्यो, तां वाडु, अने जां नी छाट्यो, तां मे हेमटु।’” 27 ता तने मारु धन होवकार्यान तां ली जायन आप देवा हतु, ता मे पासो आवीन वीयाज भेळ मांग लेतो। 28 एतरे आहया एक हजार होना ना सीक्का आनी पांह गेथा मांग लेवो, अने जीनी पांह दह हजार होना ना सीक्का से, तीने आप देवो; 29 काहाके जीनी पांह कंय से, तीनेत अळी आपहे, अने तीनी पांह ढेरत हय जहे; पण जीनी पांह कंय बी नी हय, तीनी पांह गेथु जे बी से तीहयु बी ली लेहे। 30 अने आहया रीकामा पावरया ने बारथु ना अंदारला मे नाख देवो। तां हारीक रडवा अने दातु ककडाववा नु रेहे। 31 जतयार मनखया नो सोरो आहफा बडाय भेळ आवहे, अने आखा हरगदुत तीनी हाते आवहे ता तीहयो आहफा नी बडाय नी राजगादी पोर बहलो रेहे। 32 अने आखा देस ना माणहु तीनी अगळ भेळा करहे। जीसम गुवाळ्यो गाडरा ने बोकडा मे गेथो अलग करे, तेमेत तीहयो आखा माणहु ने एक-बीजा गेथो अलग करहे। 33 तीहयो गाडरा ने आहफा नी जमणी धेडे अने बोकडा ने डाखरी धेडे उबा करहे। 34 ता राजो आहफा ना जमणी धेडे वाळा माणहु ने केहे, “ए मारा बाह ना जुगाळा माणहु! आवो, अने तीहया राज ना हकदारया बणो, जे सुदु गेथु तमारी करते तीयार करलु से; 35 काहाके मे भुकलो हतो, अने तमु मने खवाड्या; मे तरहेलो हतो, अने तमु मने पाणी पीवाडला; मे अंजाणो हतो, अने तमु मने तमारा घोर राख्या; 36 मे नांगरलो हतो, अने तमु मने लुगडा पेराया मे मांदलो हतो, अने तमु मारा खबरया आया; मे जेल मे हतो, अने तमु मने मळवा आया।” 37 आहयी वात हमळीन तीहया

धरमी माणहु मालीक ने केहे, “ए मालीक! आमु कतयार तने भुकलो देखला, अने खवाडला? कतयार तरहेलो देखला, अने पाणी पीवाडला? 38 आमु कतयार तने अंजाणो देखला अने अमारीनतां राख्या? अने कतयार नांगरलो देखला अने लुगडा पेरावला? 39 कतयार तने मांदलो अने जेल मे देखला अने मळवा आवला?” 40 आहयु हमळीन राजो आहयो जपाप आपहे, “मे तमने हाचलीन केम, तमु मारा आहया भायु मे काना नान्ला भाय जुगु बी, जे कंय कर्या, तीहयु मारी जुगु करला से।” 41 “ता तीहयो आहफा ना डाखरी धेडे वाळा माणहु ने केहे, ‘ए खोडला! मारीनतां गेथा सेटा हय जावो। तीहयी जलमकी आकुठी मे जावो, जे भुटडा जुगु ने तीना दुतु जुगु तीयार करलो से; (aiōnios g166) 42 काहाके मे भुकलो हतो, अने तमु मने खाणु नी खवाड्या; मे तरहेलो हतो, अने तमु मने पाणी नी पीवाड्या। 43 मे अंजाणो हतो, अने तमु मने तमारीनतां नी राख्या; मे नांगरलो हतो, अने तमु अने लुगडा नी पेराया, मे मांदलो हतो, अने तमु मारा खबरया नी आया, मे जेल मे हतो अने तमु मने मळवा नी आया।’ 44 ततयार तीहया बी तीने पुसहे, ‘मालीक! आमु कतयार तने भुकलो, तरहेलो, अंजाणो, नांगरलो, मांदलो अने जेल मे कुंडायलो देखला अने तारी चाकरी नी कर्या?’” 45 ता तीहयो तीमने जपाप आपहे, “मे तमने हाचलीन केम, जे कंय तमु मारा आहया नान्ला गेथा बी नान्ला मेना एक जुगु बी नी कर्या, तीहयु मारी जुगु बी नी कर्या मुजुक से। 46 अने ईसम करीन आहया वेरी ने जलमको डंड जडहे, पण धरमी ने अमरकाय जीवाय जडहे।” (aiōnios g166)

26 अने ईसु आखी वात कीदीन आहफा ना चेला ने केदो, 2 “तमु जाणो के बे दाडान बाद फसह नो तीवार से। ता मनखया ना सोरा ने कुस्स पोर चडावीन मारवा करीन माणहु धराय देहे।” 3 तीहयी टेमे डायला पुंजारा अने डायला पुडारी केफा नाम ना डायला पुंजारा नी हवेली मे भेळा हया। 4 अने तीहया आसम करीन वीच्यार कर्या के आमु केम करीन ईसु ने धरायन मराय नाखीया। 5 पण तीहया केता के “तीवार ना दाडे आसम नी करवा जोवे, कंखर आसम नी हय जाय के आखा माणहु दंगो फसात करे।” 6 जतयार ईसु बेतन्या मे सीमोन कुडावा ना घोर मे हतो, 7 ता एक बयर मोगला दगडा नी हीही मे घण मोगलु ईततर लीन आयी। अने ईसु खाणु खावा बह र्यो हतो, ता ईसु ना मुंडा पोर रेड देदी। 8 आहयु देखीन ईसु ना चेला रीहवायन केदा, “आहयु ईततर ने उडडेत काहा बगाड देदी? 9 आहयु ईततर घणु मोगु वेचात, अने जे स्प्या आवता तीहया स्प्या ने गरीब मे वाट देती ता वारु रेतु।” 10 ईसु आहयु जाणीन, चेला ने केदो, “तमु आहयी बयर ने काहा दम रया? आहयी मारी वाटु भलु काम करली से। 11 गरीब ते जलम तमारी हाते रेहे, पण मे जलम तमारी हाते नी री सकु। 12 आहयी मारा डील पोर जे ईततर रेडली से तीहयी मने गाडवा करीन तीयार करली से। 13 मे तमने हाचलीन केम, आखी कळी मे जां-जां मारी खुस-खबर ने परच्यार करहे, तां आहयी बयर नी फोम मे, आना काम ने बी नामलहे।” 14 अळतेण ईसु ना बारे चेला मेनो एक जणो, जीनु नाम यहदा ईस्करीयोती हतु, तीहयो डायला पुंजारान तां ज्यो, 15 अने तीहयो केदो, “कदीम मे ईसु ने तमारा हात मे धराय देम, ता तमु मने हु आपहु? तीहया तीने चांदी ना तीस स्प्या गणीन आप देदा।” 16

तीहयी टेमे गेथो यहदा ईसकरयोती ईसु ने धरावला नो वारु मोखो होदतो रयो। 17 पण खमीर वगर ना रोट्ला ना तीवार ना पेलना दाडे, ईसु ना चेला ईसु ने आवीन केदा, “तु फसह तीवार नु खाणु कां हारो खावा हीड रयो? तां हरा आमु जीया, तने तारी जुगु फसह ना तीवार नु खाणु तीवार करया?” 18 अने ईसु केदो, “हेर मे तीहया अदमीनतां जावो, अने तीने केवो, ‘मासुतर आहयु की रयो के मारी टेमे हाते आय जेली से, मे मारा चेला हाते तारा घोर फसह तीवार नु खाणु खाही!’” 19 अने ईसु ना चेला जेम ईसु केदो, तेम करया, अने फसह ना तीवार नु खाणु तीवार करया। 20 अने हांती टेमे ईसु बारे चेला हाते खाणु खावा बहयो। 21 अने खाणु खावा नी टेमे ईसु तीमने केदो, “मे तमने हाचलीन केम, तमारी मेनो एक जणो मने धोको दीन धराय देहे।” 22 अने तीहया चेला घणा होहवाय जया। अने तीमनी मेना एक-एक जणो ईसु ने पुसवा बाज जया, “ए मालीक! हु तीहयो मे से?” 23 ततयार ईसु केदो, “जे मारी हाते एक थाळी मे खाणु खाय तीहयो मने धोका सी धरावहे। 24 मनखया ना सोरा ने ते जवानुत से जेम तीना बारा मे लीखलु से; पण तीहया माणेह जुगु घणी दुख नी वात से, जे मनखया ना सोरा ने धरायो! तीहयो माणेह पयदा नी हयतो ता वारु रेतु।” 25 ता तीने धरावला वाळो यहदा ईसु ने पुळ्यो, “ए मासुतर! तीहयो मे ते नी हय हु? मे से?” ईसु तीने केदो, “होव, हाचलीन तु की देदलो से।” 26 जतयार तीहया खाणु, खावा बाज रया हता, ता ईसु हात मे रोदलो धरयो, अने रोदला जुगु तु घणो वारु से कीन रोदलो भांगीन आहफा ना चेला ने आप्तो जायन केदो, “लेवो, आहया रोद्ला ने खाय लेवो, आहयो रोदलो मारु डील से।” 27 अळतेण ईसु पीयालो हात मे धरीन घणो वारु से कीन चेला ने आहयु केतो जायन आप्यो, “तमु आखा आनी मे गेथु पीवो। 28 काहाके आहयो पीयालो मारा वायदा नु लोय से, जे आखा माणहु ना पाप नी माफी नी लेदे वयवा वाळु से। 29 मे तमने केम, हमणे गेथो जतयार लग मारा बाह ना राज मे तमारी हाते नवला अंगुर नो रोह नी पी लेम, तांह तक मे आहयु अंगुर नु नवल रोह कदी नी पीम।” 30 अळतेण तीहया फसह तीवार नु भजन गावीन जेतुन ना बडा पोर जत रया। 31 तीहयी टेमे ईसु तीमने केदो, “आज रातेत तमारो आखा नो भरहो मार पोर नी रया। काहाके खरली सासुतर मे आहयु लीखलु से: मे गुवाळ्या ने मार नाखही, अने गाडरा नो टोळो रीवण्या-तीवण्या हय जहे, 32 पण मे पासो जीवतो हयन अळतेण तमारी गेथो पेल्ले गलील जीला मे जत रेही।” 33 एतरा मे पतरस ईसु ने केदो, “भले, आखा तार पोर गेथा भरहो सोड देय, पण मे कदी नी सोडु।” 34 ईसु पतरस ने केदो, “मे तने हाचलीन केम, आहयीत राते, कुकडो वाहवान पेल्ले, तु मने तीन काव नीकारो करही।” 35 पतरस अळी ईसु ने केदो, “कदीम तारी हाते मने भले मरवा बी पडे, ते बी मे तारो नीकारो नी करु।” अने आखा चेला हेमेत केदा। 36 जतयार ईसु चेला हाते गतसमनी नाम नी वाडी मे आयो, ता तीहयो आहफा ना चेला ने केदो, “जतयार लग मे हेले जायन वीनती करीन पासो नी आवु, ततयार लग तमु आजेत बहजो।” 37 अळतेण ईसु पतरस ने अने जबदी ना बे सोरा ने हाते ली ज्यो, अने तीहयो होहवायन अने घबरायवा बाज जयो। 38 अळतेण ईसु तीमने केदो, “मारो मन घण-जबर दूखी से, अने मारो जीव नीकळवा हीडे; तमु आजे रेवो, अने मारी हाते चेतीन रीन जागला

रेवो।” 39 ईसु थोडोक अगो जायन अळतेण तीहयो धरती पोर हुंगो वळीन वीनती करयो, “ए मारा बाह! कदीम तारी मरजी हय, ता आहयो दुख नो पीयालो टाळ दे। ते बी मारी नी पण तारीत मरजी पुरी हयो।” 40 अळतेण तीहयो आहफा ना चेलान तां ज्यो, अने तीमने हुवतला देख्यो। अने पतरस ने केदो, “तमने मारी हाते एक घंटो बी नी जगायु हु? 41 जागला रेवो अने वीनती करता रेवो, आनीन करते के तमु पारख मे नी पडो: आत्मा ते तीयार से, पण डील कमजोर से।” 42 ईसु एक कावा अळी, जायन, आहयी वीनती करयो, “ए मारा बाह! कदीम आहयो पीयालो मारा पीया वगर नी टळे, ता तारीत मरजी पुरी हयो।” 43 अळतेण ईसु अळी पासो आयो, ता तीहयो अळी आहफा ना चेला ने हुवतला देख्यो, काहाके तीहया नीदरायला हता। 44 तीहयो तीमने सोडीन अळी वीनती करवा जयो, अने वीनती ना तीहयात बोलु कीन तीसरी कावा वीनती करयो। 45 अळतेण ईसु आहफा ना चेलानतां आवीन तीमने केदो, “तमु हजु लग हवीन अरामेत करवा बाज रया हु? देखो! हाव तीहयी टेम आय जेली से, जतयार मनखया नो सोरो पापी माणहु ना हात मे होप देहे। 46 उठो! आपणु जीया, देखो, मने धोको दीन धरावला वाळो हातेत आवला बाज रयो।” 47 ईसु आहयु केवात बाज रयो हतो के बारे चेला मेनो एक जणो, जीनु नाम यहदा ईसुकरयोती हतु, तीहयो आय लाग्यो। तीनी हाते छैरत माणहु तलवारया अने डींगा लीन आय लाग्या। जीमने डायला पुंजारा अने डायला पुडारया मोकलला हता। 48 ईसु ने धोको दीन धरावला वाळो यहदा तीमने आहयु कीन सेलाणी आपलो हतो, “मे जीने कुको देही, तीहयोत ईसु से। तीने धर लेजो।” 49 अळतेण तीहयो यहदा ईसुनतां आवीन केदो, “ए मासुतर! वारलो से के?” अने तीहयो ईसु ने कुको देदो। 50 ईसु तीने केदो, “दोसुतीदार! जे कामे तु आवलो से, तीहयु काम कर ले।” ता तीहया माणहु अगा आया, अने ईसु ने चपटीन धर लेदा। 51 अने एतरात मे ईसु ना हाती मेनो एक जणो आहफा नी तलवार मीयान मे गेथी नीकाळीन डायला पुंजारा ना पावरयो नो झाटको दीन कानटो तोड नाख्यो। 52 ततयार ईसु तीने केदो, “तलवार मीयान मे पासी घाल ले, काहाके जे तलवारये करीन बीजा माणहु ने झटकावे तीहया तलवारये सी मर जहे। 53 तमने आहयी वात हमज नी आवती हु, के मे मारा बाह सी वीनती करही ता, तीहयो हरगदुत ना बारे टोळा गेथा बी जादा टोळा मोकली देहे? 54 पण कदीम मे आसम वीनती करीन हरगदुत बोलाय लेही ता खरली सासुतर मे लीखली वात केम पुरी हयहे?” 55 तीहयीत टेमे ईसु माणहु ने केदो, “तमु मने डाकु हमजीन, तलवारया अने डींगा लीन मने धरवा आय रया हु? मे ते दाडनिन मंदीर मे बहीन हीकापण आप्या करतलो, तीहयी टेमे तमु मने काहा नी धरया? 56 आहयु आखु आनीन करते हय रसु के भगवान वगे गेथा केणया माणहु नी लारे जे बी केदलु हतु तीहयु आखु पुर हय जाय।” अळतेण आखा चेला ईसु ने रेवा दीन नाह पड्या। 57 अने ईसु ने धरावला वाळा, तीने धरीन डायला पुंजारा केफान तां, जां हरा डायला पुडारी अने चोखली सासुतर हीकाडन्या भेळा हय रया हता। 58 अने पतरस बी थोडोक सेटो रीन ईसुन पसळ-पसळ आयो अने डायला पुंजारा ना घोर ना आंगणा मे ज्यो, अने ईसु हाते हयतलु तीहयु देखवा करीन रखवाळ्या पावरया हाते बह ज्यो। 59 डायला पुंजारा अने

मोट्टली पंचु ना माणहू मेळीन ईसु ना वीरोद मे वाक काडीन मारवा करीन झुटा गवा होद रया हाता। 60 पण तीमने ईसु नो वाक नी नीकळ्यो। भले झुटा गवा अगा आवीन झुटी गवा देदा। आखरी मे बे जणा अगा आया 61 अने केदा, “आहयो अदमी केदलो, ‘मे भगवान ना मंदीर ने ओदार देही, अने तीन दाडा मे तीने अळी उबो कर देही।’” 62 अळतेण डायलो पुंजारो उबो हयन ईसु ने केदो, “आहया माणहू तारा वीरोद मे आहयी गवाय दी रया, तीमान वीरोद मे कंय नी केणु हय हू?” 63 पण ईसु होगो हय रयो। अळतेण डायलो पुंजारो ईसु ने केदो, “जीवतला भगवान नी तने आण घालु कदीम तु भगवान नो सोरो मसी हय, ता आमने कदिदे।” 64 ईसु केदो, “होव, तु केदो तेमते से। मे तमने आहयु बी केम, हाव गेथा तमु नीसता मनखया ना सोरा ने आखा मे जोरभरया भगवान ना जमणी धेडे बह रेलो अने हरग ना वादळा पोर आवतलो देखह।” 65 एतरु हमळीन डायलो पुंजारो आहफा ना लुगडा फाडीन केदो, “आहयो भगवान नो वाक काडलो से। ता आमने गवा नु काम नी हय? हमणेत तमु आहया ईसु ने भगवान नो जबरण वाक काडतलो हमळला से। 66 तमु आखा नो हू वीच्यार से?” तीहया केदा, “आहयो मोत नो डंड आपे एवो से।” 67 अळतेण तीहया ईसु ना मोडा पोर थुपया अने तीने डीक देदा, अने थोडाक माणहू तीने थपडाट्या, 68 अने आहयु केदा “ए मसी! कदीम तु भगवान वगे गेथी वात केणयो माणेह हय, ता आमने कदि के तने कोय देदु?” 69 अने पतरस तीहयी टेमे बारथो आंगणा मे बह रयो हतो। अने एक पावरयाण सोरी हाते आवीन तीने केदी, “तु बी गलील वाळा ईसु हाते हतो।” 70 पण पतरस आखा अगळ ईसु नो नीकारो करतो जायन केदो, “तु हू केवा बाज री मे नी जाणतो।” 71 अळतेण पतरस झापला नी पयडी भणी ज्यो, पण एक अळी बीजी पावरयाण तीने देखी अने तां हारीक उबा हय रेला माणहू ने केदी, “आहयो अदमी बी ईसु नासरी हाते हतो।” 72 एक काव अळी पतरस नीकारो करयो अने आण घालीन केदो, “मे हीयया अदमी ने जाणु लग नी।” 73 अने थोडीक वार मे तां उबा हय रेला माणहू पतरस ने तां जायन केदा, “हाचलीन, तु बी तीमनी मेनो एक जणो से; काहाके तारी बोली चोखीझण उजनतो कर देय के तु तांत वाळो से।” 74 आहयी वात हमळीन पतरस भलु भुंडु कीन हाम खायन केवा बाज ज्यो, “मे हीयया अदमी ने जाणु लग नी।” अने तेतरी घडी कुकडो वाह देदो। 75 अने ततयार पतरस ने ईसु जे केदलो तीहयु फोम आयु, “कुकडो वाहवान पेले तु मारो तीन कावा नीकारो करही।” अने तीहयो बारथो नीकळीन पुक-पुक रडवा बाज ज्यो।

27 हवारे वेगात डायला पुंजारा अने माणहू ना डायला पुडारी आखा मेळीन ईसु ने मार नाखवा नी योजना बणाया। 2 अने अळतेण तीहया ईसु ने बांदीन ली जया अने डायला अदीकारी पीलातुस ना हात मे होप देदा। 3 जतयार ईसु ने धराववा वाळो यहदा आहयु देखयो के तीहया ईसु ने गुनाळ्ळो ठेरावीन डंड आप देदा, ता यहदा ने घणो दुख लागयो, अने तीहयो डायला पुंजारान्तां अने पुडारयान्तां चांदी ना तीस स्प्या पासआ आपवा ज्यो, 4 अने तीहयो केदो, “मे वण-गुनाळ्ळा माणेह ने मार नाखवा करीन धरावीन पाप करलो से।” पण तीहया माणहू केदा, “आमु हू करया! हीययी वात तुत देख ले।” 5 आहयु हमळीन यहदा चांदी ना सीक्का मंदीर मे नाख देदो अने

जायन गळा मे दोडु बांदीन टंगायन मर ज्यो। 6 डायला पुंजारा चांदी ना स्प्या चुटीन केदा, “आहया स्प्या ने खजाना मे मेकवा वारु नी हय, आहया ते लोय ना दाम से।” 7 एतरे तीहया वीच्यार काड्या अने अळतेण तीहया स्प्या नो, माणहू ने गाडवा करीन कुमायडा नु खेतर वेचातु ली लेदा। 8 एतरे तीहयो खेतर आज लग लोय नो खेतर केवाये। 9 आहयी रीते यीरम्या, भगवान वगे गेथो वात केणया नो आहयो बोल पुरो हयो: “तीहया चांदी ना तीस स्प्या लीन जया, आहया स्प्या ईस्रायल ना माणहू आपवा करीन बोली करला हाता। 10 अने जेम मालीक मने हुकम आपलो हतो तीनात अनसारे तीहया स्प्या आपीन कुमायडा नु खेतर वेचातु ली लेदा।” 11 ईसु हाव रोमी अदीकारी पीलातुस अगळ उबो हय रयो हतो। रोमी अदीकारी तीने पुळ्यो, “तु यहदी नो राजा से हू?” ईसु केदो, “होव, जेम तु केदो तेमते से।” 12 जतयार डायला पुंजारा अने डायला पुडारी तीना पोर गुनो लगाडता हाता, ता ईसु तीमने कंय नी केदो। 13 ततयार पीलातुस ईसु ने पुळ्यो, “तने नी हमळायतु हू के आहया तार पोर केतरा गुना लगाड रया?” 14 ते बी ईसु जपाप मे एक बोल बी नी केदो। आनीन करते रोमी अदीकारी घण-जबर वहराय ज्यो। 15 फसह ना तीवार ना दाडे अदीकारी नी आहयी रीती हती के तीहयो आहया तीवार पोर काना बी एक केदडा ने माणहू नी मरजी नी अनसारे जेल मे गेथा छोड्या करतो हतो। 16 तीहयी टेमे तां हारो एक बरबबा नाम नो एक डामीस केदडो जेल मे हतो। 17 एतरे पीलातुस भेळा हय रेला माणहू ने केदो, “तमने हू जोवे? मे तमारी ज्यु कोयने सोड देम? बरबबा ने के मसी केवायवा वाळा ईसु ने सोडु?” 18 पीलातुस ने मालम हतु, के तीहया ईसु मसी ने कुहराये धरावला से। 19 पीलातुस जतयार नीयाव नी गादी पोर बह र्यो हतो ता तीनी घोरवाळी तीने आहयी खबर की मोकली, “हीयया धरमी माणेह ने कंय बी डंड नी आपजे, काहाके हीनात कारण सी मने आज राते हपना मे घणी वेला झेलवा पडली से।” 20 पण डायला पुंजारा अने डायला पुडारी माणहू ने मनवी लेदा के तमु पीलातुस ने केवो के तु बरबबा ने सोड दे अने ईसु ने मराय नाख। 21 अदीकारी पीलातुस अळी तीमने पुळ्यो, “तमने हू जोवे? मे आहया बे जणा मेना ने कोयने सोड देम?” तीहया केदा, “बरबबा ने सोड दे।” 22 एतरे पीलातुस तीमने केदो, “ता मे ईसु नु हू करु, जे मसी केवाये?” आखा की पड्या, “ईने कुस्स पोर चडावो।” 23 पण पीलातुस पुळ्यो, “काहा? हीययो कानो गुनो करलो से?” बाखीन तीहया अळी बी ज्यारे आडीन केदा, “ईने कुस्स पोर चडावो।” 24 पीलातुस आहयु देखयो के आहया मारी वात नी हमळता अने उलटो दंगो हय रयो, ता तीहयो पाणी मांगीन माणहू अगळ हात धोयो अने केदो, “मे आहया धरमी माणेह ना लोय नो गुनाळ्ळो नी हया। आहयी वात ने तमुत जाणो।” 25 अने आखा माणहू जपाप आप्या, “आनु लोय वयाडवा नो गुनो अमारी पोर, अने अमारी अबलयात पोर पडवा दे।” 26 अळतेण पीलातुस तीमनी ज्यु बरबबा ने सोड देदा, अने ईसु ने चपका दीन कुस्स पोर चडावो करीन सीपायडा ना हात मे होप देदो। 27 अळतेण रोमी अदीकारी पीलातुस ना सीपायडा ईसु ने हवेली ना आंगणा मे ली जायन तीनीन्तां आखा सीपायडा ना टोळा भेळा कर लेदा। 28 तीहया तीना लुगडा काडीन तीने रातलु नाबलु डगलु पेरया, 29 अने काटा वाळा झाटवा नु मुळ्यु

गुथीन तीना मुंडा पोर मेल्या, अने तीना जमणा हात मे वाहन नी होटी धराय देदा। अने तीहया तीनी अगळ मांडा टेकीन आहयु केता जायन तीनी हाही उडाडता जीन केदा, “ए युहदी ना राजा वारलो से के!” 30 अने तीहया तीना मोडा पोर थुप्या अने तीना हात मे वाळी वाहन नी होटी तीना मुंडा पोर देता ज्या। 31 अळतेण तीहया तीनी हाही कर चुक्या ता तीहया तीनु नाबलु डगलु नीकाळ देदा अने तीने तीनात लुगडा पेराया अने तीने कुस्स पोर चडाववा करीन ली ज्या। 32 जतयार तीहया हेर मे गेथा नीकळीन जवा बाज र्या हाता, ता तीमने कुरेनी गाम मे रेणयो सीमोन नाम नो एक माणेह भेटयो। अने तीहया तीने ईसु नु कुस्स जोर करीन उचलाइया। 33 तीहया गुलगुता नाम ना जागे पुग्या, जीनु मतलब से, “माणहु ना खोपडी नो जागो।” 34 तां तीहया माणहु ईसु ने कडवलु भेसकायलु अंगुर नो रोह पीवा आप्या। तीहयो तीहया रोह ने चाखी ते लेदो, पण पीवा सी मना कर देदो। 35 ततयार तीहया ईसु ने कुस्स पोर चडाया, अने चीट्ट्या नाखीन तीना लुगडा वाट लेदा। 36 अळतेण तीहया तां बहीन ईसु नो पहरो देवा बाज ज्या। 37 अने तीहया ईसु ना मुंडा गेथी उपर कुस्स पोर गुनो लीखीन एक चीट्टी ठोक देदा, के आहयु युहदया नो राजा मसी से। 38 तीहया ईसु हाते बे चोट्टा ने बी कुस्स पोर चडाया, एक ने तीना जमणी धेडे अने एक ने तीना डाखरी धेडे चडाया। 39 अने तां मायन आव्वा अने जवा वाळा माणहु मुंडु हीलावीन तीनी हाही उडाडता हाता अने तीनो वाक काड्या। 40 अने ईसम केता हाता, “ए मंदीर ने हूदारवा वाळा अने तीन दाडा मे तीने पासो बणाववा वाळा। कदी तु भगवान नो बेटो हय ता, आहफा ने बचाड, अने कुस्स पोर गेथो उतरीन आव।” 41 आहयी रीते, डायला पुंजारा बी चोखली सास्तर हीकाडन्या अने डायला पुडारी हाते, ईसम केता जायन तीनी हाही उडाडता हाता, 42 “हीय्यो बीजा ने बचाड्यो, पण आहफा ने नी बचाड सक्यो। आहयो ते ईसरायली माणहु नो राजा से। हाव कुस्स पोर गेथो उतरीन आव, ता आमू आनी पोर भरहो करहु। 43 आहयो भगवान पोर भरहो करे। कदीम भगवान हीने छुटकारो आपवा हीडतो हय, ता हीने सोडाय ले। काहाके आहयो केदलो हतो, ‘मे भगवान नो सोरो से।’” 44 आडे-धेडे कुस्स पोर चडावला डाकु बी आहयी रीते वाक काडीन हाही उडाडता हाता। 45 माथे दाडे सी मांजणीक दाडे लग आखा देस मे अंदास सवायलु रसु। 46 मांजणीक दाडे ईसु ज्योरेत आडीन केदो, “एली! एली! लमा सबकतनी?” आनु मतलब “ए मारा भगवान, ए मारा भगवान, तु मने काहा सोड देदो?” 47 जे तां उबा रेवा वाळा माणहु मे सी थोडाक आहयु हम्मळीन केवा बाज ज्या, आहयो ते एलीया ने आडवा बाज रयो। 48 अने तीमनी मे गेथो एक ममार दवड्यो, अने पोतु ने लीन अंगुर ना कडवला रोह मे डुबाइयो अने वाहन ना टोकरा पोर मेलीन तीने चुहाइयो। 49 थोडाक माणहु केदा, रेवा दे! देखजे हीने एलीयो बचाडवा आवे के नी आवे। 50 अने अळतेण ईसु ज्योरेत आड्यो अने जीव सोड देदो। 51 तीहयी टेमे मंदीर नो पडदो उपर गेथो हेदो लग, फाटीन बे ठेपाडा हय ज्यो, धरती हील जी अने चाफर्या फाट ज्या 52 अने तीहयी टेमे मडाट्या लग उगडी ज्या, अने भगवान ना मरला चोखला माणहु ना धोडु पासा जीवता हय ज्या। 53 अने तीहया मडाट्या मे गेथा नकळी आया अने ईसु ने जीवतो हयवान

अळतेण यस्सलेम ना चोखला हेर मे जायन ढेरत माणहु ने देखाव पड्या। 54 सुबेदार अने तीनी हाते ईसु नो पेहरो देण्या सीपायडा धरती हीलीन धदडनु अने जे कंय हयु तीहयु आखु देखीन घण-जबर बीही ज्या, अने की पड्या, हाचलीन! आहयो भगवान नो सोरो हतो। 55 तां ढेरत बयरा बी उबा हय रया हाता। तीहया ईसु नी सेवा-चाकरी करवा करीन गलील जीला मे गेथा तीमनी हाते-हाते आवला हाता। 56 तीमनी मे मरीयम मगदलीनी, याकुब अने यूसुफ नी आयह मरीयम, अने जबदी ना सोरा नी आयह हती। 57 हांती टेमे अरीमीतीया हेर नो एक मालदार अदमी आयो। तीनु नाम यूसुफ हतु, अने तीहयु बी ईसु नो चेलो बण जेलो हतो। 58 तीहयो पीलातुस नी तां जायन ईसु नो धोड मांग्यो, अने पीलातुस हुकम आप्यो के धोड यूसुफ ने आप देवो। 59 यूसुफ ईसु नो धोड ली ज्यो, अने तीना धोड ने एक धोळला लुगडा मे लपट्यो। 60 अने आहफा जुगु चाफर्या मे खोडाडीन बणावला मडाट्या मे तीहया धोड ने मेक देदो, अने तीहयो चाफर्या ना मडाट्या ना झापला पोर मोटलो दगडो ढबळावीन जत रयो। 61 मरीयम मगदलीनी अने बीजी मरीयम तां मडाट्या अगळ बही री हती। 62 अराम ना दाडा नी तीयारी ना बीजा दाडे डायला पुंजारा अने फरीसी पंथवाळा भेळा हयन पीलातुस नी तां ज्या। 63 अने केदा, “ए मालीक! आमने फोम से के तीहयो धोको देवा वाळो जतयार जीवतलो हतो, ता केदलो हतो के ‘मे तीसरे दाडे अळी पासो जीवतो हय जही।’” 64 एतरे तीन दाडा लग मडाट्या नी रखवाळी करवा नो हुकम आप। कदीम ईसम नी हय जाय, के तीना चेला हीने चोरी करीन लीतती रेय, अने माणहु सी केय के ईसु मरला मे गेथो पासो जीवतो हय ज्यो। आहयो पासलो धोको ते पेल्ला धोका गेथो बी जादा रददी हयहे।” 65 पीलातुस केदो, “पहरो देण्या सीपायडा ने ली जावो, अने जीसम तमने हमज मे आवे तेमेत मडाट्या नी रखवाळी करजो।” 66 तीहया ज्या अने मडाट्या ना झापला पोर लागला दगडा पोर सील लगाड देदा। अने मडाट्या नी रखवाळी करवा बाज ज्या।

28 अराम ना दाडान बाद हपता ना दाडे परगड फाटतेत मरीयम मगदलीनी अने बीजी मरीयम मडाट्या ने देखवा आयी। 2 अने देखो, धरती हीली, काहाके मालीक नो एक दुत हररो गेथो उतर्यो अने हाते आवीन तीहयो दगडा ने ढबळाय देदो, अने तीनी पोर बह ज्यो। 3 तीनो सप वीजळीन तेम अने तीना लुगडा बरप ने तेम धोळा हाता। 4 तीना बीक सी झापले पेहरो देण्या काप उट्या, अने मरला हरका हय ज्या। 5 हरगदुत बयराम ने केदो, “ना बीहो, मे जाणु के तमु ईसु ने जे कुस्स पोर चडावला तीने होदवा बाज री 6 तीहयो आजने नी हय, पण आहफा बोलु नी अनसारे जीवतो हयलो से। आवो, आहयो जागो देखो, जां ईसु मालीक ने मेकला हतो, 7 अने ममार जायन तीमना चेला मे केवो के तीहयो मरला मे गेथो पासो जीवतो हय जेलो से, अने तीहयो तमारी गेथो पेले गलील मे जत रयो, तां तीने देखहु! देखो, मे तमने देखाड देदो।” 8 अने तीहया बीक अने मोटी खुसी हाते मडाट्या मे सी ममार पासी आवीन तीमना चेला मे खबर आपवा दवडी पडी। 9 ततयार ईसु तीमने भेट्यो। अने केदो, “सुखी रेवो” तीहया हाते आवीन अने तीना पोग धरीन तीने वांद्या। 10 ततयार ईसु तीमने केदो, “ना बीहो; मारा भायु सी जायन केवो के गलील मे जत रेय तां मने देखहु।” 11 तीहयी जवात बाज री

हती के पेहरो देण्या मे गेथा थोडाक माणहु हेर मे आवीन आखी वात डायला पुंजारा ने हमळाया। 12 तत्तयार तीहया डायला पुडारी नी हाते भेळा हयन वीच्यारीन अने सीपायडा ने ढेरका चांदी ना सीक्का आपया, 13 अने केदा, “आहयु केजो के राते जत्तयार आमु हुव्वा बाज रेला हता, तत्तयार ईसु ना चेला आवीन तीना धोड ने चोरी कर ली ज्या। 14 अने आहयी वात मुखी-डायला ना कानटा लग पुग जहे, ता आमु तीने हमजाड लेहु अने तने फीकर करवा सी बचाड लेहु।” 15 तीहया स्प्या लीन जेम हीकाडला हता, तेमेत कर्या। आहयी वात आज लग युहदया मे चाल री। 16 गयारे चेला गलील मे तीहया बडा पोर ज्या, जीने ईसु तीमने देखाडलो हतो। 17 जत्तयार तीहया ईसु ने देख्या ता तीनी भक्ती कर्या। पण कोय-कोय ना मन मे सणका हयी। 18 ईसु तीमनी हाते आवीन केदो, “हरग अने धरती नो आखो हक मने आपलो से। 19 आनीन करीन तमु जावो, आखा राज्य ना माणहु ने चेला बणावो; अने तीमने बाह, अने सोरा, अने चोखली आत्मा नी नाम सी बपतीसमा आपो, 20 अने तीमने आखी वातु जे मे तमने हुकम आपलो से, मानवा हीकाडो: अने देखो, मे कळी ना आकरी लग सदा तमारी हाते से।” (aiōn g165)



The New Jerusalem

"I saw the holy city, New Jerusalem, coming down out of heaven from God, prepared like a bride adorned for her husband. I heard a loud voice out of heaven saying, 'Behold, God's dwelling is with people, and he will dwell with them, and they will be his people, and God himself will be with them as their God.'"

Revelation 21:2-3

Reader's Guide

Bareli, Palya at AionianBible.org/Readers-Guide

The Aionian Bible republishes public domain and Creative Common Bible texts that are 100% free to copy and print. The original translation is unaltered and notes are added to help your study. The notes show the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of afterlife destinies.

Who has the authority to interpret the Bible and examine the underlying Hebrew and Greek words? That is a good question! We read in 1 John 2:27, *"As for you, the anointing which you received from him remains in you, and you do not need for anyone to teach you. But as his anointing teaches you concerning all things, and is true, and is no lie, and even as it taught you, you remain in him."* Every Christian is qualified to interpret the Bible! Now that does not mean we will all agree. Each of us is still growing in our understanding of the truth. However, it does mean that there is no infallible human or tradition to answer all our questions. Instead the Holy Spirit helps each of us to know the truth and grow closer to God and each other.

The Bible is a library with 66 books in the Protestant Canon. The best way to learn God's word is to read entire books. Read the book of Genesis. Read the book of John. Read the entire Bible library. Topical studies and cross-referencing can be good. However, the safest way to understand context and meaning is to read whole Bible books. Chapter and verse numbers were added for convenience in the 16th century, but unfortunately they can cause the Bible to seem like an encyclopedia. The Aionian Bible is formatted with simple verse numbering, minimal notes, and no cross-referencing in order to encourage the reading of Bible books.

Bible reading must also begin with prayer. Any Christian is qualified to interpret the Bible with God's help. However, this freedom is also a responsibility because without the Holy Spirit we cannot interpret accurately. We read in 1 Corinthians 2:13-14, *"And we speak of these things, not with words taught by human wisdom, but with those taught by the Spirit, comparing spiritual things with spiritual things. Now the natural person does not receive the things of the Spirit of God, for they are foolishness to him, and he cannot understand them, because they are spiritually discerned."* So we cannot understand in our natural self, but we can with God's help through prayer.

The Holy Spirit is the best writer and he uses literary devices such as introductions, conclusions, paragraphs, and metaphors. He also writes various genres including historical narrative, prose, and poetry. So Bible study must spiritually discern and understand literature. Pray, read, observe, interpret, and apply. Finally, *"Do your best to present yourself approved by God, a worker who does not need to be ashamed, properly handling the word of truth."* 2 Timothy 2:15. *"God has granted to us his precious and exceedingly great promises; that through these you may become partakers of the divine nature, having escaped from the corruption that is in the world by lust. Yes, and for this very cause adding on your part all diligence, in your faith supply moral excellence; and in moral excellence, knowledge; and in knowledge, self-control; and in self-control patience; and in patience godliness; and in godliness brotherly affection; and in brotherly affection, love. For if these things are yours and abound, they make you to be not idle nor unfruitful to the knowledge of our Lord Jesus Christ,"* 2 Peter 1:4-8.

Glossary

Bareli, Palya at AionianBible.org/Glossary

The Aionian Bible un-translates and instead transliterates eleven special words to help us better understand the extent of God's love for individuals and all mankind, and the nature of afterlife destinies. The original translation is unaltered and a note is added to 64 Old Testament and 200 New Testament verses. Compare the meanings below to the Strong's Concordance and Glossary definitions.

Abyssos g12

Greek: proper noun, place

Usage: 9 times in 3 books, 6 chapters, and 9 verses

Meaning:

Temporary prison for special fallen angels such as Apollyon, the Beast, and Satan.

aidios g126

Greek: adjective

Usage: 2 times in Romans 1:20 and Jude 6

Meaning:

Lasting, enduring forever, eternal.

aiōn g165

Greek: noun

Usage: 127 times in 22 books, 75 chapters, and 102 verses

Meaning:

A lifetime or time period with a beginning and end, an era, an age, the completion of which is beyond human perception, but known only to God the creator of the aiōns, Hebrews 1:2. Never meaning simple endless or infinite chronological time in Greek usage. Read Dr. Heleen Keizer and Ramelli and Konstan for proofs.

aiōnios g166

Greek: adjective

Usage: 71 times in 19 books, 44 chapters, and 69 verses

Meaning:

From start to finish, pertaining to the age, lifetime, entirety, complete, or even consummate. Never meaning simple endless or infinite chronological time in Koine Greek usage. Read Dr. Heleen Keizer and Ramelli and Konstan for proofs.

eleēsē g1653

Greek: verb, aorist tense, active voice, subjunctive mood, 3rd person singular

Usage: 1 time in this conjugation, Romans 11:32

Meaning:

To have pity on, to show mercy. Typically, the subjunctive mood indicates possibility, not certainty. However, a subjunctive in a purpose clause is a resulting action as certain as the causal action. The subjunctive in a purpose clause functions as an indicative, not an optative. Thus, the grand conclusion of grace theology in Romans 11:32 must be clarified. God's mercy on all is not a possibility, but a certainty. See ntgreek.org.

Geenna g1067

Greek: proper noun, place

Usage: 12 times in 4 books, 7 chapters, and 12 verses

Meaning:

Valley of Hinnom, Jerusalem's trash dump, a place of ruin, destruction, and judgment in this life, or the next, though not eternal to Jesus' audience.

Hadēs g86

Greek: proper noun, place

Usage: 11 times in 5 books, 9 chapters, and 11 verses

Meaning:

Synonymous with Sheol, though in New Testament usage Hades is the temporal place of punishment for deceased unbelieving mankind, distinct from Paradise for deceased believers.

Limnē Pyr g3041 g4442

Greek: proper noun, place

Usage: Phrase 5 times in the New Testament

Meaning:

Lake of Fire, final punishment for those not named in the Book of Life, prepared for the Devil and his angels, Matthew 25:41.

Sheol h7585

Hebrew: proper noun, place

Usage: 66 times in 17 books, 50 chapters, and 64 verses

Meaning:

The grave or temporal afterlife world of both the righteous and unrighteous, believing and unbelieving, until the general resurrection.

Tartaroō g5020

Greek: proper noun, place

Usage: 1 time in 2 Peter 2:4

Meaning:

Temporary prison for particular fallen angels awaiting final judgment.

Glossary +

AionianBible.org/Bibles/Bareli-Palya---Palya-Bareli-Bible/Noted

Glossary references are below. Strong's Hebrew and Greek number notes are added to 64 Old Testament and 200 New Testament verses. Questioned verse translations do not contain Aionian Glossary words and may wrongly imply *eternal* or *Hell*. * The note placement is skipped or adjusted for verses with non-standard numbering.

Abyssos

Luke 8:31
Romans 10:7
Revelation 9:1
Revelation 9:2
Revelation 9:11
Revelation 11:7
Revelation 17:8
Revelation 20:1
Revelation 20:3

aidios

Romans 1:20
Jude 1:6

aiōn

मत्ती 12:32
मत्ती 13:22
मत्ती 13:39
मत्ती 13:40
मत्ती 13:49
मत्ती 21:19
मत्ती 24:3
मत्ती 28:20
Mark 3:29
Mark 4:19
Mark 10:30
Mark 11:14
Luke 1:33
Luke 1:55
Luke 1:70
Luke 16:8
Luke 18:30
Luke 20:34
Luke 20:35
John 4:14
John 6:51
John 6:58
John 8:35
John 8:51
John 8:52
John 9:32
John 10:28
John 11:26
John 12:34
John 13:8
John 14:16

Acts 3:21
Acts 15:18
Romans 1:25
Romans 9:5
Romans 11:36
Romans 12:2
Romans 16:27
1 Corinthians 1:20
1 Corinthians 2:6
1 Corinthians 2:7
1 Corinthians 2:8
1 Corinthians 3:18
1 Corinthians 8:13
1 Corinthians 10:11
2 Corinthians 4:4
2 Corinthians 9:9
2 Corinthians 11:31
Galatians 1:4
Galatians 1:5
Ephesians 1:21
Ephesians 2:2
Ephesians 2:7
Ephesians 3:9
Ephesians 3:11
Ephesians 3:21
Ephesians 6:12
Philippians 4:20
Colossians 1:26
1 Timothy 1:17
1 Timothy 6:17
2 Timothy 4:10
2 Timothy 4:18
Titus 2:12
Hebrews 1:2
Hebrews 1:8
Hebrews 5:6
Hebrews 6:5
Hebrews 6:20
Hebrews 7:17
Hebrews 7:21
Hebrews 7:24
Hebrews 7:28
Hebrews 9:26
Hebrews 11:3
Hebrews 13:8
Hebrews 13:21
1 Peter 1:23

1 Peter 1:25
1 Peter 4:11
1 Peter 5:11
2 Peter 3:18
1 John 2:17
2 John 1:2
Jude 1:13
Jude 1:25
Revelation 1:6
Revelation 1:18
Revelation 4:9
Revelation 4:10
Revelation 5:13
Revelation 7:12
Revelation 10:6
Revelation 11:15
Revelation 14:11
Revelation 15:7
Revelation 19:3
Revelation 20:10
Revelation 22:5

aiōnios

मत्ती 18:8
मत्ती 19:16
मत्ती 19:29
मत्ती 25:41
मत्ती 25:46
Mark 3:29
Mark 10:17
Mark 10:30
Luke 10:25
Luke 16:9
Luke 18:18
Luke 18:30
John 3:15
John 3:16
John 3:36
John 4:14
John 4:36
John 5:24
John 5:39
John 6:27
John 6:40
John 6:47
John 6:54
John 6:68

John 10:28
John 12:25
John 12:50
John 17:2
John 17:3
Acts 13:46
Acts 13:48
Romans 2:7
Romans 5:21
Romans 6:22
Romans 6:23
Romans 16:25
Romans 16:26
2 Corinthians 4:17
2 Corinthians 4:18
2 Corinthians 5:1
Galatians 6:8
2 Thessalonians 1:9
2 Thessalonians 2:16
1 Timothy 1:16
1 Timothy 6:12
1 Timothy 6:16
2 Timothy 1:9
2 Timothy 2:10
Titus 1:2
Titus 3:7
Philemon 1:15
Hebrews 5:9
Hebrews 6:2
Hebrews 9:12
Hebrews 9:14
Hebrews 9:15
Hebrews 13:20
1 Peter 5:10
2 Peter 1:11
1 John 1:2
1 John 2:25
1 John 3:15
1 John 5:11
1 John 5:13
1 John 5:20
Jude 1:7
Jude 1:21
Revelation 14:6

eleēsē

Romans 11:32

Geenna

मत्ती 5:22
मत्ती 5:29
मत्ती 5:30
मत्ती 10:28
मत्ती 18:9
मत्ती 23:15
मत्ती 23:33
Mark 9:43

Mark 9:45
Mark 9:47
Luke 12:5
James 3:6

Hadēs

मत्ती 11:23
मत्ती 16:18
Luke 10:15
Luke 16:23
Acts 2:27
Acts 2:31
1 Corinthians 15:55
Revelation 1:18
Revelation 6:8
Revelation 20:13
Revelation 20:14

Limnē Pyr

Revelation 19:20
Revelation 20:10
Revelation 20:14
Revelation 20:15
Revelation 21:8

Sheol

Genesis 37:35
Genesis 42:38
Genesis 44:29
Genesis 44:31
Numbers 16:30
Numbers 16:33
Deuteronomy 32:22
1 Samuel 2:6
2 Samuel 22:6
1 Kings 2:6
1 Kings 2:9
Job 7:9
Job 11:8
Job 14:13
Job 17:13
Job 17:16
Job 21:13
Job 24:19
Job 26:6
Psalms 6:5
Psalms 9:17
Psalms 16:10
Psalms 18:5
Psalms 30:3
Psalms 31:17
Psalms 49:14
Psalms 49:15
Psalms 55:15
Psalms 86:13
Psalms 88:3
Psalms 89:48

Psalms 116:3
Psalms 139:8
Psalms 141:7
Proverbs 1:12
Proverbs 5:5
Proverbs 7:27
Proverbs 9:18
Proverbs 15:11
Proverbs 15:24
Proverbs 23:14
Proverbs 27:20
Proverbs 30:16
Ecclesiastes 9:10
Song of Solomon 8:6
Isaiah 5:14
Isaiah 7:11
Isaiah 14:9
Isaiah 14:11
Isaiah 14:15
Isaiah 28:15
Isaiah 28:18
Isaiah 38:10
Isaiah 38:18
Isaiah 57:9
Ezekiel 31:15
Ezekiel 31:16
Ezekiel 31:17
Ezekiel 32:21
Ezekiel 32:27
Hosea 13:14
Amos 9:2
Jonah 2:2
Habakkuk 2:5

Tartaroō

2 Peter 2:4

Questioned


None yet noted



"By faith, Abraham, when he was called, obeyed to go out to the place which he was to receive for an inheritance. He went out, not knowing where he went"

Hebrews 11:8

Israel's Exodus



"When Pharaoh had let the people go, God didn't lead them by the way of the land of the Philistines, although that was near; for God said, 'Lest perhaps the people change their minds when they see war, and they return to Egypt!'" Exodus 13:17



"For the Son of Man also came not to be served, but to serve, and to give his life as a ransom for many"

Mark 10:45



Paul's Missionary Journeys

"Paul, a servant of Jesus Christ, called to be an apostle, set apart for the Good News of God"

Romans 1:1

Creation 4004 B.C.

Adam and Eve created	4004
Tubal-cain forges metal	3300
Enoch walks with God	3017
Methuselah dies at age 969	2349
God floods the Earth	2349
Tower of Babel thwarted	2247
Abraham sojourns to Canaan	1922
Jacob moves to Egypt	1706
Moses leads Exodus from Egypt	1491
Gideon judges Israel	1245
Ruth embraces the God of Israel	1168
David installed as King	1055
King Solomon builds the Temple	1018
Elijah defeats Baal's prophets	896
Jonah preaches to Nineveh	800
Assyrians conquer Israelites	721
King Josiah reforms Judah	630
Babylonians capture Judah	605
Persians conquer Babylonians	539
Cyrus frees Jews, rebuilds Temple	537
Nehemiah rebuilds the wall	454
Malachi prophecies the Messiah	416
Greeks conquer Persians	331
Seleucids conquer Greeks	312
Hebrew Bible translated to Greek	250
Maccabees defeat Seleucids	165
Romans subject Judea	63
Herod the Great rules Judea	37

(The Annals of the World, James Uusher)

Jesus Christ born 4 B.C.

New Heavens and Earth

1956	Christ returns for his people
1830	Jim Elliot martyrd in Ecuador
1731	John Williams reaches Polynesia
1614	Zinzendorf leads Moravian mission
1572	Japanese kill 40,000 Christians
1517	Jesuits reach Mexico
1455	Martin Luther leads Reformation
1323	Gutenberg prints first Bible
1276	Franciscans reach Sumatra
1100	Ramon Llull trains missionaries
1054	Crusades tarnish the church
997	The Great Schism
864	Adalbert martyrd in Prussia
716	Bulgarian Prince Boris converts
635	Boniface reaches Germany
569	Alopen reaches China
432	Longinus reaches Alodia / Sudan
397	Saint Patrick reaches Ireland
341	Carthage ratifies Bible Canon
325	Ulfilas reaches Goth / Romania
250	Niceae proclaims God is Trinity
197	Denis reaches Paris, France
70	Tertullian writes Christian literature
61	Titus destroys the Jewish Temple
52	Paul imprisoned in Rome, Italy
39	Thomas reaches Malabar, India
33	Peter reaches Gentile Cornelius
	Holy Spirit empowers the Church

(Wikipedia, Timeline of Christian missions)

Resurrected 33 A.D.

What are we? ▶			Genesis 1:26 - 2:3		Mankind is created in God's image, male and female He created us						
How are we sinful? ▶			Romans 5:12-19		Sin entered the world through Adam and then death through sin						
Where are we? ▶			When are we? ▼								
			Innocence		Fallen				Glory		
Who are we? ▶			Eternity Past	Creation 4004 B.C.	Fall to sin No Law	Moses' Law 1500 B.C.	Christ 33 A.D.	Church Age Kingdom Age	New Heavens and Earth		
			God	Father	John 10:30	Genesis 1:31 God's perfect fellowship with Adam in The Garden of Eden	1 Timothy 6:16 Living in unapproachable light				Acts 3:21 Philippians 2:11 Revelation 20:3
				Son	God's perfect fellowship		John 8:58 Pre-incarnate		John 1:14 Incarnate	Luke 23:43 Paradise	
				Holy Spirit			Psalm 139:7 Everywhere		John 14:17 Living in believers		
			Mankind	Living	Genesis 1:1 No Creation No people		Ephesians 2:1-5 Serving the Savior or Satan on Earth				God's perfectly restored fellowship with all Mankind praising Christ as Lord in the Holy City
				Deceased believing			Luke 16:22 Blessed in Paradise				
				Deceased unbelieving			Luke 16:23, Revelation 20:5,13 Punished in Hades until the final judgment				
			Angels	Holy		Hebrews 1:14 Serving mankind at God's command					
				Imprisoned		2 Peter 2:4, Jude 6 Imprisoned in Tartarus				Revelation 20:13 Thalaasa	
				Fugitive		Genesis 1:31 No Fall No unholy Angels					
First Beast	1 Peter 5:8, Revelation 12:10			Revelation 20:2 Abys							
False Prophet	Rebelling against Christ Accusing mankind										
Satan						Matthew 25:41 Revelation 20:10					
Why are we? ▶			Romans 11:25-36, Ephesian 2:7		For God has bound all over to disobedience in order to show mercy to all						

Destiny

Bareli, Palya at AionianBible.org/Destiny

The Aionian Bible shows the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of after-life destinies. The underlying Hebrew and Greek words typically translated as *Hell* show us that there are not just two after-life destinies, Heaven or Hell. Instead, there are a number of different locations, each with different purposes, different durations, and different inhabitants. Locations include 1) Old Testament *Sheol* and New Testament *Hadēs*, 2) *Geenna*, 3) *Tartaroō*, 4) *Abyssos*, 5) *Limnē Pyr*, 6) *Paradise*, 7) *The New Heaven*, and 8) *The New Earth*. So there is reason to review our conclusions about the destinies of redeemed mankind and fallen angels.

The key observation is that fallen angels will be present at the final judgment, 2 Peter 2:4 and Jude 6. Traditionally, we understand the separation of the Sheep and the Goats at the final judgment to divide believing from unbelieving mankind, Matthew 25:31-46 and Revelation 20:11-15. However, the presence of fallen angels alternatively suggests that Jesus is separating redeemed mankind from the fallen angels. We do know that Jesus is the helper of mankind and not the helper of the Devil, Hebrews 2. We also know that Jesus has atoned for the sins of all mankind, both believer and unbeliever alike, 1 John 2:1-2. Deceased believers are rewarded in Paradise, Luke 23:43, while unbelievers are punished in Hades as the story of Lazarus makes plain, Luke 16:19-31. Yet less commonly known, the punishment of this selfish man and all unbelievers is before the final judgment, is temporal, and is punctuated when Hades is evacuated, Revelation 20:13. So is there hope beyond Hades for unbelieving mankind? Jesus promised, *"the gates of Hades will not prevail,"* Matthew 16:18. Paul asks, *"Hades where is your victory?"* 1 Corinthians 15:55. John wrote, *"Hades gives up,"* Revelation 20:13.

Jesus comforts us saying, *"Do not be afraid,"* because he holds the keys to *unlock* death and Hades, Revelation 1:18. Yet too often our *Good News* sounds like a warning to *"be afraid"* because Jesus holds the keys to *lock* Hades! Wow, we have it backwards! Hades will be evacuated! And to guarantee hope, once emptied, Hades is thrown into the Lake of Fire, never needed again, Revelation 20:14.

Finally, we read that anyone whose name is not written in the Book of Life is thrown into the Lake of Fire, the second death, with no exit ever mentioned or promised, Revelation 21:1-8. So are those evacuated from Hades then, *"out of the frying pan, into the fire?"* Certainly, the Lake of Fire is the destiny of the Goats. But, do not be afraid. Instead, read the Bible's explicit mention of the purpose of the Lake of Fire and the identity of the Goats, *"Then he will say also to those on the left hand, 'Depart from me, you cursed, into the consummate fire which is prepared for... the devil and his angels,'"* Matthew 25:41. Bad news for the Devil. Good news for all mankind!

Faith is not a pen to write your own name in the Book of Life. Instead, faith is the glasses to see that the love of Christ for all mankind has already written our names in Heaven. Jesus said, *"You did not choose me, but I chose you,"* John 15:16. Though unbelievers will suffer regrettable punishment in Hades, redeemed mankind will never enter the Lake of Fire, prepared for the devil and his angels. And as God promised, all mankind will worship Christ together forever, Philipians 2:9-11.



आनीन करीन तम् जावो, आखा राज्य ना माण्ह ने चेला बणावो; अने तीमने बाह, अने सोरा, अने चोखली आत्मा नी नाम सी बपतीसमा आपो, - मत्ती 28:19